


Зимний веселье



3.2018

# Выль небӧг



ББК 84(2Рос.Ком)-5  
К59

ISBN 978-5-9500935-6-2

Козлов Е.В. Коймӧд аттьӧ: Кывбуръяс, висътъяс.— Сыктывкар, Коми Республикаса гижысь котыр, 2017.— 64 л.б.

Верстыӧ арлыдӧ кодӧн кӧть тэ эн ло, банкирӧн кӧть чинаӧн, гижысьӧн кӧть му вӧдитысьӧн, дзолядырыд пондас казътывсьыны кыдзи медся шуда кад: сэки и гожӧмъясыс вӧліны медся кузьӧсь, и ёртъясыд медся бурӧсь, и оз да ӧмидз чӧскыдӧсь-чӧскыдӧсь. А шондӧыс кыдзи дзирдаліс да ворсӧдчис ва веркӧсын! И, дерт жӧ, чойвок да нель кока ёртъяс. Та йылысь и муно сёрниыс «Коймӧд аттьӧ» книгаын.

Серпасалис И.А.Авилова.

ПЕТӢ 1926 ВОСЯНЬ

ЛЭДЗӢНЫ: КОМИ РЕСПУБЛИКАСА ЮРАЛЫСЬЛӢН АДМИНИСТРАЦИЯ,  
КОМИ РЕСПУБЛИКАСА ГИЖЫСЬ КОТЫР

---

# ВОЙВЫВ КОДЗУВ

---



ISSN 0134-4323

БЫД ТӢЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

---

## 3 (855) РАҚА (МАРТ) 2018

### ТАЙӢ НОМЕРЫН:

Алёна ШОМЫСОВА. «СьылӢ гудӢклӢн морӢс куд...» Кывбурьяс .....	3
Алексей ПОПОВ. ОлӢм войтъяс .....	7
Дарья КАРМАНОВА. Чуксав менӢ, сынӢдӢй... Кывбурьяс ..	22
Александр ШЕБЫРЕВ. ПӢим. Пьеса .....	25
Ольга БАЖЕНОВА. ДозмӢр. Висьт .....	41

### КАД ДА ЙӢЗ

Михаил ИГНАТОВ. Миш ТиналӢн пасйӢдьяс .....	43
---	----

### ВУНЛЫТӢМ НИМЪЯС. ЁРТЪЯСӢС КАЗЬТЫЛӢГ

Митерасса Ӣлексей .....	49
Алексей ОДИНЦОВ. СӢмдор чери. ДозмӢркаын. Висьтъяс .....	51

12+

Обложка вылын снимокыс Юрий ЛисовскийлӢн.

© «Войвыв кодзув» («Северная звезда»), 2018 г.

СЫКТЫВКАР

# СЕВЕРНАЯ ЗВЕЗДА



*Ежемесячный  
литературно-художественный  
журнал*



**Учредители:**

**АДМИНИСТРАЦИЯ ГЛАВЫ РЕСПУБЛИКИ КОМИ**

**«СОЮЗ ПИСАТЕЛЕЙ РЕСПУБЛИКИ КОМИ» - РЕГИОНАЛЬНОЕ  
ОТДЕЛЕНИЕ ОБЩЕРОССИЙСКОЙ ОБЩЕСТВЕННОЙ ОРГАНИЗАЦИИ  
«СОЮЗ ПИСАТЕЛЕЙ РОССИИ»**



**Издатель:**

**АУ РК «ИЗДАТЕЛЬСКИЙ ДОМ КОМИ»**

**ДИРЕКТОР ПЛЕТЦЕР Е.В.**



**РЕДАКЦИОННАЯ КОЛЛЕГИЯ:**

Главный редактор

ПОЛУТРУДОВ А.В.

Ответственный  
секретарь

КИЧИГИН И.Н.

УЛЬЯНОВ А.В.

УЛЯШЕВ О.И.

ЛИМЕРОВА В.А.



Алёна ШОМЫСОВА



## «Сыло гудөклөн морөс куд...»

КЫВБУРЪЯС

### Пөчлөн сад

Пөчлөн садйын төрыт на вөлі шойна  
Важмөм, сисьмөм пөвъясысь да сямөм көртысь,  
Трактор-машина юкөнысь өкмөм лөптысь —  
Ставсө позис важөн нин кытчөкө лойны.

Талун садйыс ружөктис пыдө-пыдө,  
Мурган шыөн кротшкөдчис мынөм вужйыс,  
Бытьтө уна төв бөрын гожөмө вуджис,  
Кор ми весалим котырөн садлысь пыдөс.

Өні садйыс юкмөсөн меным лоө,  
Кытысь позьө гумлавын челядьдыртө,  
Кытөн позьө мөвпавны кадлысь кывтөм,  
Кытөн коркө вежөртан арлысь воөм.

### Вөсни кока берба

Өтчид садйын вөсни кока берба  
Весьөпөртис менө пашкыр чалльөн,  
Көні вөлі сяргөдчөма бальө —  
Выльөн чужөм посни пушыд лэбач.

Менө сотис мөвп, мый лоас чудө,  
Ки пыдөсө өкмыльсө кө пукта,  
Бытьтө дзебанінысь зарни чуктас,—  
Тайө чайтсис медся ыджыд шудөн.

Чеччалі да чеччалі мый вынысь  
Муса берба бальоясла лунтыр,  
Усурмунөмла ныр вылө сунтөдз,  
Но эз войтышт весиг и шуд джынйыс.

Арыс меным бердіс шуштөм вөтөн:  
Батьөй сөтіс черөн берба пусө,  
Шудөй вылө лача менам кусі,  
Зарниасьысь садйыс лои сьөдөн.

Берба бальсө думысь содзын кутла,  
Чери моз кор шудыс пышйө кийысь,  
И сэк кольө кытыськө лов пиысь  
Корсьны вын, мед судзөдчыны шудла.

## Пелысь

Нора ымзө пелысь керка паныд:  
Өкмыс во нин колис, өкмыс во,  
Кызди гуга лоис олөм баныс,  
Тайө садсө пуктысьыс эз ло.

Өкмыс во нин пелысь олө руын,  
Быттьө асьыс мыджөд воштөм морт,  
Вужнас өдва кутчысьыштө муө.  
Регыд сыысь кольө сөмын орт.

Кывтө пелысь шогөдан мөвп ньылыд —  
Өзын дорысь мынөм ветки пыж.  
Берегөдзыс сөмын зэв на ылын,  
Да и домыс орө — вывті рыж.

Пелысь корсьө пөчөс — асьыс пөвсө,  
Мукөд мөгсө вуштис ыджыд гы.  
Со и войнас торкө садлысь чөвсө  
Визув ваө тельскан пелыс шы.

Но оз аддзы пөчөс сылөн пелысь —  
Торъялөма ордымныслөн вож,  
Кылалөма ылө лопта пелыс,  
И оз косөд сійөс кадлөн пож.

## Гудөк

Батьөй чашкөдө гудөк — чаж!  
Лөнсьө поткөдө няжган гор,  
Быттьө чездалөм кыз пу краж  
Потө чер улын чарзөм сор.

Батьөй личкалө посни кизь,  
Тэрыб чунь увсьыс пышйө глас.

Тадзи тэрмасьысь чувкös низь  
Сюся гежмалö тилля рас.

Сьылö гудöклөн морöс куд,  
Быттö пыдöстөм гажа юль.  
Батьлөн синъясын öзйö шуд —  
Тувсов енэжлөн горадзуль.

## Сигудök

Чусмөм снимокысь лолөн кыла  
Мелі сигудök везлысь горсö.  
Батьлөн пöльöыс чунök шылад  
Джуджыд коз улын ньöжйö ворсö.

Тайö сигудök аслас киөн  
Пöльö вöчлöма ёртыс пыдди,  
Медым сьавкнитас вөр-ва пиö  
Блькйысь шыяссö сьөлөм пыди.

Авъя сигудök — югыд лола,  
Öд вөр керкаын векджык ворсö.  
Сийö пöткаөн тани лолö,  
Галя из пыдди шыяс корсьö —

Медся мылаöс, медся сöдзöс,  
Медся юркыдöс, медся рамöс.  
Сылөн шыладыс восьтö öдзöс  
Коми вöралысь олан сямö.

## Гитара

Менö, дзоляöс, медводз велöдис сьывны батьö  
Гора гудökыс улö, комиөн «Козйö, козйö...».  
Вылам, помнита, вöли кокныдик еджыд платтьö,  
И ме төв йылын быттö вöри льөм дзоридз розйөн.

Коркö, быдми да, ачым гудökсö киö босьтi,  
Öти сьыланкыв ворси — велöдчөм тайөн эштiс.  
Абу шуöма меным гудökөн лолöс восьтны,  
И мöд шылада туйö олöмыс менö вештiс.

Миян рöднымлы Енмыс сетлöма юркыд пöлян,  
И выль кöлена, гашкö, пöляяс водзö бара.  
Гажа сигудök ловсö адзöма батьлөн пöльын,  
Батын — гудök, а менö бөрйис мыла гитара.

## Гожся байкöдан

Вольпасьыдлөн лайкыд гыяс вылö  
Павкнитчöма шебрас — еджыд юсь.  
Бордъяс улас водам, муса нылö,  
Менам шöвктуг, менам зарни тусь.

---

Аски пөттөдз дзоридзьяссө октан,  
Нетшкан катшасинлысь сыръя дор,  
Өшинь улын, турун пиын, йөктан,  
Отар киад — чвет, а мөдас — кор.

Кутчысь, нылө, юсьлөн майкыд бордйө,  
Сөмын синтө топыдджыка кунь.  
Кылан, кызди юсьыс төвсө ордйө?  
Кылан, кызди шөпкө пеляд ун?

## Арся байкөдан

Гартыштчөма арся пу  
Шоньд пашкыр шалльө.  
Варов корйыс: «Шу-шу-шу»,—  
Шушкөдчө быд чаллын.

Тэныд пуыс шувгө мойд,  
Кызди челядь дорө  
Локтас паськыд плаша вой  
Муөд кышкөмсорөн.

Ваяс сильбяса шы —  
Чукъя сямөд көрөб.  
Кывзам налысь «шы-шы-шы»  
Тэкөд, сьөлөмшөрөй.





## Олём войтъяс

Олөмысь тайö неыджыд войтъяссö гижа нин кызь сайö во. Оз-оз, да бара юрын чукöрмöны налы выlö вель сюрöсьяс. Ылöдыштöмакодь эськö лои да. Тайö водзти уна сюрös вермылі вежöрын кутны. А öни со, арлыдыс талявны босьтчис да, пасъялыштны нин куті. Зэв лöсьыда быттö волас кутшöмкö сюрös. Босьтча мөвпавны, вайöдны юрын сійöс висьтторйö. Быттö ставыс лöсьыда тэчсьö. Мөд луннас кута мөвпавны, да ставыс пыркалöма. Та вöсна и босьтчи со пасъявны шөр мөвпъяссö кабала выlö. Кор чукöрмыштас, кутчыся гижны на серти.

Ас пайысь зіля петкöдлыны миян олөмыслысь посныдык войтъяссö. Öд буретш ичöтик, синмö ёна шыбитчытöм лоөмторъясысь и тэчсьö олөмным, тыдовтчö миянös кытшалысь йöзлөн сямыс. Олём дорö матыстчöмыс. И со вöзъя тöдмасыны выльясөн.

## Казьтылём

Пенсия выlö петöм бöрын Геннадий Иванович эз дугды судзöдны районса газеттö. Пыр на сійö петö да. Сöмын тай кабалаыслөн нырö вартысь кöрыс вочасөн вежсьыны босьтчис. Водзти быттö мөдджык вöлі. Ваясны гортöдзыс газетсö, да лыддытöдзыс вель дыр исалас. Öни кабаласö код тöдас мыйысь вöчöны. Абу важ дука.

Кадыд тай, майбыр, лэбö. Он и тöдлы, кызди воыд шутөвтас. А кызди олөмыс син водзад вежсьö! Кужліс мөй Геннадий Иванович коркö мөвпыштны, мый гортысь петавлытөг поэяс став юöрсö аддзыны. Тайö медся нин ёна шензьöдіс олөма мортös. Шөр сиктас быд керкаын нин компьютерыд мыччысис. Но Геннадий Иванович мый вынсьыс водзсасис, эз кöйы сибöдны выльторсö. Важ олөмнас зілис овны. Öд нэм чöжыс мырсис районса газетын. Быд выльтор ковмыліс аслыд корсьны. Весиг лёк туйöд воöдчывны ылі грездöдз, медым гижны лоөмтор йывсьыс, кодös сэсся газет петöм бöрас кутас тöдны став районис. А гижтöгыд некод оз и тöд, мый вöчсьö енмөн вунöдөм грездас.

Өні унаысь син водзас сувтлө өти важ грезд, кытчө эз өтчыдысь волю. Туйбокса медбөрря керкаыс некыдзи оз вушйы вежорсьыс. Сылөн пöлынтьчыштöм пельöсьясыс, вежынтьчöм кильчöыс. И пöчыс, кодi сэнi олис. Вöли зэв кодзыд төв. Чизыр төлыс пытшкад пырö. Районса газетлөн важиник машинаыс татшöм кодзыднад туйö петны эз лысьт. А мунны колö. Геннадий Иванович воöдчис автобусөн. Ветлис мöс картаö, пыралис бригадир дорö. Сэсся колö бөр гортлань төвзыны. Но мыйөн? Лачаыс сöмын шөр сиктлань мунысь кутшöмкö машина вылö. Со и сулалис Геннадий Иванович туй дорын да йöжгылясис.

— Дзыкöдз öд, зонмö, кынман!— кылис сийö горöдöм.

Важ керка кильчö вылö петöма пöч да сийö, вöлөм, шыасьöма.

— Ог на дзыкöдз кынмы. Ме öд бура пасьтасьöма,— кодзыдысла тiралан льöбъяссö сьöкыда вөрöдöмөн вочавидзис Геннадий Иванович.

— Машинаыд татшöм кодзыднад гежöда ветлö. Код төдас на кор татi мунас. Лок пыр, шонтысьышт.

— А сэк костi кö машинаыс буретш мунас?

— Таысь тэ эн шогсьы. Ме Василейöс кыйöдны ыстыла.

Геннадий Иванович нимкодпырысь воськовтис керкалань. Пöч пыралис да аскöдыс вайöдис Василейсö. Тайö вöли ар квайта детинка.

— Оз кынмы?— майшасис Геннадий Иванович.

— Сийöс öд бура пасьтöдi. Оз öд нин медводдзаясь машинатö кыйöдны пет. Тэ кодь ветлысьыд абу өти.

Геннадий Ивановичöс пöч юкталис пöсь тшайөн, ас пöжасөн. Шыд вöли вöзийö, да Геннадий Иванович вежавидзöмөн паныд сувтис. Оз пö ков.

— Оз кö и оз. Мöдысь пыралигөн панясян.

Збыльысь, эз öтчыдысь вежлыны найö Василейкöд öта-мöднысö. Коркö сэсся машинаыд сюри жö.

Казьтылö тайöс Геннадий Иванович, да медводз сылы телепит ветлыны тайö грездас. Дерт, пöчыд важөн нин абу. Василейыс, гашкö, и сэнi на олö. Колöкö, важ керкаыс эз на пөр да сулалö. Көть копыртчывны сылы, пöчсö казьтыштны. Геннадий Иванович төдö, мый некор оз ветлы тайö грездас, но көсийöмыс шонтö сийöс, небзьöдö сьöлөмсö. А гашкö, и збыльысь на коркö ветлас...

## Шань гöтыр

Капитон Миш асывсяныыс пиньö воис гöтырыскöд. Нинöм абусыс зыкыс пансис. Мыйö кö тай пöлыс крукасис да пинь пырыс петан гөлөсөн крукыштис. Миш и воча шуис. Мöдыс эз жö чöv ов. Пачад кö өти пес плака сюян, сийö оз дыр и сотчы. А кыкөс кö дзумган, вель дыр яра öзъявны босьтчасны. Бытгö кыкнан плакаыс кö кос. Öтиыс кö ульдзык, то чисалыштасны сöмын. А Капитон Миш гозъя кыкнанныс кос конда кодбöсь. Зэв öдийö ыпъявны кутасны, помыс оз тыдав. Со и öни найö ыджыд зыкöдз воисны. Капитон Мишлы весиг пышйыны ковмис. Крапкис öдзössö да кодзыд ывла вылö петис. Татшöм кадад мужикъясыд асьнысö сайкөдоны вина отсөгөн. Кисьтан пытшкөсад да став бийс вочасөн кусас. Та вöсна и Миш мөдöдчис лавкалань да ньöбис еджыд сарпана доз.

Но ѡд ѡтнадѡн он кут юны. Код дорѡ кѡ пыравны ковмас. А кежавнысѡ и некод дорѡ. Локтан код дорѡ кѡ дознад да мортыслы эськѡ и нимкодъ лоас, но ѡд сылѡн олан пѡв на эм. Гѡтыръясѡд оз кутны видзѡдны на вылѡ. Оз лѡдзны паськѡдчыны пызан сайѡ. Пиняласны и вѡтласны. Мишлы ѡнѡ сѡмын оз тырмы йѡз нывбабалѡн чарзѡмыс. Аслас гѡтырыслѡн гѡлѡсыс на пеляс кылѡ да.

Шудыд вылѡ казяліс Митька Васьѡс, орчча грездын олысь мужичѡйѡс. Кѡтъ ывла вылас тѡвру абу, а Васьлы вылѡ тай эм. Сѡдзи катовтчылас, мый муртса оз ныр вылас усь. Асывсяньныс нин вель гажа.

— Чолѡм, Вась. Бур, мый ме тѡнѡ аддзи. Доз ньѡби да юнысѡ некодкѡд.

— Ме ог куражитчы. Юа.

— Кытѡсянь нѡ локтан?

— Да воча вок дорѡ тѡрыт рыт пырсьѡма. Войбыд пукалім, бызгим. Эз кѡ воклѡн гѡтырыс ывла вылѡдзис менѡ йѡткав, то пыр на эськѡ варовитѡм. Лок сы ордѡ кежалам.

— Сы дорѡ ог пырѡй. Гѡтырыс, шуан, тѡнѡ тодмышкалѡма нин да.

— Вѡтліс, другѡ, сѡ збыль вѡтліс. А вай, другѡ, миянѡ ветлам.

Капитон Миш недыр артасьыштѡс да и мѡвпыштѡс ветлыны Вась дорѡдз. Куим километрсѡ вель дыр тапиктѡсны. Вась шатовмунлас да водзѡ воськовтны некѡдзи оз вермы. Та дырѡи вомыс пыр вѡрис. Туй чѡжыс сѡрнитѡс.

— Менам гѡтыр ок шань. Оз бара менѡ юѡмсьыд некор пиняв. Мишѡ, другѡ, со ѡнѡ ми тѡкѡд локтам, и сѡйѡ паныд уськѡдчѡмѡн менѡ кутлыны босьтчас. Сѡсся пызан лѡсьѡдас миянлы. Ваяс яя шыд, пражитѡм чери. Ставсѡ, мый гортын эм, пызан вылад пукталас. Сѡтшѡма сѡйѡ менѡ радейтѡ.

Со и Васьлѡн керкаыс тѡдовтчис. Матыстчисны. Кѡзяин лѡкысь босьтчис зѡрѡдчыны кильчѡ ѡдзѡсас:

— Анна, восьт. Гѡсьтѡс вайѡдѡ.

Кильчѡ ѡдзѡс гурйыв вѡссис да мыччысис Васьлѡн гѡтырыс.

— Мисьтѡм чужѡм! Яндысьтѡм бугыль! Бара нин асывсяньныс тѡкаритѡмьд-юѡмьд! Кок йылад со он сулав! Кынман кѡ нѡ ташѡм кѡдзыднас! Кулан кѡ эськѡ, бур да. Но ѡд китѡ да коктѡ кѡ вундасны, видз сѡсся меным драглѡй пьянникѡс! Бур, мый Мишѡ вайѡдѡма. Аттьѡ!

Митька Вась мыжмѡм кань моз уйкнитѡс посводзас. Мишлань весиг эз бергѡдчыв. Анна гѡтырыс бѡрсяньныс вѡтчис лѡкгоршѡн пинясьѡмѡн.

Капитон Миш ышловзис да бѡр мунѡс ас сиктланьныс. Туй костас гѡтыр вылас дѡзмылѡмыс пыркаліс. Скѡрыс пытшсьыс сылі жѡ дай. Локтѡс гортас, посводз джаджѡ дзѡбѡс тыра дозсѡ да пырис шоньд керкаас.

## Висьмылѡм

Митрей Ваньѡс талун асывсяньныс кутшѡмкѡ висьѡм топѡдѡс. Юрыс пуккыльтчѡ да сьѡлѡмыс гудрасьѡ. Кѡкъямысдас бѡрад тай гежѡд морт аслас дзоньвидзалунѡн вермас ошйысьны. Асыв-

нас палялан да юрыд кө оз шувгы — медея шудаён нин асьтө лыддян. Но со талун дзык вермытөм мортөн паляліс. Чайтіс, мый вочасөн лөняс юр висьомыс лекарство кизь ньылыштөм бөрын. Эз и өд личөд. Пыр өтарө лёкджык лоны кутіс. Отнад олігөн татшөм кадад торйөн нин омоль. Полан кулөмсьыд, Усян пласьт джодж шөрад да ловтө пөльыштан. Некод оз и төдды. Колөкө, вель дыр оз казявны кулөмтө. Джодж шөрад и сисьман. Тайө мөвпсыс нөшта на сьөлөмыс лёкысь чеччавны босьтчис да доймыны кутіс. Зэв өдйө врачьяслы триньөбтіс, мең машинаөн локтасны да висьомсьыс мездасны. Колөкө, и больничаө на нуасны. Код төдас кутшөм висьом йөршитчөма сы пытшкө.

Звөнитліс, пуксис да нем виччысьтөг синмыс самасис пызан вылас. Адөй, адөй! Кутшөм дурк пызан вылыс! Сөян колясьяса тасьтяс паськөдчөмаөсь. Матыстчис да нөшта казяліс, мый тшай юан стөканыс сьөдысла кызмөма нин. Врачьясьд локтасны да өна и дивитасны татшөм дурка оломсьыд. Он көть вермы, ковмас идравны бур йөз син водзсьыс. Митрей Вань вайис пөсь ва тыра ыджыд тасьті да босьтчис мыськавны дозмукъяссө. Сэсся вуштис ванас стөкансө. Да саймовтіс пельөсө. Сюсьджыка джодж вылас видзөддіс. А ёгыс сәні мыйта! Вежон нин эз чышкысьлы да. Босьтіс да чышкис джоджсө. Сэсся быдлаө разөдөм дөрөм-гачсө ас инас өшлис. Легөдчигад висьомыс сывны босьтчис.

Кор пырисны патераас бурдөдны воөм ныв да том морт, Митрей Ваньлөн весиг вөлі вунөма нин, кыті и висьмыліс.

## Кытысь ме мыччыси

Өнія челядыд өна жө сюсьөсь. Микита Мишлөн сизим арөса Юрий пиыс нем виччысьтөг мыйкө юалас, да калькнитөм вомөн дыр ковмас сулавны. Он төд, кыдзи и вочавидзны. Со и өні локтіс да юасыны босьтчис.

— Батьө, а кытысь ме лои? Кытысь тэ лоин? Кытысь ми артмим?

Мый татчө и вочавидзан? Он өд и лысьт пырысьтөм-пыр мыйкө шунытө. Коркө во куим, гашкө, и нель сайын, Юрийыс тайөс эськө юавліс нин да. Сөмын мөд ногөнджык. Кытысь пө менө аддзинныд? Сэки Микита Миш дыр мөвпавтөг вочавидзис, мый капуста пытшкысь. Сэтчө тәнө пө вөлі гартыштөмаөсь. Детинкалөн тайө вочакывсьыс, тыдалө, сьөлөмыс бурмис. Но рөкыд вылө Нинаыс, Мишлөн гөтырыс, мөвпыштөма мужик рөдөс гежөда вөчлытөм сөянөн чөсмөдлыштны. Голубцыөн тай коді шусьө. Изөм яй пуөм рисөн гудралөма, сэсся капустаөн төбөма да пуөма. Пукталіс верөсыслы да пиыслы ныр улас. Ачыс зэв шудаа вашгялө. Микита Миш азыма сөйны уськөдчис. Юрий пиыс гудйысьыштис, восьтіс капустасө да аддзис сэтысь яйөн гудралөм ристө. Сэсся пуктіс паньсө да лёкысь бөрддзис. Оз и висьтав, мыйла лимзалө. Сөмын Микита Миш гөгөрвоыштны кутіс. Кольөм лунъясса сёрниыс дум вылас уси да. Тыдалө, Юрийыс сійөс жө төд вылас уськөдөма. Вокөс либө чойөс важөн нин корө. Со и, тыдалө, мөвпыштөма, мый пуөмаөсь найөс да сөйны тшөктөны.

— Батьö, висътав, кытысь ми лоим?— водзö юасьö öнi Юрийыс.

— Öблезянаясысь, пиук, йöзыс артмöмаöсь,— дыр мысти аддзис вочакывсö Микита Миш.

Юрийлөн тайö вочакывсьыс сьöлöмыс, тыдалö, öнi эз бурмы. Котöртiс мöд жырийын ноксьысь мам дорас.

— Мам, мам, кытысь ми лоим?

— Ен миянöс, йöзсö, лöсьöдöма.

— Ен, а батьö шуö, мый öблезянаясысь артмим.

— Öткымын мужик рöдыс, гашкö и, öблезянаясысь и мыччысисны, а менсьым рöдöс — Ен лöсьöдiс. Ачыд öд казьявлiн, кыдзи батыд юыштас да вежнясыны кутлас. Öблезяна руыс, тыдалö, сэки сьлөн меся ёна мыччысьлö.

## Нывбабаясыд мудерöсь

Педöр Иван оз вермы шензыны гöтырыслөн мудерлун вылö. Öнi, кор колис горт овны, пыр на эз эскы, мый шедiс лэчкас. Марьяыс кöнкö лунвылын мышсö пöжö. а сылы со ковмö став овмöссö видзны. Сийö сьлөн абу ичöt: мöс. порсь, кык кань да нейджыд пон. Ставныс сёйны виччысьöны. А лэчкас шедiс со кыдзи.

Удж бöрас топыдакодь даръясыштiс ёртыскöд да кын сьöлöмөн веськöдчис гортланьыс. Полис, мый Марьяыс сийöс юёмсьыд ульöн ньылыштас. Оз вермы гажа юра верöссö синнас весиг видзöдны. Кымын матынджык лои керкаыс, сымын воськовъясыс ньöжмисны. Вель гажа, но юрыс дзуртö на. Кильчö вылас вель дыр сулалiс да медбöрын воськовтiс жö öдзöсланьыс. Чайтiс, мый Марьяыс вувзысыс сы вылö. Öд воськовтiгас весиг шатовмунлö. А гöтырыс, сылысь гажа юраөн воёмсö казьялм бöрын, шудаа вашмунiс.

— Воськовт водзлань, Ванюк.

Педöр Иванлөн кокъясыс сибдiсны. Виччысис, кор Марьяыслөн чарзан гöлöсыс письтас. Но öд эз и кыпöд сёрнитан горсö. Пыр мелиа шуалис:

— Лок нин, мый джöмдiн. Ме тэнö бур вöлöгаөн чöсмöдла. Сёянтöг жö, кöнкö, юин-а.

Педöр Иван кулис вылыс паськёмсö да пуксис пызан сайö. Ачыс век на полис, мый гöтырыс таdzi дурны босьтчöма. Сэсся дышöдас, да кызд уськöдчас! Но ужин помасис. Водан кад воис, а Марьяыс пыр öткодь бур. Вольпасьö веськалём бöрын топöдчылис на сы дорö.

— Ванюк. Ми Валя чойкöд кöсьям лунвылö ветлыны. Лэдзан öд?

— Лэдза, дерт. Кыдз нö ог лэдз. Ветлы, шойччышт,— шуалис небзьём сьöлöма Иван.

Асывнас синсö восьтiгмозыс Марьяыс водзö нуöдiс тайö сёрнисö.

— Тэ төрыт кöсийн менö лэдзны Валякöд лунвылö ветлыны.

— Кöсийи.

— Лэдзан?

— Лэдза,— пычиктiс Иван.

И лэдзис. Өні со пукалө да шензьө аслас йойлун вылө. Өд ас пельнас кывліс, кызди Марьяыс телепон пыр Валяыскөд сёрнитигөн некымынысь вочавидзліс, мый эз на пö Ваньöй... Мый эз на — эз висьтавлы. Вөлөм, вина юөмсö сылысь виччысьöны кык чой. Сады юрөн кө, эськө некор эз лэдз. Кыпöдлас вöлі Марьяыс лунвылө ветлөм йылысь сёрнисö, да Иван лөкгорша гөлөсөн паныд сувтас. Керка пытшкыс весиг сыркмунліс сылөн пинясьöмысь. А гажа юрнад со прöстмис, налькйö шедіс. Тöдіс кө тайöс, эз эськө ю, кызкө өд оліс. Пыдісянь ышловзис Педөр Иван да босьтчис порсьыслы сёян лөсьöдны. Көть ачыс на сөйтөм, пусынысьö некор, но пемöстө быть верд.

## Дэбыд шыд

Валерий Иванович шняпвидзис шоперкөд орчча пуклөс вылын. Сйö көть кутшөм, но начальство сяма. Бöрас пукалісны сыысь ичөтджык чинаяс. А кызвын начальникьясыдлөн, кызд ті тöданныд, кынөмьясыс нөбасьысь бабаяслөн коды. Валерий Иванович таөн наысь эз жö кольччыны көсйы. Рушкуыс öшаліс гач пöдпушка улөдзис. Йöзыс вель дыр сюся видзöддывлісны сы вылө. Тыдалө, лача кутісны, мый на син водзын мортыслөн кынөмыс тувсов войтва моз муас шняпкыяс. А та ыджда новлөдланторйыд пыр корö лөдсалыштөм. Кынөмыс гурьявны босьтчис, быттö поліс, мый он кө тыртышт, то чинас.

— Сувтöдды татчö,— сёян-юан керка казялөм бöрын тэрыба шуис шоперлы Валерий Иванович.

Туй бокын сулалысь керкаын вердісны ветлысь-мунысьясöс. Вель кузь öчеред сулалөм бöрын Валерий Ивановичöс корисны пуксьыны пызан сайö. Ыджыд тасьті шыдсö да котлетсö пö дінөдзыд ваясны. Сёянсö ваяліс томиник зонка. Важиник паськөма. Быттö ывла вылысь кутöмаөсь да сёян разöдны тшöктöмаөсь. Юрсиыс лезь, киясыс майтөгсö важөн нин абу тöдлөмаөсь. Тайöс Валерий Иванович бöрынджык казяліс. Вель дыр пукаліс да виччысис, некызд сылы оз вайны. Ковмис гөлөс весиг кыпöддыны. И со зонкаыд вайö сылы чукйөн тыр тасьті шыд да котлет. Матыстчигас нин Валерий Иванович кыз гөлөсөн кутіс юасьны.

— Шыдыд пөсь?— сылы эськө дзик пым сёян колö. Төвнад машинаас ыркыд вöлі да.

Зонка весиг джөмдіс. Оз тöд, мый и вочавидзны. Бөрвылас видзöдліс, но юавны некодлысь жö лои.

— Тэнсьыд юасьöны. Пөсь абу шыдыд!?!— Мурөстіс нин Валерий Иванович.

Зонка дзöран кйөн пуктіс сёян тыра подноссö пызан вылас. Лигышмунліс азым сөйысьлөн видзöдлас улын. Юасьö кө татшöмыд, быть вочавидз. Зонка тэрыба пөдöсöдзыс суйліс кык чуньсö шыд тасьтяд.

— Абу торья пөсь,— тіралан гөлөсөн юөртіс сөйны лөсьöдчысьлы.— Дэбыдкодь весиг.

Котлетыс пөсь абу, Валерий Иванович эз нин юав. А то джынсö зонмыд курччас, мед висьтавны. Вештыштіс шыд тасьтісö да тэрыба нярйыштіс котлетсö. Сйö сылы эз и мөрччыв. Сэсся тшыг кынөмөн пуксис машинаö да тшöктіс мунны водзö.

## Кык сват

Казялі, мый кымын мортыс лунвылынджык оло, сымын варовджык. Войвывланьын этшаджык сёрнитöны. Тыдалö, кодзыд дырйиыд ывла вылад сувтöмнад бызгыны абу кивыв. Öдйö кынмöм шымыртас. А финн-йöгра войтырöс и дзик сёрниттöмөн лыддьöны. Дерт, найöс, кодъяс войвылынджык олоны. Весиг анекдотъяс та йылысь лöсьöдлöны. Со öти.

Пукалоны ты шöрö якöрасьöм пыжын куим финн. Вуграсьны кутчысьöмаöсь бать да сылөн кык пиыс. Час-мöд нин дзоргöны табъяс вылас, а найö быттö кынмöмаöсь. Оз и вöрзвывны. Медбöрын öти пиыс и чöвтас:

— Тайö тыас чериыс абу.

Кольö нöшта некымын час. Мöд пиыслы вугыр йылад чери пысасяс. Кыскас да шуыштас:

— Тайö тыас чериыс эм.

Нöшта час-мöд кольö. Рытладорыс нин батыс гөлөссö сетас:

— Мый тi, кык вок, пыр вензянныд да вензянныд.

Миян коми войтыр пöвстад этша сёрнияыд эм жö. Öти сиктын оломäöсь кык сват. Волысьлöны öта-мöд дорас вöлөм. Öтчыд кодныслыкö бара телепит лöма ветлыны видлыны сватсö. Куш киён öд он мун. Лавкаö пыралас да доз босьтас.

Пырас сват дорö. Юрнас гогнитлöмөн чолөмасяс. Мöдыс тшöтш юрсö доровтлас. Гöсьт зым пуктас пызан вылö вайöмторсö. Кöзяин кыськö залавкасыйс асьыс доз кыпöдас да орччөн сувтöдас. И гөстимöй делöөн пуксясны даръясьны. Некоднанныс кыв оз шуны. Кор нин мöд дозыйс тыртöммыны босьтчас, кöзяинныд вомсö восьтас:

— Сватö, тэнад нö часыд кутшöм?

Мöдыс видзöдлас часi вылас да вочавидзас:

— Гögрöс.

Со гөститöмчöжся став сёрниыс кык сват костын.

Мöд дозсö ректöм бöрын чöла пукыштасны. Сэсся гöсьт аттöбалöм могоыс довкнитас юрнас. Мöдыс тшöтш. Пыравлы на пö коркö,— быттö юрнас гогнитöмөн шуö. И разöдчасны мöдысь аддзысьлытöдз.

## Вок йылысь

Менам ыджыдджык вок, кодöс öни ставөн тöдöны Кино Васьöн, армия бöрас ветлис велöдчыны Сыктывкарö. Миян котыр эз ичöt вöв. Квайт челядь бать да мам быдтисны. Та вöсна сьöма отсög воклы виччысьны эз мойвилы. Но сийö ичөтсьяныыс вöли писькöс вежöра. Öдйö гөгөрвоöма карса оломтö.

Сийö кадас Сыктывкарын олісны мамлөн да батылөн чойяс, дядьяс, тьотьяс. Воча чой-вокыс на вель уна чукөрмас. Вась и тетрадь лист вылö гижалöма налысь нимъяссö. Сэсся тöдмалöма, кодлөн кор удждон да аван сетан лунъясыс. Пöрысьджыкъясылысь пасйылöма пенсия воан кадсö. И артмöма сiдз, мый быд лун кодъяскö рöдвуж пöвстысь сьöмаджыкöсь лолөмаöсь. А кор тай сьöмыд эм, сэк мортыд лышкыдджыка вермас гөститöдны. Шуам, талун Ёгор дядьлөн пенсия. Вась велöдчöм помасьöм бöрын веськөдчö сы ордö гөститны. Аскинас Анна тьоткалөн аванс.

Кыз нө он ветлы муса тьоттө видлыны. Пөттөдзыд вердасны да весиг винатор на кисьтыштасны. Тадзи төлысьыд пөтөса исковтас. Мөд төлысь босьтчигөн выль пөв чөс туйсө кытшало. Локтас, шуам, мамлөн Нида тьоткаясө, да сийө оз сөмын гөститөд, но и дивитыштас на, мыйла пө сы дыра эн волы. Вась эськө и тшөкыдджыка дась сы дорө пыравны да, но өд оз тай быд лун пөчыслы пенсиясө вайлыны.

## Мый и гижлі

Кадыд тай, майбыр, мунө. Во бөрся во мыш сайө шутөвтө. Сийө пө сирөд мыр вермас сисьтыны. Морттө вежас нин. Водзті ёртъяскөд вөлі паныдася да варовитам, кытөн төрыт юим да кодкөд узим. Оні паныд веськалам да медводдза юалөмыс — кыті висьө да мый давленииесыд юлан. Тайө эськө мый на, но синмыд кө оз аддзыны кут да пельыд кывны? Юрө воө во кызсайса сёрни. Падвеж лоим сэк нималана артистка Галина Питиримовна Лыткинакөд. Элясьыштис, мый пельыс тупкысьө да синмыс лөкмө. Сэсся ачыс зэв гылыда серөктис: «Гашкө, тайө и бур. Оня олөмсө аддзөм да быдсяма лөксө кылөм дорысь синтөм-пельтөм мортлы овнысө кокныдджык».

Вочасөн мортыдлөн и вежөрыс ныжмө. Гарышти нин тай, мый гижөдьяслы сюрөсьяссө ковмө пасьявны, мед юрсьыд эз пыржав. Кабалаяс пөвстын гудрасигөн син улө уси өти татшөм пасйөд: «Грипп висьөм вуджөдөны, разөдөны. Отчыд лэдзөмаөсь сэтшөм грипп, коді вуджө ота-мөдныслы сёрниысь. И йөзыс дугдөны варовитны, мед оз висьмыны. Коді босьтчас варовитны — пырысьтөм-пыр и нөрпавны кутө». Вель дыр йигрөдлі кабаласө да некызди эг вермы төд вылө уськөдны, мый көсийи ме тайө сюрөс сертиыс гижны. Син водзө сувтө сөмын серпас, кызди ми олім эськө сёрниттөгыс. Ветлөдлім эськө некодкөд чолөмасьтөг. Ыджыд чина войтыр лөзөдөмаөсь скөрысла, мый оз вермыны некодлы көсийысьны. Велөдчысьяс нимкодя мунөны школаө. Öд налысь оз кутны нинөм юасыны. Нывбабаяс оз лысьтны пинявны верөсьяссө. Сэсся асьныд водзөсө мөвпыштөй, мый эськө лоас, быттьө лэдзасны кө грипп, коді вуджө сёрниысь.

## Писка кань

Макаров гозъя мөдөдчисны лунвылө. Челядь налөн эз вөв. Но кага пыддиыс на ордын зэв писка кань оліс. Сийөс гөтырыс, тыдалө, радейтис Митрей верөссьыс на ёнджыка. Пыр тай сийөс пестуйтис-а. Карсө кытшовтас, но ньобас чөскыд көрым, кодөс телевизор пыр ошкасны. Сыналас и малалас. Зэв писка энь кань вөлі. Зэв бөрйысьөмөн сөйис. Сы вөсна и медся ыджыд шогыс гөтырыслөн. Аскөдыс босьтны лунвылас эз жө көсийи. Сідзсө пө эськө оні поэьө каньөн и понйөн ветлөддыны, но Альбинаыс поліс, мый каньыслы лөк лоас самолөтнас лэбнысө.

— Ковмас, Митрей, тэныд корсьны, кодлы кык вежон кежлө Муськаөс кольлыны.

— Кодлы нө ме коля,— шемөс лои Макаров.— Менам тані некутшөм рөдвуж абу да.

— А менам эм?— ярскөба вомаліс Альбинаыс.

Митрей мортыс лабутнѡй. Паныд гѡтырыслы кыв оз лысыт шуны. А сійѡ, мѡдарѡ, зѣв тшетшкысь дай. Нинѡм туйѡ быттѣѡ верѡссѡ видзѡ. Коддысь и юасян? Вель дыр юрсѡ песис та вылын Макаров. Ѳти сусед дорѡ шыасьлас — оз босьтны. Мѡдѣяс кинас и кокнас пыксѡны — миян пѡ асланым кань и пон. Нѡшта тїян оз тырмы. Коли сѡмын ѡти сусед, код дорѡ эз шыасьлы. Налѡн улїджык судтаын олїс ѡтка мужичѡй. Век зѣв зумыш чужѡма, быттѣѡ пинь пырыс сѣрнитѡ. Да и, тыдалѡ, юышталѡ корсюрѡ и. Кыдз нѡ татшѡм дорад лысытан шыасьны. Но ѡд аски нин мунан лун. Тїралан сѡлѡмѡн Митрей лѣччис сусед дорас. Дерт, татшѡм скѡр чужѡма мортыд сійѡс оз весиг кут кывзыны. Но кытчѡ воштысян. Мѡдыс восьтїс ѡдзѡссѡ да зумыш чужѡмѡн кывзїс Митрейлысь мѡмляйтѡмсѡ.

— Вай. Видза кык вежонтѡ,— коса шуис сійѡ да Макаровлѡн ныр водзас и пѡдлалїс ѡдзѡссѡ.

— Улысса суседным кѡсїысїс видзны,— нимкодя юѡртїс Митрей Альбинаыслы.

— Сѣсся некодѡс сыысь омѡльджыксѡ эн нин аддзы,— вома-лїс гѡтырыс.

— Сїдзкѡ, Муськасѡ аскѡд босьтам.

— Аскѡд ог. Сїйѡс самолѣтас вермас восѡдны и быдѡн. Мыйкѡ кѡ ськѡд лоас? Кыдз нѡ ме водзѡсѡ овны кута,— лѡвтїс Альбина.

Сѣсся ачыс босьтчис корсьны, кытчѡ каньсѡ инавны. Эз некод и сюр. Мѡд асывнас гозѣя кань мездорѡн лѣчисны сусед дорас.

— Кѡрымсѡ босьтны эг слѡймы,— висьталїс зумыш дядѡлы Альбина да чургѡдїс кабала.— Муськаным миян сѡмын тайѡс сѣйѡ. Сѣтчѡ нимсѡ кѡрымыслысь гижи. А со сы вылѡ сѡмыс. Кѡрымыс вель дона.

Кань иналѡма лои. И Макаров гозѣя тѡвзисны лунвылѡ. Сѣнї олїгчѡжыс Альбинаыс лун и асыв, рыт и вой пыр гаралїс Муська йывсьыс. Коркѡ сѣсся гозѣялѡн мыш пѡжѡмыс помассис жѡ. Воисны гортас. Митрей лѣччис каньысла. И пыригмозыс шемѡс уси. Муськаыс кутшѡмкѡ няйт дозїысь варзайтѡ-сѣйѡ няньторѣяс, картофель.

— Нинѡмла каньсѡ быдсяма ньѡбѡм сѣяннас вердны. Няныс да картофельыс сылы вылѡ буретш лоас. Макарон да рок на сѣйѡ и,— нурбыльтїс суседыс да медводдзаясь нюммунїс.— А сѡмыс меным зѣв на и лѡсялїс. Ачыд тѡдан, мый вылѡ.

Та бѡрын Муськасѡ быттѣѡ вежисны. Лавкаысь ньѡбѡм сѣян вылад оз и видзѡдды. Гозѣя сѣйны пуксясны, да пызан дорас и тытвидзѡ. Виччысьѡ, кор кодныслѡнкѡ няньтор ли мый ли джоджас усяс. Зѣв ѡдїѡ тшапнитас да пышїѡдас, мед пельѡсын сѣйыштны.

Митрейлы жѡ тшѡкыда кутїс юрас воны ѡти мѡвп. Ок эськѡ, кольыны кѡ вежон кежлѡ гѡтырсѡ скѡр чужѡма суседыслы. Кутшѡм мортѡн эськѡ гортас бѡрсѡ бергѡдчас.

## Козин

Ладимер Кузьмичлы весиг эз вѡв окота восьтны синѣяссѡ. Куйлїс вольпасяс да зїлїс водзѡ унмовськѡдчыны, медем аддзы-

ны вѳт помсѳ. Сылѳн арлыдѳн вѳтъясса олѳмыс вѳлі ѳна бурджык вемѳс дорсыс. Сѳні сійѳ вѳлі тѳрыбѳн, збойѳн, некыті эз вись ни. Весиг лѳбавліс на. Кыпѳдчас мусыс и кывтѳ йѳз юрѳяс весытѳд. Аслыс нимкодѳ. Ставѳн шензѳѳны. Бара сувтлас му вылас да нѳшта вылѳджык йѳткыштчас. Челядьдырйиыс сѳмын вѳтъясас тадзи лѳбавліс. Мамыс шуліс, мый быдман да сійѳн. ѳні сылѳн арлыдѳн кутшѳм нин быдмѳм. Мѳдарѳ, муланьыс ляшмунѳ.

Но ѳд лунтыр он узы. Колѳ коркѳ и сувтны. Мыйкѳ пызан вылас лѳсьѳдыштны и. Талун ѳд сылѳн чужан лун. Кѳкѳямысдас арѳсѳдз со воѳдчис. Пиыс, нылыс асланыс пѳвѳяскѳд воасны. Пѳльѳн шуысысыс на пыраласны. Сувтіс вольпассыс да юрыс пыр и гѳгѳрмунны босытчис. Ковмис лекарство кизь нылыштны. Кыдзкѳ-мыйкѳ ас садыс воѳдчис жѳ. Юкалысь коскыс сѳмын эз мун сы дорысь. Мукѳд висьѳмсѳ лекарствоѳн вермис на вѳтлыны-а. Недыр кезлѳ жѳ, дерт, сѳмын. Тѳрыт нылыс кутшѳм-сюрѳ сѳян пыртліс нин. Сійѳс и шонтыны гѳсьтъяслы кѳсйиыс. Пач ломтіс да мый да, кадыс и шутѳвтїс. Пажын бѳрын гѳсьтъяс нин воавны босытчисны. Эз жѳ куш киѳн.

— Со, тесьт, ми тѳныд ытшкан коса козыналам. Пысалан ас вылад, моторсѳ шызыѳдан, и мыкрасытѳг позяс ѳшинь увтѳ ытшкыны,— ошйысис вайѳмторнас зытыс.

Пиыс моньыскѳд козиннас найѳс на панийѳмаѳсь. Вайисны гѳран дивѳ. Мотора жѳ пѳ. Кутчысян воропѳясас да бѳрсянныс сѳмын тапикась. Ачыс став мусѳ гѳрас. Сѳсся мукѳдыс на пыртїсны кѳкѳямысдас арѳса пѳльы ковтѳмторѳяс.

Пуксисны пызан сайѳ, Ладимер Кузьмичлы дзоньвидзалун кевмѳны, дыр овны корѳны. А сійѳ юрнас довкйѳдліс да ас улас мѳвпалїс: «Аслыныд вылѳ эськѳ ставсѳ тайѳс ньѳбинныд да. Меысь нѳ кутшѳм нин гѳрысь да ытшкысь. Кула да, ставсѳ бѳр нуанныд. Менам арлыдалы гуалан пасыкѳм нин колѳ козынавны, а оз тайѳс».

Но гѳсьтъяс мунѳм бѳрын вель на дыр тапкѳдїс вайѳм козинъяссѳ. Гашкѳ, вермас на тулыснас ачыс гѳрны, а гѳжѳмнас ытшкыны дай. Ас кок йылын на тай со. Тайѳ мѳвпыс небзыѳдыштїс морттѳ, да бур сылѳмѳн водїс узьны, медым бара воыны мѳд, лѳсьыдджык олѳмѳ.

## Варыш

Понлѳн вѳлі зѳв аслыспѳлѳс ним — Фубби. Сетїс сійѳс ичѳт кѳзйякаыс, код дорын олїс арѳсѳдз кымын. Ай пон вѳлі неыджыд, кутшѳмкѳ гѳгѳрвотѳм пѳрѳдаа. Кузник, но дженьыд кокѳяса. Йѳзыс, код дорын быдмис, сійѳс, тыдалѳ радейтїсны. Быд асыв петкѳдлісны ывла вылѳ. Сѳні лѳсьыд. Та вѳсна пон некыдз эз кѳсйи бѳр пырны дзескыдик карса патераас. Сѳні он бара котрав. Некытѳн быттьѳ. Да и пинялѳны ышмѳмсыыс. Ывла вылын жѳ позис ѳтарѳ-мѳдарѳ ризъявны, дурны, увтны мукѳд понъясѳс.

И со ѳтчыд, кор сійѳс ичѳт кѳзйякаыс петкѳдїс ывла вылѳ, Фубби нетшыштчис да домнас и усыкѳдчис кутшѳмкѳ понъяс бѳрся. Найѳ вѳліны домтѳмѳсь. Ас кезын шѳйтысь-ветлысыс.

Майбыр налы. Некод керкао оз пырт. Вель ылодз вѳтчис пон на бѳрся. Зѳв тѳрыба кытчѳкѳ котѳртѳны да. Сѳсся кыдзкѳ сѳѳдѳс жѳ. Бѳжсѳ легѳдѳгтыр матыстчис на дорѳ. Чайтѳс, мый сылы нимкодъ лоасны. Но медся ыджыд понйыс кыдз тай уськѳдчис сылань. Лѳкысь эргѳмѳн, шердын кодъ вомсѳ паськѳдѳмѳн. Ёсь пиньяснас самасис Фуббилы мышкас да шыбитѳс лым толаѳ. Кѳсийс бара вувзъысьны, но Фубби, кѳтъ и дженъыд кокъяса, тѳрыб, слѳймис пышйыны. Понъясыс чукѳрѳн, лѳкысь увтчитгыр вѳтчисны сы бѳрся. Эз ѳд и суны.

Пон тѳвзис код тѳдас кодарлань. Ас саяс воѳм бѳрын нюлѳс доймысь мышсѳ да босытчис корсьны керкасѳ, код йѳрын сийѳ быд асыв ворслѳс. Но эз аддзы. Матыстчылѳс йѳз дорѳ, но найѳ эз сибѳдны сийѳс. Ѳти детинка эськѳ весиг нор гѳлѳсѳн видлѳс корны мамсѳ, мед босытны, да эз тай нуѳдны. Сѳсся и вой суис. Сийѳ пырис кутшѳмкѳ керка улѳ да вугыртлѳс. Мѳд асывнас бара уськѳдчис корсьны важ оланѳнсѳ. И эз аддзы. Домыс падмѳдлѳс сийѳс, быдаѳ крукасьлѳс. Бур, мый кутшѳмкѳ зонка мездѳс. Но аскѳдыс эз жѳ нуѳд. Фуббилы вѳлѳ нин веськодъ, кодѳ сийѳс босытас, мед сѳмын бара веськавны шоныдѳнѳ, пѳттѳдзыс сѳйны.

Тадзи коли некымын лун. И ѳтчыд сийѳ кѳсийс нуръясьыштны ыджыд ящикъяс дорын, кытчѳ йѳзыс шыбитѳны сѳян колясьяссѳ. Муртса на матыстчис, кыдз талань жѳ воисны няйтысла югъялысь паськѳма кык мужичѳй да нывбаба. Найѳ весиг эз видзѳдлыны пон вылад, босытчисны асьныс гудрасьны ящикъясас. И мыйкѳ тѳрыба сюялѳсны вомас.

— Тѳ тай, тыдалѳ, тшыг,— друг пон кылѳс сы дорѳ шыасьѳм.

Ѳти мужичѳйыс чегыштѳс нянь тор да шыбитѳс сылы. Пон эз пырысьтѳм-пырысь уськѳдчы. Полѳс, мый чужъясны.

— Эн пов, ме тѳнѳ ог вѳрзѳѳд,— бара кылѳс мортыслѳн гѳлѳсыс.

Фубби сѳйис нянь торсѳ. Мѳдыс бара шыбитѳс.

— Тайѳ, тыдалѳ, эновтѳм пон,— кылѳс мѳд гѳлѳс.

— Вай ѳрт пыдди босытам.

— Ним колѳ сетны,— шыасис и нывбаба.

— Варышѳн нимтам дай. Варыш, Варыш, лок миянкѳд.

Фубби эз на гѳгѳрво асьыс выль нимсѳ, но мыйлакѳ вѳтчис на бѳрся.

И со дас во нин Варыш ветлѳдлѳ кытѳнсьюрѳ узылысь йѳзкѳд. Сийѳ кык мужичѳйыс да нывбабаыс важѳн нин кытчѳкѳ вошины. Сийѳ вуджлѳс на кодъ войтырлѳн мѳд киясѳ. Тѳвъяснас узылѳс на костын. Код тѳдас, кодѳс кодѳ шонтылѳс.

Ѳнѳ сийѳ ветлѳдлѳ куим мужичѳйкѳд. Кыкыс бедъ ѳтсѳгѳн нин восьялѳны, ѳти эськѳ абу на беддя, но чѳтѳ жѳ. Тайѳ и бур. Варыш пѳрысь нин да ѳдйѳ мунны оз вермы. Важ олѳмыс да нимыс сылѳн вежѳрысь вушйис. Сылы ѳнѳя йѳзыс вѳлѳны матыссаѳсь да гѳгѳрвоанаѳсь. Медся чѳскыдъяссѳ вичмѳдѳны асланыс нѳль кока ѳртыслы, мукѳд шѳйтысь понъясысь мездѳны. Восьялѳ сийѳ ѳнѳ куим морт бѳрсяыс да асьыс мѳвпалѳ. Найѳ муныштасны да бара шыбитасны ящикъясысь аддзѳм чѳскыд няньтор. Мый сѳсся Варышлы колѳ. Мѳд пѳлѳс олѳм йылысь сийѳ оз и мѳвпав. Мѳдарѳ на, жалитыштѳ понъясѳс, кодъясѳс дом йылын йѳзыс новлѳдлѳны.

## Паныд локтысь йӧз

Вася Нечаев быд асыв восьлавліс удж вылас ӧти и сійӧ жӧ туйӧд. И ӧти кадӧ. Петліс гортсыс водз, кор карса джын йӧзыс чӧскыда на узисны. Воча воысыс вӧлі зэв гежӧд. И нем виччысьтӧг быттӧ казяліс, мый ӧти жӧ сійӧ инас паныд сылы веськалӧ ӧти и сійӧ жӧ нылыс. Со сійӧ локтӧ. Тӧвнад пемыд да весиг он тӧд, кутшӧмджык чужӧм вылас, но вӧрасыс тэрыб. Да и нылыс, кӧть и пальтоа, тӧдчӧ, мый вӧсньыдик. Оз мышкыртчӧмӧн мун, а юрсӧ вылӧ кутӧмӧн. Вася водзті весиг эз видзӧдлыв сы вылӧ. Быд паныдасыськӧд ӧд он кут синмасыны. Мунӧ, тыдалӧ, сы моз удж вылӧ да и мед восьлалас. Но талун сылы телепит лои сюсьджыка чӧвтлыны сы вылӧ видзӧдлассӧ.

Найӧ вочаасисны буретш югыд лампа весьтын. И Вася видзӧдліс ныв вылӧ. Мӧдыс, тыдалӧ, кыліс, мый сы вылӧ дзоргӧны, да сыланьӧ жӧ бергӧдчыліс. Видзӧдласыс нывлӧн Васьӧос шензьӧдыштӧс. Кутшӧмкӧ зэв нин пыдӧдз пырана. Быттӧ оз зонлысь чужӧм-мыгӧрсӧ кӧсйы тӧдмавны, а пытшӧс. Зэв сюсь йӧзлӧн сӧмын татшӧм видзӧдласъясыс.

\* \* \*

Валя Канева важӧнокдӧ нин казяліс, мый ӧти морт век паныд сылы волӧ. Гусьӧникӧн чӧвтлывліс сы вылӧ синъяссӧ. Первойсӧ кӧсйис думсыс тӧдмавны, кӧні уджалӧ татшӧм водз мунысь мортыс. Но чужӧм сертиыд нӧ кыдзи тӧдмалан? Сэсся мӧд мӧвп юрас пысасис: кымын арӧс зонмыслы. Эз жӧ тшукасӧ тӧдмав. Абу на олӧма. Комыныс, гашкӧ, весиг абу. Талун асыв сійӧ кӧсйис нӧшта бурджыка видзӧдлыны. Зонмыс сылысь видзӧдлассӧ, тыдалӧ, эз казявлы. Некор на тай воча эз синъяссӧ чӧвтлы-а. Со нин сійӧ зэв матын. И нем виччысьтӧг гӧгӧрвоис, мый воча локтысыс талун сы вылӧ видзӧдӧ. Валя воча дзоркнитліс. Зонлӧн синъясыс кажитчисны шаньӧн. Абу унзіль чужӧма и. Тыдалӧ, оз сувтӧмозыс удж вылӧ котӧрт.

\* \* \*

Та бӧрын быд асыв кутісны синмасыны, но кыв ӧта-мӧдыслы эз шулыны. Медбӧрын Вася Нечаев мӧвпыштӧс, мый та дыра паныдасыӧны, синмасыӧны да кад нин воис нимсӧ юавны. Но эз лысьт мыйлакӧ. Но чолӧмасыны чолӧмасис.

— Бур асыв.

— Видза оланныд.

Мӧд асывнас бара чолӧмасисны. Но Вася смелмӧдчис шмонитыштны:

— Тӧлысь мысти, чайта, позяс нин тӧянлысь нимтӧ юавны?

\* \* \*

— Позяс,— серӧктыштӧс Валя да воча шмонитӧс.— Ӑні водз на.

И водзӧ муніс кыпыд сьӧлӧмӧн. Сылы кажитчис зонлӧн гӧлӧ-

сыс. И сійѡ, мый мукѡдѣяс моз оз зіль сирасыны. Тѡлысыс, кызди кажитчис Валялы, вѡлі помтѡм. Быд асыв надейтчис, мый талун зон оз кут виччысыны комын лунтѡ да висьталас нимсѡ. Но эз ѡд. Сэсся пыр мѡвпаліс, мый, гашкѡ, гѡтыра нин мортыс и быдѡн. Эм кѡ сылѡн кодкѡ, то мыйла тѡдмасынысѡ.

\* \* \*

«Кызд бара нывсѡ шуѡны-а»,— унаысь воліс тайѡ мѡвпыс Васялы. И став нывбаба нимсѡ лыддѡдліс. Став нимыс быттѡ нылыслы лѡсялѡ. Гашкѡ, оз и ков тѡлысысѡ виччысыны. Талун юалас дай. Но кутіс асысѡ. Сэсся тайѡ мѡвпсѡ чышкыштлис мѡд, торійѡн нин колана: верѡс сайын абу тайѡ нылыс?

Кызкѡ тай тѡлысыс колис жѡ.

— Менѡ Васяѡн шуѡны,— чолѡмасыѡм бѡрын нимкодя юѡртіс Нечаев.

— Менѡ Валяѡн.

Вася бара мѡвпыштіс шмонитыштны:

— Ѳні тѡлысь мысти позяс и свидание вылѡ корны. Быттѡ верѡсыд кѡ лэдзас.

— А тѣнѡ гѡтырыд,— воча шуис Валя.

— Абу, абу на менам гѡтырыс.

— А менам верѡсыс абу на жѡ дай,— гылыда серѡктіс ныв.

\* \* \*

«Збыль ѡмѡй бара тѡлысь ковмас виччысыны»,— водзѡ муниг-мозыс мѡвпыштіс Валя.

Мѡд асывнас зонмыд збыльысь эз кор рытнас аддзысылынысѡ. Тыдалѡ, кывсѡ кутысь морт. И коймѡднас та кузя чѡв жѡ оліс. Валя уна лун нин артыштлис петны гортсыс ѡти и сійѡ жѡ кадѡ, мед паныдасыны Васыскѡд. Весиг сѣк, кор удж вылас оз ков вѡлі татшѡм водз. И со ѡти асылѡ зонмыд паныд эз лок. «Вись-мис али мый нѡ?— майшасис Валя.— Гашкѡ, мѡд удж вылѡ вуджис? Мыйкѡ тай нинѡм жѡ та йылысь тѡрыт эз висьтав-а».

\* \* \*

Збыльысысѡ кѡ, Вася Нечаев ветліс гортас да удж вылас ковмис мунны веськыда машинасыс чеччѡм бѡрын. Кызкѡ весиг и луныс, и рытыс кузѡн кажитчис. Кор нин асылыс локтас. Воис жѡ коркѡ. Валяѡс аддзис ылісянь да дась вѡлі воча котѡртны. Казяліс, мый нылыд сійѡс аддзѡм бѡрын тѣрыбджыка жѡ восьлавны босытчис. Эз кут сэсся Вася виччысыны тѡлысь помсѡ. Корис рытнас аддзысылыны. Мѡдыс та вылѡ шудаа ваш-муніс.

\* \* \*

Ѳні Вася да Валя Нечаевѣяс оз нин паныдасылыны удж вылѡ мунигас. Но петѡны ѡти кадѡ. Сѡмын ѡтиыс восьлалѡ важ туйѡд, а мѡдыслѡн выль ордым лои. Сѡмын рытѣяснас налѡн туйыс вайѡдліс ѡтилаѡ.

## Важ гижод

Петыр Гриш некымын во нин пенсия вылын. Кымын водзö, сымын дышджык кутис мортыдлы лоны. Водзти вöли лун сьомöс-нас петалас на карса патерасьыс. Кытшовтас матигөгöрсö коксö веськөдигмоз. Сэсся бөр пырас. Бөръя каднас и тайöс вöчны эз мөд. Дзик кутасьтөм каньö пöри. Бытгьö нинöм нин выльсö олөмсьыс оз виччысь, ставсö тöдлiс. Кусны босьгчис олөм дорас пöсылуныс мортыдлөн. Со и талун коксö кресталөмөн пукалiс да сьодас олiс. Видлiс телевизор пыр мыйкö видзöдны, да быд нинöм абусö петкөдлөны. Гөтырыс кухняын ассьыс жö мыйкö ноксьö. Сы вылö оз и видзöдлы. Гозья пыр этшаджык и этшаджык сёрнитiсны öта-мөдныскöд. Уна вотö олигөн став важсö нин сё пöв висьталöма. А выльыс со нинöм оз мыччысь.

Гриш сувтiс да мөд жырйö пырис. Лыддысьны али мый босьгчыны? Гашкö, небөгса гижөдьясыс такөдыштасны, гажөдыштасны. Дыр бөрйысис да босьтiс лыддянторсö. Медся выль кышöда небөгсö тшапкис. Тайöс ни ачыс, ни гөтырыс некор на эз лыддывны. Коркö тай небөг чукөртөм вылö мода вöли, да йöзсьыс эз жö көсйыны кольччыны. Мый ки улас сюри, сийöс и джаджйö сувтöдлiсны мич вылö.

Пуксис да босьгчис медводз листайгыштны. Гашкö, синмыс кутшөмкö кывйö крукаяс. И нем виччысьтөг джоджö уси важ газетлөн неыджыд тор. Кыпöдiс, лыддiс. Да весиг көсйис пырысьтөм-пыр косявны, медым гөтырыслы киас эз веськав. Но эз жö. Бөр суйис небөг костас да лыддысянторсö джадж вылас сувтöдiс. Син водзас жö пыр кутис гижөдсö, мый вöли пасйöма газет торьяс. «Мича ныв пö көсийö адзысьны удал мужикьяскöд. Корö тшай юны. И телепонсö индöма».

И Петыр Гриш тöд вылас уськөдiс во кызь сайö кольөм рытсö. Олөмыс сэк дзикöдз вежсьылiс. Лунысь-лун пыр кутшөмкö выльтор мыччысис. Öтчыд Гриш кутис лыддыны газет да син улас уины весьөпöртана юөрьяс. Некымын ныв гижöны ассьыныс телепоньяс да корöны воыны на дорö шойччыштны. Гришлөн сэки вöли нин сэтшөм арлыд, кор ывла вылын том нывьясыдкөд он нин тöдмась. Көть эськö мөвпнас унаысь көсйылiс да. Öти сёянсьыд öд уман. Мужик мортыдлы пыр мыйкö выльпөлс колö. Томдырйиыс уна нывкөд шуд уси тöдмасьлыны. Эз на вунöд тайöс. Гөтырыскöд овмөдчөм бөрын на мыйсюрö вöли и. Но тайö өд кор нин артмылiс. Öни во кызь сайö нин мөд нывбабалысь көрсö эз тöдлы. А танi со асьныс вöзйысьöны.

Гриш газетсьыс косялiс тайö юөрьяссö да суйис небөг костö. И эз вунöд. Чöжис гөтырсьыс гуся сьом. Тöдiс, мый куш киөн татшөм нывьясыд ас дорас оз сибöдны. Сэсся öти рытö, кор гөтырыс сёр рытöдз мунiс мамсö видлыны, босьтiс кабаласö да дыр видзöдiс сы вылö. Көсйис телепонсö босьтны да звөнитны, но киясыс тiравны кутiсны. Сьөлөмыс лөкысь чечавны дай. Мый нö тайö татшөмыс? Водзти тай зэв повтöма нывьяс дорад сибöдчывлiс. А öни со кызди тiралö. Медбөрын звөнитiс жö. Мөдар помсянныс кылiс нывбабалөн мелi гөлс. Мый и водзöсö шуны? Эз тöд. Зэв öдйö шыбитiс трубкасö. Час джын мысти бара босьтiс.

— Эн полй, сёрнитой,— быгтьö тöдiс, мый бара сийö звöнитö, шуис нылыд.

— Ме кöсья тшай юны тiян дорö волены. Коранныд тай со.

— Волöй.

— Мыйтта нö тшай юöмыс сулалö?

Донсö шуисны сэтшöмöс, мый Гриш муртса гатшөн эз усъ. Та мында сьöмсö сийö вежон джынийөн нажöвитö. А танi часөн кöсийöны босьтны. Бара трубкасö шыбитiс. Дыр мөвпалiс. Сэсся воис кывкöртöдö, мый олöмас öтчыдысь татшöмыс лолö. Мый сьöмсö жалитан. И бара звöнитiс. Воöдчисны сёрнинас сэтчöдз, мый ныв висьталiс, кыгчö колö локнысö, кöни тшайнас юктöдöны.

— Час мысти локта,— кöсийыс Гриш.

Вель дыр вöччис, мед нылыслы кажитчис да сыысь эз уркнитчы. Медбöрын петiс жö. Восьлалiс индöм керка дорас. И нем виччысьтöг джöмдiс юрас воём мөвпысь: «А друг да нинöм оз артмы. Тадзи полiгад. Вельшöрö сьöмсö сетöма лö». Сулыштiс, такöдiс асьсö быд ногыс. Видзöдöмпырысь, артмас на. Мöдöдчис водзö. Бара джöмдiс. Та мында сьöм видзас! Да сы вылö жö позьö медся чöскыд винасö ньöбны, пöтöса сёян, да кольö на. Ышловзис, но водзö довгис. Сэсся вельшöпöртана мөвп юрас чужис: «Друг да кодкö гусьөн снимайтас. Сэсся гöтырыдлы ыстас». Воськовъяс бара ньöжмисны. Сэсся унатор на юрас волiс. Гашкö, сьöкыд висьöм көвъясяс, колöкö, шмонитöны либö ныв пыдди мужик чукöр виччысьö. Нöйтасны да сьöмтö мырддясны. Но кыдзкö тай матыстчис жö индöм керка дорöдзыс, эз кос. Тiралан кокөн кайис пос кузяыс. Медбöръя судтаас урчитöм патераыс да. Аштiс весигтö. Абу нин том чибук кодъ. Часыс мунас сöмын ловтö шедöдöм вылö. Кутшöм нин мусукасьöм. Сы вылö кадыс оз нин коль.

Сiдзи и эз воöдчы индöм патера дорöдзыс. Бөр косiс.

Петыр Гриш кывзысьыштiс, мый гöтырыс вöчö. Сэсся бара босьтiс джадж вылысь небöгсö. Корсис кабалаторсö да вель дыр видзöдiс. Та бöрын каитчöмсьыс сьöкыда ышловзис да лёкысь косявлiс.





Дарья КАРМАНОВА

## Чуксав менö, сынöдöй...

КЫВБУРЪЯС

\* \* \*

Арся луныс менам олöмын  
нюжаліс.  
Муслун сьолöмöс согіс.  
Куш лоис.  
Тэнö мөд ногөн куті  
аддзыны.  
Шудлөн рöмыс лоис тай  
быгалöм...  
Арся лун менам вежöрын  
овмөдчис...  
Öшинь-өдзөсьяс муслунлы  
пөдлалі...  
Муслун дзоридзөн мичмөдіс  
гөгөрбок.  
Öшинь-синъясөн гусьöник  
кыйөдча.  
Тайö мичлунсьяс сьолөмөй  
бөр ловзис,  
Лолөс-өдзөсөс муслунлы  
гурйивті.  
Шуда олөмыд сэк, кор  
радейтан,  
Муса олөмын быд здук  
ладмысьяс.  
Арся лунъяс оз локны  
мөдысьсө:  
Виді найөс ме ёна  
волөмсьяс.

---

\* \* \*

Медводдза лым чиръяс  
Водёны му вылө.  
Полігмоз пуксьёны  
Көчильяс ки вылө.

Сылёны. Сылёны шоныдысь.  
А гашкө, и полёмсьыс?  
Полісны шоныдысь — сылісны.  
Полісны, но бара на волісны.

\* \* \*

Вай чуксав менө, сынөдөй,  
Тшынасөн!  
Сотчө лов, а сьөлөмөй  
инасьтөм!

Кодлы абу дона ме —  
пестысис,  
Кодлы абу колана —  
Вештысис.

Сюралы ли, кодлы ли —  
эг юав...  
Шыбитіс ва гуранө,  
эновтіс...

Кодлы дона, муса ме —  
Көні ті?  
Мыйла абу орччөнөсь,  
кор коланныд?

Гуранө мөй уськөдча  
шогысла?  
Синва чышка, понда на  
нюмъявны.

Ставыс лоө бур. Кыланнды?

\* \* \*

Өшинь восьті да,  
Мича вольпась сэн  
Дасьтө АР.

Со кутшөм лышкыда  
Зарни вольсалө.  
Ме и рад.

Зарни корйөн ме  
Тэнад сьөлөмө  
Инмөдча.

---

Арся зэр войтөн  
Öшинь-синмад  
Гольдоча.

Вильыш төвруөн  
Пеляд гусьоник  
Шөпкөда:

«Сөмын өтнадлы  
Узъысь сьолөмөс  
Пальдi,

Сөмын өтнадтө  
Нэмъяс помөдз ме  
Кута радейтны».

\* \* \*

Тэа-меа костын  
кымын километра?  
Тэа-меа костын  
кымын осьса места?

Тэа-меа шөрын  
варышгъяслы көрым...  
Тэа-меа шөрын  
Быттьө пемыд вöрын...

Тэа-меа пытшкын  
муслун өмөй пышкө?..  
Тэа-меа пытшкын  
кылөмъяс, но тшыкөм...

Тэа-меа пытшкын  
ловъя лов нин абу...  
Тэа-меа пытшкын  
сюраяс да кабур...

❖ ❖ ❖

# Пөим

ПЬЕСА

ВОРСЫСЬЯС:

**МИТРЕЙ ДЯДЬ** — пöрысь морт.

**МИТРЕЙ** (том кадся) — ар 30.

**НИДА** (том кадся) — ар 30.

**ГОРДЕЙ** (том кадся) — ар 30.

**ПАВЕЛ** (Гордейлөн да Нидалён пи) — ар 40.

**АННА** — гöтырыс (сэтшöм жö арлыда).

**МАРЬЯ** — суседка, олöма ань.

**ИЛЛЯ** — шöр арлыда.

**НАСТА ПÖЧÖ** — пöрысь морт.

ВОДДА ЗА ЮКÖН

**Медводда петкöдчöм**

**Занавес (либö сцена вылас кусöдöма би). Кылö коми кыв вылын шог сыланкыв.**

**Занавес сайысь петö Анна. Повзьöм чужöма. Син доръяссö чышкалö. Виччысьö Павелöс, верöссö. Занавес сайсянь жö недыр мысти петö Павел. Нимкодъ чужöма. Матыстчö Анналань.**

**АННА** (*гöзмöмөн*). Көн нö шöйтан? Абу и абу! Митрей дядь кулö. Тэнö корö... Мед пö öнi жö волас...

**ПАВЕЛ** (*шöйöвошöмөн*). Кыдз кулö? Мыйысь? Тöрыт на вашгьялис, шмонитiс мекöд...

**АННА** (*öвтыштчö кинас*). Кысь ме тöда? Висьöмыд тай оз юась! Сизимдас бөр жö нин...

**Шай-паймунö Павел, сьöкыда пуксьö Анна кок дорö. Кияснас топöдö юрсö. Дой сорөн сёрнитö.**

**ПАВЕЛ.** Мыйся олöм, трасича бугыль? Агасөн няргялö! Морт сьöлöмтö тиски костö топöдö. Мыйся олöм, мыйся грекысь? Нелямын лун на эз коль, кыз мамöс гуалi. Юась ни висьтась мöдарьюгыдас мунiс. Батьöй кымын во жö нин кын муын! А öнi со Митрей дядь, бөрья матысса морт, тэнö кö да челядьос не лыддыны... Мыйла тадз, Анна? Мыйла олöмыс сюрса лыад зутшкö сэк, кор тэ он виччысь, кор тэ он кöсйы? Мыйла?

**АННА.** Мыйла... Тайö олöмыс и эм, Павел. Бурыс да лёкыс век панласьöны, век люкасьöны. Мутиыс коркö вынаджык овлö. Но помыс век öти. Ставным мöдарьюгыдас мунам...

**ПАВЕЛ.** А мыйла ми волам тайö муас, Анна? Мый вöсна? Код вöсна? Мед матыссаясöс дзезны, сьöлöм дойдны, мучитчыны,

и сэсса аслыд коктö нюжöдны? Мед помся шогсыны? Мед висыны, страдайтны?

АННА. Ме ог тöд... Ёнасö ог и думайт та йылысь... Шогöдас... Колöкö, мед челядьöс чужтыны да быдтыны, нукъясöс аддзывны? А тадз кö, ми тэкöд эг на прöста и волöй Му вылас, Павел...

**Павел сувтö. Сывйыштö Аннаöс. Анна бöрдö. Сэсса кыкнанныс сай-мөвтчöны занавес сайö. Занавес тупкыса на.**

ГÖЛÖС. «...Митрей дядь. Öнтип Семен Митрей. Кыдз помнитсьö, сийö век вöли Пашкöд орччөн. Нэм чöж отсасис мамыслы, Нидалы. Збылысь бать кодь. Но Митрей дядь да мам костын некутшöм шуры-муры эз тыдав (сиктад он дзед), кöть эськö Павел ёна кöсйис, мед найö гозйöдчисны. Некутшöм вежög, майбыр, эз вöv. Митрей дядь Павелъяскöд öти йöрын олис, ва-женик, но крепыдкодь на керкаын. Батыслөн на лэптылöмын. Ёна чуймавнысö тан нинöм. Митрейыс — Гордейлөн, Павел батылөн, рöднöй вок. Дзюляджык вок.

А Гордей вошлис вöрын. Кыдзкö тöлктög, гөгөрвотöма. Вöли мортгыс, и — абу. Парма сийöс ньылыштис, кыдз унаöс. Пармаыд стрög, зумыш. Оз кö мортгö терпит,— ньылыштас. Сентябр шöрын вөр керкаас Гордейыд мунис, и бöрсö тай эз лок. Лы ни кучик.

Мужикъяс кайлисны корсысыны сизим понйөн, агсалисны, гашкö, дас вөр квартал, а тöлкыс эз и ло. Кок туй ни вир тусь. И вөр керкаас — дзим-дзурк. Ставыс места вылас. Сöмын пицальыс да вöралан паськöмыс абу. Унаөн сэк шензисны. Кыдз пö поэö тадз воштгысыны? Бордйөн али мый кытчökö лэбöма? Абу устöм-тоштöм шпыльö, верстьö мужик, пармасö горт йöрсö моз тöдö. А вот тай... И понсö мыйлакö вöрас абу босьтöма, понйыд эськö туялис. А Митипер Öньö, код юрнас лытöм кывъя морт, серавлöма: ас вöлясыс пö Гордей гуасис да дзедбсис, деревняысь, семьясыс бокö пышйис. Колökö пö, Камчаткаын нин? Код юра мужиклысь сөрöмсö, дерт, некод эз кывзы. Гозмöдысь Öньöлы весиг пель бокас таысь веськавлис. И век жö збылысь тешкодья воши Гордей, нинöм и шуны. Некутшöм пас эз коль. Павеллы сэк нель арöс вöли, зэв на ичöt... Кага. Бать чужöмсö ру пыр помнитö. Кöдзыдөн, буракö, Гордей вöлöма, этшаысь ки вылас писö босьтлöма... Код тöдас.

Нида верöс сайö сэсса эз и пет. Öти чуньөн, öти пиён, нэмсö и олис. Павел век жалитис, мый чой ни вок сылөн абу. Думнас корсюрö укöрайтлис на мамсö. Сöмын думнас. Сыысь, мый эз öтлаась Митрей дядькöд. Öти йöрын со пыр олисны, став мужик уджсö Нидалы Митрей вöчлис, а вот тай... Öтиыс бöббыль, мöдыс — дöва. Кöть эськö Гордейлысь шойсö некод эз аддзывлы. Татчöс мужикулов Нида дорö эз жö корасылыны. Код тöдас... Гашкö, Митрейысь родисны? Гашкö, мыйкö мөдтор найöс пановтлис. Öни сэсса мый, олём ваыс кывтöма...»

### **Мöд петкöдчöм**

**Керка жыр. Пызан, улöсыяс. Крöватыын куйлö Митрей дядь. Крöвать-кöд орччөн — тумбочка.**

**Жырыё пырё Павел. Зумыд воськовъясён матыстчө куйлысь Митрей дядьлань. Чужом вывсьыс шоглунсө дзебё, збодера сёрнитө. Пуксьё кровать дорын сулалысь улос вылө.**

ПАВЕЛ. Мый нө повзбодчан, Митрей дядь? Вай дугды! Анна-лөн со нор сёлөмыс потан выйын, сэтшөма повзбөма. Бабаыд баба и эм! Кувны пө зэвтчөмыд, Митрей дядь! Кувны!? Ха! Мед Митрей дядь, мися, кулас, лешак машина? Да сійө, мися, сё арөсөдз на олас, ми водзджык на пöрысьмам! Мыйкө мудритан, Митрей дядь, ок, мудритан... Мудритан вед? Ноко, нюмун! Аски мед чеччөма вөлі! А то куйлыны мода босьтөма! Сьылыштам да йөктыштам на тэкөд! Сідзи, Митрей дядь? Ноко, нюмьёвтышт, пуктөм пиньястө петкөдлы!

**Крөваттын куйлысь Митрей дядь збыльысь нюмунө. Но слабника, бытьё мырдөнырысь, бытьё пытшкөсса дой пыр.**

МИТРЕЙ ДЯДЬ. Аттьө, мый локтин... Удитин... Пуксьы... Татчө пуксьы, кровать дорышас. Китө вай... Сёрни эм...

**Павел видзчысьмөн шамыртө Митрей дядьлысь кисө. А мөдыс чөла видзөдө Павел вылө. Вушйом кельыдлөз рөма синъясөн. Видзөдө, видзөдө, бытьё бөрьяысь...**

МИТРЕЙ ДЯДЬ (*синмас видзөдө Павелы*). Тэ батыгө помнитан?

ПАВЕЛ. Ылөсас, вөтын моз...

МИТРЕЙ ДЯДЬ. Помнитан, мый ськөд лои?

ПАВЕЛ. Йөз висьгалөм серти. Вöрын тай пө вошөма... Арнас. Кыйсигас.

МИТРЕЙ ДЯДЬ (*нем виччысьтөг*). Павел, кор бипуртө öзтан, мый артмас?

ПАВЕЛ (*чуймөмөн*). Кыдзи мый? Буртор артмас, югыд артмас, шоньд артмас. Шонтысян и, пусян и, пражитчан и...

МИТРЕЙ ДЯДЬ. Ме ог сы йылысь. Бипур бөрас мый кольө?

ПАВЕЛ. Но... Сэрапом вермас кольны. Пöим...

МИТРЕЙ ДЯДЬ. Пöим... Вот-вот... Пöим... Пöим и кольө. Мыйла сідз, Павел? Мыйла олөмыс сэтшөм? Мыйла бурсө вөчан, а пöим артмө? Менам олөмөй — пöим, и мамыдлөн — сэтшөм жö пöим...

ПАВЕЛ (*гзыкөгз чуймө*). Тэ мый йылысь, Митрей дядь? И мый мамөс гаралан?

МИТРЕЙ ДЯДЬ (*сьөкыднырысь, кашгигтыр*). Вошөма, шуан, батыд... Да, вошөма... Да, Паш... Но мый йөз шуөмыд? Лытөм кывйөн сынөд таркөдөм! Мөд ног ставыс, Пашук, неуна мөд ног... Правдаыс менам кок улын, збыльыс менам юрын. Меным и ковмас правданас юксьыны. Көсья ли ог. Колө висьтасьны. Сэсся некодды. Кула да, некодды лоө. Регыд нин мем колис. Кыла. Мамыд ас дінас корө. Талун-аски муна. А öнi шуа... Некытчө эз вош батыд, некытчө эз вош Гордей! Парма-вөртө сійө карта сайсьыс бурджыка төдіс. Кувсис батыд, Павел. Виисны батыгө. Ме вии... Öзтим тай вот мамыдкөд бипурсө... Грек вөчтөг грекө вöйим... А колис сөмын пöим... И сійө öнi көдзалө... Көдзалө...

**Павел нетшыштö кисö Митрей дядь кийсь, зьвирк сувтö кок вылас. Едждöдö, сэсся гöрдöдö, чужöмыс быттö дундö. Сингьяссö дувгöдö Митрей дядь вылö.**

ПАВЕЛ. Т-т-тэ м...ый шуин? Тэ... батьöс?

МИТРЕЙ ДЯДЬ. Ме, Павел... Ме...

ПАВЕЛ. Да тэ... Тэ вежөрнад торксин? Да тэ... Абу морт! Да тэ бес, мути! Пагав, а то ачым... Уньсала!

**Ырыштчывлö Митрей дядь вылö, сэсся юрас кутчысьö, көсийö петны жырйись.**

МИТРЕЙ ДЯДЬ. Уньсав, көсьян кө... Ог тай водзсась. Ме тай висьтал-а... А öнi — мун. Сöмын этийöс босьт! (*Мыччö Павеллы бумага тубрас, кыз конверт кодь.*) Тадз колö. Бöрас лыд-дян, көсьян кө. Он кө — эн, тубрассö шыбит. Мен веськодь, ме абу нин. Ме лэба нин... Мамыд дорö... Прöщайт!

**Павел кын мыр моз сулалö, сэсся бөр пуксьö. Митрей дядь вылö видзöдö.**

ГÖЛÖС. ...Гордей да Митрей вокгьяс чужисны кык во костөн. Семьяын ыджыд вокгьяс. А сэсся сёрсьөн-бёрсьөн куим чой вольной сьветас петисны. Ставыс эськö бур... Но мыйлакö вокгьяс ас костаныс челядьдырсянь эз лöсьявны. Код тöдас, мыйла... Некор эз дорйив Гордей ичöтджык воксö. Тшöтшгьяскöд тыш-венын Митрейöс корсюрö перина моз вöли дубитасны. Веськодь синмөн Гордей вешгьяс, быттö бокöвöй морт. Көть Митрей ге-жöда косясьлис, рам сёлöма.

Мöдарö, Гордей, колö ли оз ков, быдлаö кулакнас пырлис. Öбичатöм, нинöм и шуны. И сэк Митрей варыш моз уськöдчывлис дорйисьны. Öтарсянь и мöдарсянь сылы буракодь веськавлис. Сöмын тай Гордей öтчыд аттö эз шулы, быттö сидзи и колö.

Нида... Рудов юрсиа, банийöм чужöма, раминик нывсö Митрей казялис дас көкгьямыс арöсөн нин. Быттö чардбиөн морöсас сэк лыйисны том мортлы. Олис со таöдз, унаысь рытпукгьяс дырйи воча ныр паныдасьлис Нидакöд, пöсь ни кöдзыд... Ныв — кыдзи ныв, кык кока да кык киа...

Но кыз пышгьян муслунсьыд? Узьöм ни олöм. Помтöм сёлöм дой. Вöтын лэбалöм. А вот вемöсыд — мöдджык. Полис матыст-чыны Митрей Нида дорö, полис висьтавны сылы аслас муслун йылысь. Бокисянь кыйкгьялис, любуйтчис... Сэтшöм морт, мый сэсся вöчан. Сöмын армияö мунигөн öтчыд окыштит муса нывсö, сёлöмсö вöсьгис. Нинöм эз кор, нинöм эз тшöкты Нидалы. Виччысян кө, виччысь... Надейтча...

Митрей армияö мунис, Гордей сэсь локтит. Багатыр кодь. Зу-мыд, крепыд, яр, видзчысьöй нывгьяс! Тöдлис Гордей Нида да Митрей йылысь (он дзев ичöt грездад), кылис, мыйкö на костын эм... Но буретш Нидаö шашаритчис Гордей, быттö мöд нылыс сиктын сылы абу. Ылöдлис том нылöс, крукалис, гартис, сийöс улö суйис...

Кор Митрей армиясьыд бөр гортас воис, Нида Гордейкöд гозгьяөн нин олисны. Сьöкыда олисны, колö шуны. Кань да пон моз. Быд лун гажгьялысь Гордей кодзтöм уж моз лытайтит неко-

дысь яндысьтөг боковой юбкаяс бёрся. Тшоқыда кисо лэптыліс Нида выло, пон моз таявліс-пурліс. Эз, буракө, радейт. Код юрнас коркө прөступитчис: Митрейос конйыштөм ради пө тэнө, Нида, крукыльті. Мед лёк сылы вочны, дойдны. Некор пө Митрей эз кажитчыв... Вокон ог лыдды. Абу миян рөд.

Уна синва сэк кисьтис Нида. Пидзөс вылас, синва сорон корис, мед лэдзас Гордей ас дінсьыс, ас воянас мынтөдчас. Лэдзсьома тай! Абу сэтшөм морт Гордей. Понийой, паньой, гөтырой — менам! Көзяин! И сөмын — менам! Сэсса некодлөн. Көсья — шыбита, көсья — сибөда...

Митрей, дерт, төдіс, мый вөчсьо вокыслөн семьяын. Аддзис. Армияс на гижлісны, мый Гордей да Нида нюсасьоны. Но нырсө некытчө эз сюй. Колө ли? Мый ради? Код ради?

Йоз олөм, абу тэнад. Песовтчысь гыон кывтөма ваыс, сьодыс и еджыдыс. Да и дузьяліс неуна Нида выло, мый кокниа Гордейлы сетчөма. Одьо тай Митрей вунөма. Мый сэтшөмсьыд? И век жө йирис, пыр на йирис мыйөнкө Митрейлысь сьолөмсө тайө нылыс! Велькөдыпырысь зон видзөдіс мукөд нывьяс выло, быттё вуджөрьяс выло, эз кыйкъяв, эз баръяв... Вөтъясын пыр на Нидакөд кутчысьөмөн лэбаліс. И мөдыс, буракө, та йылысь сьолөмнас кыліс жө. И коркө выльысь паныдасьны да сывйыштчылыны налы — быть... Олөмыс сэтшөм.

Аддзысьлісны. Вель унаысь. Гусьоникөн. Тэрмасьөмөн. Йозысь дзебласьөмөн. Грекыд тай — юмов, номсөддө... Оти арся субөта лунө ставыс и лоис.

Виччысис сэк Митрей Нидаос Кывтан-Катан ёль бокин, важысла пөлынтьчөм нин вөр керка дорын. Пув вотігмоз татчө Нидаыс көсийс воыны...

Одьо гартыштөм сямөд чибльөгысь Митрей ырскис кодзыдысла пинь поткөддысь сөдз васө. Вирыс ворсіс, сьолөмыс тіпкис... Локтас, локтас...

Локтіс муса аканыыс, локтіс. Сывйыштчөмөн, ичмонь гозья моз, пукалісны керка водзын Митрей да Нида. Чөв олісны... Нимкодясисны арся гежөд шондіа луныслы. Кывзісны. Кыдз сяльгис-варгис налы вильыш Кывтан-Катан ёль. Кыдз орчча кондаө азыма колскөдіс крукля нырнас сизь. Видзөдісны. Кыдз рутш мыр сайсянь на выло воча кыйкъяліс визьяорда. Быттё көсийс нерны: а, сюринныд, ичмонь гозья? А сэсса налысь му выло усысь вуджөрьяссө тупкис-вевттис нөшта өти вуджөр. Мортлөн. И сійө здукас кыліс лёк, гундырлөн кодь серам. Быттё абу мортлөн. Зьверлөн.

«Гордей...— кельдөдөм чужөмөн шөпнитіс Нида.— Тэ...»

ПАВЕЛ (*звырк чеччө*). Вии, шуан? (*Скөр синьяссө гувгөдіс Митрей гядь выlö.*)

МИТРЕЙ ДЯДЬ (*лөня*). Сідз тай артмис...

ПАВЕЛ. Кыдз?

МИТРЕЙ ДЯДЬ. Пищальысь лыи.

ПАВЕЛ. Мам дырйи?

МИТРЕЙ ДЯДЬ. Да...

ПАВЕЛ. Кытчө гуалін?

МИТРЕЙ ДЯДЬ. Сы вөсна и кори...

ПАВЕЛ (*скөрысь*). Эн жуйсы! Но! Кытчө дзебин?!

МИТРЕЙ ДЯДЬ. Кывтан-Катан усянинсö тöдан? Тöдан. Верст джын вылынджык — Уразной нима места. Сэн тай көрт турун быдмö. Кушин бокас куим сус пу, ачым садитли. Öти сус дорас нимтöм крест...

ПАВЕЛ (*горзö*). Тöда крестсö, сёысь аддзыли! Сöран тэ! Али вошласян? Сэн старöверöс коркö гуавлöмаöсь, йöзыс шуöны!

МИТРЕЙ ДЯДЬ. Мый йöзыд? Кодлы делö? Шули тай, лытöм кывъяöсь! Мед кө сьялгöны! Ме ачым крестсö пукти! И вежли нин...

ПАВЕЛ. Да тэ... Да тэ... Да тэ антикрест! Ог прöстит! Абу морт! Тэ бес, мути! Пагав, а то ачым тэнö... (*Бара ырыштчö.*)

МИТРЕЙ ДЯДЬ. Тэ öни мунан. Лэдз менö. Но этийöс босьт. (*Мырдöн мыччö сунисöн көрталöм бумага тубрас, ыджыд конверт кодь.*) Коркö лыддян. Кадыд лоас. Кулöм бöрын. А ме регыд муна. Талун ли аски. Мамыд корö.

**Павел кватитö бумага тубрассö, чепöсийö да мöдöдчö öдзöслань. Люкасö пырысь Аннакöд.**

### **Коймöд петкöдчöм**

АННА (*повзьöм чужöма*). Мый, лөк? Кулö?

ПАВЕЛ. Кулас татшöмыд! Тэнö да менö на гуö сюяс! Мути!

АННА (*шöйöвошöмөн*). Ме... мути?

ПАВЕЛ (*öвтыштчö кинас*). А-а-а! Абу тэ! Нинöм эн шу, Анна! Öни нинöм эн шу, бöрас ставыс... Вөрö ветла. Колö! Пищальöн шöйтышта. Арся сезон заводитчис, йöрысь эг на петавлы. Көть отпускын лыддысся. Эн пановт менö, Анна! Локта да сёрнитам! Муна!

АННА (*синва сорөн*). А Митрей дядь?

ПАВЕЛ (*гзыкöгз пузьö*). А мый Митрей дядь? Мый Митрей дядь? Чеччас! Сылөн нинöм оз вись! Абу первойысь! Но бурджык, мед оз чеччы! Кылан, мед оз чеччы! А то... А то лөкджык лоас!

**Павел петö. Шöйöвошöм Анна видзöдö öдзöслань, кытчö вошис Павел. Некор эз аддзыв верöссö татшöмөн. Олöмас — медводдзаысь. Та вöсна — шемöс.**

АННА (*матыстчö Митрей гядь горö*). Мый нö лоис, Митрей дядь? Мыйла Павел кырнышөн усьласьö? Вөрö мöдöдчö, дум ни вера! Тöрыт на сёрни эз вöв, и со! Сёян весиг дасьтытöм! Мый нö сыкöд лои?

МИТРЕЙ ДЯДЬ (*слабиник гөлöсөн*). Нинöм эз ло, Аннуш! Юртö эн жугöд. Колöкö, Пашкöд öта-мöдöс эг гөгөрвоий... Овлö. Мужикъяс костад. Мед мортыс вöрас ветлö, кок сөнъясыс ёнмыштасны, чöскыд сынöдсö мед апалыштö. Шпуткöмсьыс век жö киргö-а... Ме эськö ачым радпырысь муні вöрад, да... кольöма тай кадыс! Крöватысь ылö вешйыны нин ог вермы. Мед ветлö! Ачыс тöдö, мый вöчны, уска-тошка нин, абу гонтöм бая.

**Сэк кості жырйö пырö Марья тьöт, Митрей дядьлөн да Анналөн суседыс.**

## Нельод петкөдчөм

МАРЬЯ (*матыстчө крөватъын куйлысь Митрей гядьянь, аггзö улөс, пуксьö, тöждысян гөлөсөн сёрнитö*). Висьмин али мый, Митреюшко? Кывлі, нёрпалан пö. Олышт на, сё зёлөтанöй, тэ мортыслы лёксö оломад эн вöчлы! Абу тай ме кодь. Ме и то на олыштны көсья, көть куим арөсөн тэысь ыджыд. Небось, менам челядь да нукъяс виччысьöны, кор мөдарьюгыдас öдйö-джык муна. Во налы! (*Кулаксö петкөдлө*.) Аддылысны? Серала. Шуа да, аслам серамöй петö. Дышöдас кө овны, вольпасын ланьтöдча да мөдарьюгыдас муна. Ен мед видзас, сöмын не висьны! Кок йылысь не усьны. Помöдз жö мед эськө легин! Да, Митрей? И мыйла тэ менö томдырйи верöс сайö эн босьт, Митрей? Ок, эськө олим! Ме эськө тэнö аслам юбкаөн унаысь шебрöдлі!

МИТРЕЙ ДЯДЬ. Шуан жö, Марья...

МАРЬЯ. А мый? Лёка эськө олим? Эк! Тэ меным век кажитчин, сьöлөм косьтысьөн вöлін, унаысь войнас бөрді, юрлөсöй öнөдз на вазілясь!..

МИТРЕЙ ДЯДЬ. Ладе Иванкөд, мужикыдкөд, эн жö лёка ов...

МАРЬЯ. Эг эськө да. Көть винатö радейтліс, торья эз карапужитчыв, слабөг, китö ме вылө да челядь вылө эз кыпöдды. Сідзсö рам вöлі, ме Иваннад ачым нэм чөж бергөдлі, дурпоп моз. Водз тай сöмын муніс, тöдөм ни кылөм, коліс мянөс... Некутшöм яндзим абу! Эз и висьлы быттö! И вот!

МИТРЕЙ ДЯДЬ. Эн элясь. Быдмисны тай челядьыд, мортъясөн лоины. Оз вунöдны. Оз янöдны.

МАРЬЯ. Оз эськө да... Но öтнам жö тай гортын, көк моз. Кадыс, майбыр, эм, мукöддырйи мөвпгьясöй юрын жуöны! Мися, коркө ме дорö Митрей пырас да вашгьялөмөн шуас: «Вай, Марья, öтлаын овмөдчам ли мый ли, кыкнад ёна гажаджык». Ме эськө и чермуна радöйла, тэ водзын джодждöраөн уськөдча, сапөгтö чышка! Вөтасьлі весиг! Эг на öтчыд!

МИТРЕЙ ДЯДЬ. Дугды, Марья! Анна водзас көть менö эн смущайт...

МАРЬЯ (*нюмьялө*). А мый Анна? Абу тай меным сөперник, мед кывзö збыльсö. Да, Анна? (*Гөлөсыс вежсьö, шога га нора водзö сёрнитö*.) Тöда, Митрей, тöда... Ставсö тöда... Деревняд он дзеб. Нидаос нэмтö радейтлін, эн тай сійөс некод вылө веж. Гордеюшка тиянлысь оломтö жугөдіс, царство небесное, мед лёкысь оз шусьы, свят-свят... (*Юрбитö*.)

## Анна орччөн сюся кывзö, пельяссö чошкөдöма.

АННА. Марья тьöt, тэ öнi мый йылысь сёрнитан?

МИТРЕЙ ДЯДЬ (*зумыша, öлөдөмөн*). Марья...

МАРЬЯ. Мый Марья? Тэнö жалита, йöйөс! Нидаос да! Кык йöй! Гордей öбичатөм вöлі, сысь и сгинитіс, йöзыс ёнасö эз жалитны. Воши и воши. А ті! А ті! Мыйла ті эн öтлаасьöй? Мый чөртла? Коді кутіс? Мый кутіс? Олом чөжыд Нидалы отсасин, Павелос на кок вылас лэптін, ас пиос моз видзин, а орчча керкаын ачыд бөбыльөн олін! Кутшөм сиралөм вөнъ тиян

костын куйліс, мый воськовтны эн вермөй? Павел паныд сувтис? Павелыд өд... Ой, нинөм ог шу! Но забеднө. Нида вот став гусяторсө аскөдыс нуис да дзевис, и өні вот тэ нуан! Он пов? Сьөкыд грузнад рай вөрөтаад он төр, көнкө да мыйкө тасалас...

МИТРЕЙ ДЯДЬ (*заводитө кишкыны, киргыны, быттьө лолыс петө*). Мун, Марья, крестаради мун... (*Мышкөн бергөдчө, тыгала, шытөг бөргө*.)

АННА. Марья тьот, вай мун и эм! Эн задевайт мортсө, сідз нин слаб! Синваөдз со вайөдін. Он али мый аддзы? Мед узьыштас... Колөкө, кокнялас?

МАРЬЯ (*вель дыр видзөгө Митрей дягьлөн мыш вылө*). Узьыштас, шуан? Но-но... Прөшайт, Митреюшко... И прөстит... Кывъясысь. Тэ өд гөгөрвоан, мый бурысь... Эн вай дивит! Бурысь көсйи, бурысь... Эн торъясө и шогсы. Бур олөм олін, сөмын тай мукөд ради, а асьтө вунөдін. Сійөн и забеднө! Но ставөн сэн лоам. Регыд и ме. Прөщайт...

АННА (*чушкө*). Мый сэн прөщайтчан, Марья тьот? Дзевны али мый көсьян Митрей дядсьө? Вай дугды! Эн повзьөдчы!

### **Марья петө жырйысь.**

АННА (*нора, аслыс*). И кытчөкө сэн Павелыс шувгис, колігад век абу! Вөрө сылы приспичитөма! И буретш өні! А колөкө, эз на мун? (*Котөртө өдзөслань*.) Павел! Павел!

## **1 юкөнлөн пом. Занавес тупкысьө, либө би кусө.**

### **Занавес пыр на тупкыса.**

ГӨЛӨС. Павел збыльысь вөр керкаас муніс. Но эз веськыда, эз аслас ордымөд. Вөчис Кывтан-Катанлань кытш, Уразнөй местаө кокъясыс сійөс асьныс кыскисны. Пу крест дорас. Со и воис тай... Унаысь тан вөвліс, местасө зэв бура төдіс. Но мөвпыштны эз кужлы, мый тан батыс куйлө. Кыдзкө өні на эз эскыссы, некыдз эз эскыссы... «Бать...— Павел малаліс киянас зэрысь да шондысь сьөдөдөм крестсө.— Бать... Прөстит, мый геждө казтывлі. Прөстит, мый тадз... Ловтө вот босьтлөмаось, өкаяннөйяс... Час... Ме өні правдасө төда. Ставсө төда. Петкөдла на... Оз на сідз мын Митрейыд... Сёрни на виччысьө...»

Павел вежөрын, тупгюр варышгяс моз, лэбалісны мөвпгяс. Кодлы өні сійө грөзитчис? Ачыс эз төд, ылөсас... Но кодкө юрас дугдывтөг клөнгис: батысь колө водзөс босьтны. Кодлыкө таысь колө вештысьны. А вештысь Митрей! Оз на кувсы сійө, оз... Оз позь. Павеллөн сы дінө делө на эм. Помавтөм. Кор дзугөм гөрөдыс разьсяс, сэк Павелы кокнялас. А мөд ногыс некыдзи. Бөрас татчө Павел выль крест пуктас. Ниаысь, краситөмөс. Дөзбөритны кутас, видзөдны. И сус пуяссө оз лэдз пөрөдны. Но некутшөм гижөд крестас оз ло. Нинөмла бөкөвөй йөзлы Павелысь гусяторсө төдны. Нинөмла төдны, мый тан сылөн батысь куйлө. Быдсяма йөзыс тай эмось. Мыш саяд на кутасны кодсюрө чуньнад петкөдлыны, став рөдтө няйтөсьтны. Нинөмла... Мый лоөма, лөбма. Он нин бергөд. Мам памятьсө дойдны да лякөсьтны Павел оз жө көсйи. Сьөлөмнас кылө: мамыслөн мы-

жыс ичот. А вот Митрей дядь... Видзчысь... Регод локта. Он на кув... Татшомъясыд дыр олоны, сьокыда кулоны. Мучитчан на... И мед. Мучитчышт.

...Кык лун Павел лытайтис вoryн. Керка матигогорсо лэчкалис, кытөнсюро вильмодчис. Сидз на шойтыштис вoras, пищальон гоз-мод сьод тар удайтчис босьтны. Тэрмасыны сылы некытчo. Отпускын тай. Олыштас на, юрсo пальодыштас, сьокыд думьяс-сo разодыштас.

...Керка дорo матыстчигон ылсянь на кылис тшын дук. Пармаад ветлысыд нырися, пон кодь. Кодко бипурасьoма буракo, керкадорса кыр йылас, ывлаас, Павеллон бипур местаo. Сидзи и эм. Павел аддзис би дорын мошкоритчысьoс. Сюся видзoдiс ёсь синъясон. Тодмалiс: Илля, воча вокыс (Иллялон да Павеллон мамьясыс — чойяс). Чуймискодь: мый Иллялы ковмома? Мыччысьны али бoр вoras пырны? Петис. Дзевсясьтог восьлалис, трачкoмон, матыстчис, чолoмасис.

## МОД ЮКОН

### Медводдза петкодчoм

**Действиеыс вoryн, вoр керка дорын. Керкаыс оз тыдав. Некумын пу. Бипур. Илля. Матыстчo Павел.**

ПАВЕЛ. Чолoм, Илля! Вошин али мый?

ИЛЛЯ. Тэ тай, буракo, вошoмьд! Корсыны лоo?

ПАВЕЛ. Мый морысь?

ИЛЛЯ. Аннаыд модoдiс, Митрей дядьoс дзевны корис.

ПАВЕЛ. Кувсис?

ИЛЛЯ. Да...

**Сьокыда ышловзьoмон Павел лажыньтчo бипур дорo. Недыр чoв оло.**

ПАВЕЛ. Тэ менo эн аддзывлы!

ИЛЛЯ. Мый? Тэ oни мый шуин?

ПАВЕЛ (*чуньнас Иллялы*). Тэ! Менo! Эн! Аддзывлы! Гoгoр-воан?

ИЛЛЯ (*чуймoмон*). Кыдз?

ПАВЕЛ. А сидз. Ме тан oни абу, ме ыли керкаын, а сийoс тэ он тод, некор на эн волы. Сидзкo, эн и аддзыв менo! (*Нор гoлo-сон.*) Илля, но тадз колo... Ме коркo модысь тэд ставсo висьтала, и сэк менo гoгoрвоан... Но тадз колo, Илля! Кристарadiон шуа! Вывтi ёна колo! Меным колo! Илля!

ИЛЛЯ (*пыр на чуймалo*). Но ладнo либo, ачыл тодан, ачыл ыджыд да паськыд... Но вот Митрей дядь... Гуавны жo морт моз колo. И Аннаыд бара жo ыстис...

ПАВЕЛ (*голoссo кыпogo*). А мый коть и Анна!? Метoг гуасыны некодлы?! Оломыс сувтас? Бур йoзыс деревняын бырысны? Илля, вай бур сьoлoмон отсышт Анналы гуасынысo! Ми тэкoд — рoдня, эн вунoд! Бурoн помнитны кута, тэ тодан, ме буртo помниты. Лун-мoд мысти гортo локта, и пыр жo гу вылас вола. А oни ог вермы. Ог на вермы... Тэ менo гoгoрво. Нинoм эн юась, Илля! Ог вермы — и пом! Ме oни сьoд вoryн, пармаын, ме нинoм

эг кывлы, ог төд! Ме абу, Илля! Илля, тэ менам воча вок, и тэ эн сорит менө, эн висьтав, мый аддзылін. Нурьясьышт да лэччы гортад, пемыдөдзыс удитан на, ассым пөнарөс сета. Гоз-мөд тар керка пөварняас эм да, Анналы ну, мед гуасигас көть шыд пуас. Шуан, мый ачыд лыйин! Вай мун, Илля!

ИЛЛЯ (*өвтыштө кинас*). А... Кыдз төдан... Вөрын кө и — вөрын... Тэнад делө. Мый ог төд, нырөс ог суй. И тэтөг Митрей дядьтө гуалам, прамөй морттө поэю, майбыр, бөрьяысь кольбодны. Но, муні либө!

ПАВЕЛ. Аттьө, Илля! Ме тэныд эска. Некодды эн висьтав... Нинөм он төд... Регыд локта...

**...Эбөстөг, лигышпырысь, ружтигыр Павел пуксьө бипур дорас, тіралан киясөн питшөгсьыс перйө Митрей дядь киясь босьтөм бумага губрас. Разьө. Сэн кык письмө: өтигыс — мамысьянь, мөдыс — Митрей дядьсьянь, и нөшта — сберкнижка. Павел осьтө өти письмөсө. Воськалө — Митрей дядьлөн.**

МИТРЕЙ ДЯДЬЛӨН ГӨЛӨС. «Чолөм, Павел. Лыддян кө письмөсө, сідзкө, ме мөдарьюгыдын нин. Мый гижис мамыд, ог төд. Мода абу йөз гусяторйө пырны. Сберкнижкаыс менам. Предьявитель вылө. Босьт, эн аснырась, семьятө вердны колө. Тэ меным пи кодь век вөлін, төдан. И мамыд... Радейтлі ме сійөс, мый сэсся вөчан, нэм чөж радейтлі. А Гордей кузя... Вок эськө меным. Но вот мамтө өбижайтліс, морт туйө эз пуктыв. Пытшкөс ловнас кыліс, мый мамыд да ме костын мыйкө эм. А Кывтан-Катанад... Лунөн водз Гордей кайис Съод ю дорө, вөр керкаас, мамыд сөян сылы лөсьөдіс, кольбөдіс йөр сайөдзыс. Но абу тай со кайөма, ылөддөма, кыйөдчөма. Пищальөн Гордей миян вылө петіс. Но ме эг вий сійөс, Павлуш, ловсө эг босьт. Ме рам, и морт вылад кийө некор оз лыб. Гордей абу ме кодь. Сійө ярскөб. Менө да мамтө лыйны көсйис...»

## КОЙМӨД ЮКӨН

### Медводдза петкөдчөм

Павел (неуна бокинджык) письмөсө вомгорулас лыддьө и аслас синнас быттьө аддзө, мый бать костас да Митрей дядь костас важөн лоис. Сулалөны воча: пищалья Гордей, сы водзын Митрей (сайөдө Нидаөс) да Нида (киас — көрзина).

ГОРДЕЙ (*гыргмөм синьяса, скөрсьыс-скөр, чургөдөма пищальсө. Митрейлы*). Вешйы Нида дорсьыс, а то гырнад пежалан сійөс! Первой тэнө чергөда, сэсся этійө омөль бабасө!

**Митрей вешйыштө, сувтө Гордейлы паныд.**

МИТРЕЙ. Лый!

ГОРДЕЙ (*лөкысь, зьвер моз сералө, быттьө йөймөма*). Век төді, мый ті гусьоникөн мошкоритчанныд. Нарошнө томдырйи тэнсьыд Нидасө мырди, мед крукыштны, мед дойдны. Мед төдөмөн лөк вөчны. Вокөн тэнө эг лыддьывлы, тэ абу миян рөдысь, тэ мөд пөлөс, тэ — нямөд. Армияө мунөм бөрад и сюркнялі

этийо бабасо. Ниномон оз торъяв мукодсыс, кык лун мысти юбкасо лэптис. И некор сийос эг радейтлы, век мустом воли. Кыдз думышта, мый тэкод водзын сывъясьлис да окасьлис... Вийны окота. А ме вот ачым бабаяссыд некор эг орлы, отаро вотлысисны. Нида тодо. Сэтшом жо нямод, кыв эз шулы. Они кыкнанныго чергода, но, скормодинныд да, медводз — Нидаос. Ха-Ха! Вовлом готырос. Картечыс тай стволын.

**Гордей метитчо Нидалань, косий лыйны. Но оз удит. Митрей чеччышто сы выло, пицаль стволсо удито боклань вештыны, кыкнанныс шмуткысьоны муо, ошгяс моз мурзоны. И кызко нем виччысьтог пицаль лыйо. Картеч веськало Гордейлы бокас. Мортыс кирго, регыдон и кувсьо. А Митрей сывъяло Гордейос, бордо... Нида садьтог муас усьо...**

МИТРЕЙЛОН ГОЛОС (*кыло динамиксянь*). «...Чеччышти Гордей выло, тушаон, юрон, кион-кокон... Сийо пицальсо кисыс эз лэдз, шмуткысис муас, тупыльтчис, да и проступитчис. Пицальыд ачыс лыйис и Гордейлысь боксо розьодис. Регыдон и кувсис, पोшти нином шуны эз удит. Сомын киргыштит неуна. А мамыд садсо воштит. Пырти сийос кияс вылын Кывтан-Катан керкаас, нар вылас водтоди да шеброди. А сэсса ачым Гордейос Уразнояд катоди да сэни и гуали. Вот тадз. Они тэ ставсо тодан. Мамыдлы кыв сетли, мый некодлы та йылысь ог висьтав. Ачыс ена корис. Тэныд висьтали. Коть кутшом съокыд, но збыльсо тэд тодны колло. Верман ко, простит. Он ко, эн. Мен Нидатог дыш овны, сийон и модарьюгыдас лосьодча. Енасо некыт оз вись, сидзи куса, ас косийомон. Вылиас, гашко, мамыдкод и адзысьлам на. Но одвако... А тэ сэтчо эн тэрмась, Анна да челядь йывсьыд думайт...»

**Бара оийо би, либо занавес воссьо. Воддза кодь жо петкодчомыс, сомын Павел бара отнас (Гордей да Нида абуось нин). Павел они восьто мамылысь письмосо. Вомгорулас лыддьо.**

НИДАЛОН ГОЛОС. «Павлуш, тая мамыд. Письмосо тэныд Митрей менам кулом бороны сетас. Ыджыд грек менам тэ водзын, пиук. Съокыд думгясон модарьюгыдас муна. Но быть шу. Павлуш, батыд тэнад абу Гордей, батыд тэнад — Митрей. Мыйон верман, отсышт сылы порысьладорыс. Олыштас на мед, а то радлунсо да шудлунсо прамоя эз тодлы. Став вынсо сетис мортыс миян семья выло. Ме понда да тэ понда тай и олис. А Гордей менсьым оломос лязодис, няит гуранын туплялис, ветьок пыдди видзис, кокгяссос чышкалис. Митрейлысь мырддис. А Митрейос ме, они чайта да, радейтли жо... Сомын йой моз армиясьыс эг виччысь, торья кыв эг сетлы да. Борас тай отлаын эг жо лоий-а... Тан ме мыжаыс, пиук. Сеысь пидзос вылас Митрейыд сулавлис, верос сайо корис, но эг тай вермы. Мыйко вот кутис. А Гордейыд збыльысь ворын вошис. Енмыслы, бурако, тадз ковмома. Кувтодзыс коть отчид шу жо Митрейос батыон. Мед нимкодысьо. Абу лек морт сийо, да вот шудтом. Проща кора, пиук. Простит, мый тадз артмис ставыс. Простит, мый ас кадэ эг висьтав. Эг тай вермы, солөмой эз лэпты. Бура олой. Ме вылисянь отсасыны кута. Модарьюгыдыс эм, верит. Прощайт, Павлуш, прощайтой, Анна да челядь. Тэнад мамыд, Нида».

**...Бара бөрдө Павел. Өтнас. Пыдөстөм синва войтъясыс көтөдөны ма-мыслысь письмөсө.**

ПАВЕЛ. Мыйся олөм! Кымын гусятор морт олөмад! Он тай төд... Пөйм, пөйм... Правильнө шуин, Митрей дядь, правильнө, бать... Но нинөмысь тэд каитчыны, мамук, нинөмысь ме водзын прөща корны! Прөстит и Митрей дядь, бать, прөстит, мый вециг гуавнытө эг лок... Аслым некор ог прөстит! Ыръянитысь чуман юра өш ме! Мыйла водзджык збыльсө эн висьтав, бать, мыйла? Мыйла кувтөдзыд дзебин? Өкаяннөй морт ме, өкаяннөй... Мыжа ме. Йөй ме, олөмсө эг и гөгөрво. Пөйм...

**Павел шога пукалө му вылас, юрас кутчысьома.**

**Кусө би, либө тупкысьө занавес.**

ГӨЛӨС. Бөрд, Павел, бөрд! Но унатор тэ и өні на он төд, Павел. И он нин төдмав некор. Збыльсө висьталысьыс тай эз коль. А правда-матушкаыс вөлі татшөм. Кор Гордей чургөдіс Митрей вылө пищальсө, Нида бадь кор моз ляскысис радейтана морт дорас, топөдчис, зэвтчис... И өти здукөн вежсис! Көні сійө Нидаыс, коді здук сайын на полөмысла тірис? Гордей водзын сулаліс вылын юра, ассьыс дон төдысь морт.

**Бара өйө би либө вөсьө занавес. Бара сулалөны воча ныр пицаля Гордей да Нида Митрейкөд. Но Нида — мөд морт нин, абу воддза кодыс полысь да нэр.**

**Мөд петкөдчөм**

НИДА (*Горгейлы*). Лый! Изьверг, лый! Сөмын медводз — меным, сэсся — Митрейлы! И ог пов ме тэысь, злөдейысь! Дугді повнысө, полөмыслөн сөптыс потіс. Олөмөс пузувтін, ловъя юрөн мынтөмтор! Изін тай, вартін тай... Кань варыш моз кокалін. Митрейысь торйөдін, мырддин! А ме сійөс радейтлі, ог дзеб. Сөысь йөй, мый армиясьыс эг виччысь! Өтлаын ськөд мөдарьягыдас и мунам, тэнад ки помысь. Шудаөн. А тэ кольччы му вылас сьөд ловнад, ов аслад вожа юбкаясыдкөд, юмов бабаясыдкөд! Но эн радлы. Тэнад став мучитчөмыс водзын на! Ме век төдлі, кодъяскөд нюсасин. Дзебсьытөг олін, повтөг. Менө морт туйө эн пуктыв. Быттьө ме вуджөр, быттьө ме орт. А өні лый! Али кийд тіралө? Али кыв вылад сөмын петук кодь? Да тэ ачыд баба!

ГОРДЕЙ (*лөкысь*). Ха-ха! Кывъя немөйлөн, буракө, кыв воссис? Сюсьмин өні, Митрей дырйи? Но-но... Кийө оз тірав, кыкнаннытө тан чергөда. А сэсся гуала. Свидетель абу, вөр-ваыс чөв олас, пармаыс дзебас. Тэ ачыд первой зьмейыс! Менө укө-райтан, а мужик дырйи мөдкөд милуйтчан? Уньсала! Кыкнаннытө. Или ме, или ті... Өтлаын олөмас ог төрөй. Вөрас и сисьманнды, усьөм колодаяс моз... а ме пикөд, Павелкөд, водзө на ола! И шудаөсь на лоам. Оз ков менам пины татшөм урөс мамыд!

НИДА (*повтөг сералө*). Тэнад пины? Тэнад пины? Тэ абу тыр сюсь, Гордей! Муслунтөгыд челядыд оз чужны, Гордей!

Тэ некор эн гөгөрволы тайос. И некутшом пи тэнад абу! Эз вөвлы!

ГОРДЕЙ (*чуймыштөмөн*). Но? Павелыд нө сынөдсьыс усис?

НИДА. Эз сынөдсьыс! Сылөн бать эм. Настоящой! Прамой! Сійө өні мекөд орччөн сулалө!

ГОРДЕЙ (*едждөгыштө, но гөгөрвоо, мый тайо збыль*). Э-э-э... Дзыкөдз йөймин, баба, буракө дурмин... Вежөрыд торксис, сө-ран... А сідзи кө... Но и мед! Кодлы кутшом делө? Пашка та йылысь оз төд. Бокөвөйыдлы делө абу мянөдз. А тэ, зьмей, сэсса он нин тайос некодлы висьтав. И Митрейыд вомсө тупкас жө. Да оз и кывзы сійө тэнө, оз видзөд... Да, Митрей?

**Буретш тайо здукас Митрей «ловгөннас» гөгөрвоо: Гордейыд льяс. Өні жө. Нюжмасьтөг. Бергөдө топөдчөм Нидаос, тупкө, мышнас вевтьө Гордейысь. Небыда мынтөдчө Нидаысь. Бергөдчө.**

МИТРЕЙ. Энлы, Гордей! Эн кывзы Нидасө, скөрийывсьыс сійө! Сөрө!

ГОРДЕЙ (*ош моз равзө*). Ог кывзы? Ог кывзы!? Час... (*Кыпөдө пищальсө*).

МИТРЕЙ (*ош моз жө воча*). Сувт! Бабакөд воуйтан? Тэ вай меным лый! Веськыда сьөлөмө! Давай! Али кыд тіралө? Сідзкө, збыль ачыд баба! Давай! Но!!!

**И... чечыштө Гордейлань. Озджык во. Митрейлөн ырыштчөмысь Гордей төдлытөг воськовтө бөрлань да нем виччысьтөг крукасьө мыш саяс сулалысь, важысла ротшялөм мырйө. Усигмозыс пищальыс лыйө. Кытчөкө тупылытчө Гордей, өти здук кежлө вошлө-саявлө. Митрей — котөрөн сы бөрся. Оз удит. Бара кылө лыйөм шы. Гордей — лыйсьө.**

**Ачыс. Аслыс. И йирмөг босьтө Кывтан-Катан ёльөс...**

**Гордей кысьсө. Ас садяс на. Но сьөкыда нин лолалө, ымзө. Уськөдчө сылань Митрей, топөдө морөс бердас. Ранитчөм көин моз көнкө ом-лялө Нида.**

МИТРЕЙ. Тэ мый, тэ мый вөчин?.. Вокан... (*Синва сорөн*.) Энлы, часлы... Час, час... Нинөмтор. Ранатө ме көртала, эн шог-сьы, Нида отсалас... Бурдан, ловзян... Гордей, кылан? Синтө эн тупкы! Мыйкө шу! Сёрнит!

ГОРДЕЙ (*киргөмөн*). Митрей, вокан... Лои... Кыдз лои... Колө... Абу жаль... Нинөм абу жаль... Эн жалит менө... Эн жалитөй... Уна лөк вөчи олөмас. Гөгөрвоа... Вөрас гуав, Уразнойын... Места-ыс мен кажитчө... Йөзыслы шуөй, вөрө воши... Кыскавны кутасны... Милиция... Нинөмла... Эн йөзөд... Нидатө видз... Пиөс видз... Питө... Кыв сет... Прөстит... Прөщайт...

МИТРЕЙ (*морөс бердас жмитө Гордейөс, синва сорөн*). Но, но... Тэ уна эн сёрнит, эн майшась... Бурдан... Отсалам... А Нидатө эн кывзы. Тэнад Павелыс, тэнад...

ГОРДЕЙ (*бөръя кывъяс*). Тэнад, Митрей, тэнад... Төда... Видз...

МИТРЕЙ (*гораа*). Нида!!!

**Кор полігырйи матыстчө Нида, Гордейлөн лолыс петө нин. Кынмөм, сувтөм синъясөн сійө веськодя видзөдө арся енэж вылас, колөкө, корсьө рудовлөз енэжсьыс мөдарьюгыдө пыран туйсө. Лимзалөмөн пидзөс вылас уськөдчө Нида.**

НИДА. Гордей!!! Гордеюшко!!! (*Пуксьö. Гудыр синьясöн ви-ззöдö Митрей вылö.*) Ачыс лыйсис?

**Мöдыс чöв олö. Пыр на топöдöмөн кутö ассьыс воксö. Мыйкö шöпкö...  
Сэсся лöня юалö.**

МИТРЕЙ. Öнтайтö збыль шуин?

**Öни Нида нин чöв олö. Нинöм оз вочавидз. Кыв ни джын. Сийö быг-тьö оз кыв Митрейлысь юалöмсö. Видзöдö, видзöдö Гордейлөн сермунöм чужöм вылö. Кöсйö, буракö, бөръяысь паметяс суйны, мед помнитны...**

МИТРЕЙ. Гордей корис Уразнойын асьсö гуавны. Бөръя кыв-йыс. Мый шуан? Колö эськö гортö лэччöдны да... Морт моз... Но йöзасьöмысь Гордей полис. Мед пö некод эз тöдлы. Мед пö чайтöны, мый вöрын воши...

НИДА (*лöня*). Кыдз кöсьян... Шуис кö, и — шуис... (*Сэсся заводитö члзыны.*) Но мыйла тадз, Митрей? Мыйла тадз Гордейыс вöчис? Сийö öни нэм кежлö миянöс торйöдис!?! Тэ гөгөрвоан? Тэ гөгөрвоан? Ог лöйй öтлаын... Ог вермöй... Пöим артмис, Митреюшко, пöим... Мен лёк... (*Усьö, воштö сарьсö*).

## НЁЛЬÖД ЮКÖН

### Медводдза петкöдчöм

**Сиктса шойна. Митрей дядьлөн крест. Юрсö öшöдöмөн пукалö Павел. Бара синва петö.**

ГÖЛÖС. «Мыйкö тшöкыда бөръя кадö бöрдö Павел! Мыйкö дзикöдз нормис... Вот и öни бара на синваыс петис Митрей дядьыслөн гу вылын. Батыслөн гу вылын. Дзик öтнас тан мортыс. Некод тай оз мешайтчы, оз гартлась».

ПАВЕЛ. Прöстит менö, öкаяннöйс...

### Мöд петкöдчöм

**Лöня матыстчö Анна. Орччөн пуксьö, сывйыштö Павелöс.**

АННА. Эн жö сэтшöма жуйсы, Паша... Сьölöмтö дзикöдз эн уськöд, сувтас, сідзи давленньöйд чеччалö... Миян йылысь думайт жö... А кодкöд ми колям, лоан кö мыйкö? Гөгөрвоа: эн удит Митрей дядьöс дзевны. Но мöдарсянь... Мый сэсся вöчан, вөрö кö веськалин? Дзевим тай со, бур йöз отсөгөн, лючки-бура, кыдзи колö... яндысьны нинöмысь. Мамыдкöд орччөн... Куйлöны. Öтлаын и старайтам гуяссö. Му вылас орччөн и олісны, рöдня кодь тэныд шонъян Митрей дядь... Эн шогсы, сьölöмтö эн жугöд! Синьясыд тай пыкталöмаöсь нин бöрдöмыдла...

ПАВЕЛ. Ок, Аннуш... Тöдін кö тэ сийöс, мый ме тöда... Тöдін кö эськö...

АННА. А мый унатор тöдны? Мый колö — тöдышта жö... Весиг сийöс, мый тэ абу Гордейлөн пи, а Митрей дядьлөн...

ПАВЕЛ (*шай-паймунö, весиг быттьö йötкыштö Аннаöс*). Кыдз? Тэ тöдан? Тэ тöдін? И эн висьтав? Да тэ...

АННА (*жугыля*). Гуасигөн өти морт шөпнитіс. И некодлы эз тшөкты висьтавыны, сөмын тэныд өтнады, вөрысь локтөм бөрад. Но, видзөда да, и тэ кытыськө төдан жө...

ПАВЕЛ. Төдмалі тай...

АННА. Отиторйысь отарө чуймала: мыйла батыд вошөм бөрын... Ой, Гордей вошөм бөрын... Мыйла Митрей дядьыд да мамыд эз отлаасьны? Нэмсө тай орччөн олісны, а — торйөн? Мыйла? Ог гөгөрво!

ПАВЕЛ. Отнам ме гөгөрвоа. Бура гөгөрвоа... Уразной... Гордей... Поим...

АННА. И меным он висьтав?

ПАВЕЛ. Ог, Анна... Эн юась... Мед кольө, кызд кольө... Поим... Поим артмис... Поим вөчисны! Али сэрапом? Мыйла тадз, Анна? Мыйла тадз, мамук? Мыйла тадз, батый?

### Коймөд петкөдчөм

**Кысянькө лөня матыстчө Наста пөч, сувтө орччөн, сөрни панө.**

НАСТА. Бать и эм, бать, Пашук! Батыөн и шу. Век тиянкөд орччөн Митрейыд вөлі, мамыды отсасис, но Нидалы верөсөн эз ло. Мамыдкөд ми важысянь пөдругаяс, кымынысь шулі: пет верөс сайө Митрей саяс, аддзан, кызд мортыс страдайтө? Кувтөдзыс сылөн синъясын кутшөмкө дой оліс! Дзик позис петны. Коліс весиг! Көть тэ ради коліс! Тэ ради, пи ради!

ПАВЕЛ (*зумыштчөмөн*). И тэ төдан, мый ме абу Гордейлөн? Анналы, колөкө, тэ жө висьталін? Код тшөктіс? Мыйла ныртө сюян, кытчө оз ков?

НАСТА (*ышлолалө*). Ок-ок-ок... Ыджыдтор тай! Гусятор жө, небось! Аслад чужөм вылад рөмпөштанө видзөдды! Ляскөма Митрей! А вот Гордейлөн нинөм абу. Сійө смоль юрсиа вөлі, чиган кодь, а тэ нөк юраөн быдмин, русөйөн колин. Зато Митрейлөн юрсиыс еджгов... Гордей крукыль ныра вөлі, Митрей — чангыля. Ачыд некор эн думыштчыв?

ПАВЕЛ (*шемөса*). И-и-и... Унаөн та йылысь төдөны?

НАСТА. А код төдас? Кодкө казялө, кодкө оз... Но бөкөвөйлы нө кутшөм делө? Прамөй мортыд чөв олас. Но Гордейлы век жө вөлі шөпнитөмаөсь... Ылөссө төдіс. Сійөн и бөрья кадас дзикөдз йөймис, этшсө воштыліс! Збыльысь эскис али эз — кысь төдан? Морт юр вемад он пыр.

ПАВЕЛ (*скөра*). Эн ачыд сылы шөпнит?

НАСТА. А мыйла мен Гордейкөд, яранкөд, шөпкөдчыны? Шулі жө нин: Нида менам пөдругаөн вөлі. Коркө сійөс өти пельөсө зэвті да ачыс и висьтасис. Кывийс пышйис. Но и мен ковмис Нида водзын кыв жө сетны, мый водзө ог больөдчы... Некодлы сэссия эг шулы, пернапас чөвта, сөмын гуасигөн Анналы. А вот тэ ачыд кысь төдмалін, Павел?

ПАВЕЛ (*өвтыштө кинас*). А-а-а... Төда тай вот! Бөрья здукас жө төдмалі. Эг Аннасянь. А вот мыйла водзын мен тайөс эн висьтав, Наста пөчө?

НАСТА. Шуи жө: мамыды кыв сетлі...

**Павел, Анна да Наста пөч дөрө петөны став ворсысьыс.**

---

ПАВЕЛ. Кыв... Да, кывтö кутны колö... Сöмын мыйла öнi, мыйла татшöм сёрөн? Мыйся олөм... Пöим... Наста пöч, а мыйла, бипуртö öзтан да, сöмын сэрапом да пöим артмö?

НАСТА. Пöим, шуан? Тэ, Павлуш, сэрапом пöимкöд эн öтлав. Олөмыд — би, и мед сотчö гажаа, вильыша, ярьюгыда. Помöдз. Сэрапомыд — ковтöмтор, коляс, шыбитанатор. А пöим... Дзик мöдтор! Мыйла тыла вылын водзын бипуръяс öзтылисны да мыръяс сотлины? А вот буретш пöим вöсна! Мед мусö вынсьöдны. Мед сэсса нянь босътны! Сидз жö и олөмад... Эн думайт та йылысь! Тэ бөрдышт на, Павел, бөрдышт... Кокньöдас!

ГÖЛÖС. Шойна вылын сулалысь сись кодъ веськыд пожöм лапъяс костсянь кык морт бөрся сюся видзöдiс пöрысь рака. Виччысис. Аслас ичöтик юр вемнас тöдiс: бара на талун сылы мойвиис. И бара на сылы номсöдлантор вом улас сюрыштас. Эз прöста татчö лок этийö мужичöйыс, эз... Со тай, сумка тыр сёян-юан лэпталiс. И мен мыйсюрö чуктыштас, ставсö öд оз жö сёй? Важөн нин казялöма: татчö мортыс оз нуръясьöм ради лок, мыйкö мöдтор тай сийöс кыскö... И гу вывсьыс бөр сёянсö аскöдыс оз нуны...

Кокниа олöны этийö кык кокаясы, век пötöсь.

Но öтитор чуймöдö: мыйысь найö быд пöрийö гу вылас лимзалöны-бöрдöны? Мый жалитöны, кодöс жалитöны? Помасис кö олөмыд, эн жалит... Радуйтчы. Быд здук майшасьны, кынöмпöt корсьны, майбыр, оз нин ков. Нинöм сэсса оз ков. Тешкодьöсь йöзыс, тешкодьöсь. Он гөгөрво найöс. Миян, лэбачьяслөн, да и мукöд пемöсьяслөн, мöд пөлөс олөм-вылөм. Гөгөрвоана, ясыд... Вөр-ва ног. А этияс... Но гу дiнад мед тшöкыдджыка волöны! Кötь быд лун! Ме со пöрысьми, бордъяс слабитiсны, ылö лэбавны водза моз ог нин вермы. Олөм помöй тыдалö жö нин. Но ловъя на! А ловъя кö, кокась! Быть... А этайö выльысь лэптöм гу мылькйыс менам. Öтнамлөн. Кöзьяиныс — ме. И катша-ракаöс татчö ог лэдз. Ог тай ме ыршась эсийö неважөн на жö лэптöм мыльк вылас! Менам чойöй сэн ыджыдалö, и мед ыджыдалас, пöрысьмис жö... А тайö мылькйыс менам. И ковмас ёртасьны этийö мортыскöд, кодi гусö дöзьöритö. Эн вунöд татчö ордымтö, бур морт. И ме йылысь эн жö вунöд. И тэныд и меным тайö гуыс колö, ме серти кö. А тэ серти кö... Код тöдас? Мыйла тэ бөрдан, кык кокай? Нинöм тэ олөмас он гөгөрво... Нинöм тi он гөгөрвоий, кык кокаяс... Кар-р-р! Кар-р-р!

**Динамиксянь кылö «Пöим» сьыланкыв. Ворсысьяс сувтöны залын видзöдысьяслы паныд. Бöрас копыртчöны.**

П О М .



## Дозмөр

ВИСЬ Т

Ёгор талун бара карё мөдөдчис. Машина вылас сөвтис өшиньяс: Ёгор ачыс вөчаліс өшиньяссө да катліс карё, а воча вокыс — Иваныс — вузавліс.

Вый сывдан лун пуксьё. Язель регыд воас, сэсянь туйыс шыльыд. Друг Ёгор казяліс: туй бокас мыйкө тырыс сьод шөтөма. Кутіс матыстчыны: дозмөр чукөр. Повзисны машинасыс да турк-тарк кыпөдчисны. А өти эз вөрланыс лэб, а мыйлакө веськыда машинаас и — кам!— өшиньясад зурасис. Ёгор сувтө-діс машинасө, петіс. Шонді вылын лөсталысь рамаыс вөлі вирөсь, дозмөрыс кулөма. Ёгор небыда босьтіс дозмөрсө, туй бокас ютор вөлі визувтө, да сэтчө, ва дорас, пуктіс.

«Ой, лёк водзын тайө»,— юрас вирдыштис. И казтыліс, кыдзи коркө, өтчыдысь олөмас, сөйліс дозмөр яй.

Дзоля на сэк вөлі, ар даса. Ыджыдджык вокыс, Ольөксан, связисталө вөлі. Семуковсянь кутас локны гортас, мыш саяс — крукъяс. Котш шорө воигөн видзөдө: туй бокас чукчи пукалө — ыджыд, сьод. Мый вөчны? Матын нин, а оз вөрзөдчы. Ольөксан босьтіс дай крукнад сылы лыйыштис. И өд веськаліс! Чукчыыд жмот пөрис. Вот радыд! Вайис кыйөмторсө гортас. Пуисны ыджыдсыс-ыджыд чугунын, меж мыңда яйыс! А чөскы-ы-ыд! Татшөмсө Ёгор некор на эз видлы. Рытнас локтісны пукавны бабъяс. Ольөксан ошйысьыштис, кыдзи пищальтөг чукчисө кы-йис.

— Ой, Ольөксан, ой, эн сөй тайөс, пиө! Эн!

— Мыйла нө ог сөй?

— Ачыс кө пөткаыд киад локтө — лёк водзын.

— Мойдчаннды, бабъяс!

А төлысь мысти Ольөксантө виисны. Микуньын, бандитъяс. Тайөс казтылөмөн Ёгор эз и казяв, кыдз карё воис. Сувтіс Иван керка дорө. Воча вокыс виччысьөма нин.

— Мый нө өшиньыд няйт?

— Дозмөр люкасис.

---

— Да-а? Вайин?  
— Мый?  
— Дозмөрсө но?  
— Эг. Лёк водзын сійө.  
— Сө-ө-р! Кутшөм лёк водзын? Быдсямаас эскан. Йөзыс корсьоны да оз аддыны, а тэн ачыс киад пырө да он босыт. Ылө колин?

— Да. Ылө.

— Вот лешакыд! Матын кө вөлі, эськө ветлі да вайи!

Иван ёрччыштис да лунтыр на казытыліс Ёгорлы йөйталөм йывсьыс. Вокъяс выльысь өшиньяссө мыськалісны, нуисны да сувтөдісны, сэсся мөдлаө на ветлісны, мурталісны, рытнас Ёгор Пальөдз на шутөвтліс, сэні пө колөны жө өшиньясыс да.

Дас өтиөд час катовтчис, кор Ёгор кежис Көжмудор туй вылас. Мудзвывсьыд да шоныдад и вугыртсис сылөн. Друг кылө: Микуньын поезд бытгө матыстчө — у-у-у! — брунгө. Ёгор дрөгнитис, садьмис. Дзик нин матын, муртса вылысас КАМАЗ оз кай, но пескыльтис жө рульсө, удитис кежны. КАМАЗ-сьыс дядьө чеччыштис, лёкгоршөн пинясьө:

— Тэ мый, сөтана, йөймин али мый? Али унмовсин сэн?

— Унмовссьөма!

Дядьөыс небыдджыка нин шуис:

— Оз позь тадз ветлөддыны! Узьышт да водзө нин мун!

— Но.

КАМАЗ-ыс бөрынтчыліс, газнитис да мунис. Ёгор колис өтнас. Воча визяс нин кежсьөма сылөн, туйбокса бадьясыс ньөрьялөмаось машинасө. «Колө мыссьыштны», — шуис Ёгор. Лэччис туйсяньыс, матыстчис ю дорас.

Сэні куйліс өнтая дозмөрыс.



## Миш Тиналӧн пасйӧдьяс

*Миш Тина — менам, Митрей Мишлӧн, воча чой — сетліс меным тайӧ пасйӧдьяса ассьыс тетрадьсӧ да шуис: гашкӧ пӧ, згӧдитчас кутиӧмкӧ газетын йӧзӧдӧм вылӧ.*

\* \* \*

Войнаӧдзыс на ми олім унаӧн, ӧти керкаын, эгӧ чуймылӧй, мый дзескыд. Ставнас вӧлім дас куим морт: миян семья сизимӧн да ыджыд батылӧн квайтӧн, бать-мамӧс гортас кыскывлӧма да. Ӗкмыс челядь да нель гырысь. Верстьӧйд уджавны мунасны, а ми горт олам, кага видзам, джодж чышкам (мыскынысӧ эгӧ лысьтӧй, ыджыд мам вӧлі видчӧ да, джоджсӧ пӧ чусмӧданыд), тасьті-пань мыскам, ворсам. Дзолясянь миянӧс уджад велӧдлісны.

Бать-мамным ӧна зильӧсь вӧліны. Батьным турун примитліс колхозьяслысь. Турунсӧ нулісны «Упитлаглы», кыдзи висьтавліс бать. Дерт, мый сійӧ «Упитлагыс», ме ог тӧд вӧлі. Рытнас и войнас бать гижасьліс лампа би улын. Удж вывсьыд воліс сёрӧн, а ме век пукавлі-виччысьлі. Ещӧ куш киӧн оз лок — сакар ваяс мешӧк джын либӧ таз тыр кампет. Радыд миянлы! Ӗна радейті батыӧс, код юрӧн эг аддзывлы, век нюмъявліс, рам чужӧма, эз горӧдлы некор миян вылӧ, эз вачкывлы. Локтас да ужнайтас, оз кӧ гижсьы, гудӧк босьтас да ворсӧ, ми гӧгӧрыс пукалам да кывзам либӧ йӧктам.

Менам бать вӧлӧм мӧд дорӧ ветывлӧ,— ӧна жӧ видлісны сійӧс таысь мам да ыджыд мам. Но батыӧ налы ӧти паныда кыв эз шулы, асьсӧ мыжаӧн лыддис да. А ме пуксьылі дінас да бӧрдлі видӧмсьыс, жалиті батыӧс. Мукӧддырйи сійӧ воліс войнас либӧ асывнас,— ветлӧдліс кань моз, мед некод оз садьмы.

Ӗна жӧ нин гажа челядьдыр олӧмыд! Квайт арӧсын ме школаӧ пыри. Сэки меститчисны нель класс кык жырйын, челядьыд уна вӧлі, а велӧдысьным сӧмын кык. Ме велӧдчи эг лёка ни бура, шӧрпӧлӧса. Пукалі Агния пӧдругакӧд, сылы корсьорӧ вичмыліс «очень плохойд». Оз и лӧдзлы вӧлі видзӧдлынытӧ тетрадыс. Но мед, ми сыкӧд тшӧтш быдмим, ворслім, купайтчылім ӧти юын. Юсьыс ватӧ ӧтлаын катывлім и,— первой Агния пӧдругалы, бӧрын меным. На ордын пырджыксӧ и овлім. Уджыд налӧн уна жӧ: тасьті-паньтӧ мыскам, кагатӧ видзам, керка сёръяд качай вӧчам, качайтчам,— луныд сідз и кольӧ. Корсьорӧ гулайтны ветлам.

Тӧвнад рытывбыд котралам-ислалам миян чойті. Даддыд кӧ абу, матысса конюшняысь додьтӧ ваям, и сійӧн. Гажа, асланым серам петӧ. Додьтӧ бӧрсӧ нуӧмыд оз усълы дум вылад.

Коркө сәсся казяласны гырысьяс да мырддясны, колясны чой йылас. Асывнас кутшөмкө дядьолы ковмас доддыд да, дерт, броткас...

Клубыд миян сәки эз на вөв, көть эськө война сувттөдзыд заводитлисны ләптыны. Немөй кинотө школаын видзөдлывлім. Өтчюд мөдөдчим кино вылө, а менам пестө поткөдлыны вунөма, чойкөд эськө вундавлім жө пөперечканад лун югыднас да. А рытыс— сэзь, төлысь петөма, небеса югыдлөз. Поткөдлі пестө, сувтовкери, төдлытөг менам чертө нюлыштчис! Чер нетшышти кыв дорысь, керкаө пыри, висьтавыны ог вермы, бөрда, вир петө! Ёна доймө! Бөр пөрччыси, кутшөм нин сәні кино. Мөдысь, мися, ог нюлышт.

А сәсся вайисны шыа кино. Нимкодь вомө оз төр! Моторсө бергөдлөны киөн мужикъяс, вежласьөмөн. Ме пукси мөд радас скамья вылө. Кодкө менсьым вом дорөс мавтыштіс гормөгөн. Эг аддзывлы. Скөрала, ёна сотө. Петавла ывлаас, лымйөн кутышта, бөр пыра, но сотнысө эз и дугды. И бара эз ло кино видзөдөм, гортө ләччи. Коді мавтіс, сылы, дерт, нимкодь, эг аддзыв да. Зэв пустөй детинкаяс вөліны миян школаын: ю сайсьыс Рака Митрей, Катша Көсьта, Сизь Володь, Пекла Чань. Найөс таdzi и нимтылісны. Ме некор эг лысьт нимтысьнытө. Ёна вөлі тышкасьөны, гортө мунігөн кодөс веськалө нөйтөны. Велөдчөмнас водзө эз и волыны, велөдысьным найөс «нитш юръясөн» шулывліс. Эз көсьыны да, сійөн эз и велавны.

Ме челядьдырйи радейтлі ва дортө, көть эськө эг лысьтлы гөйгысь вылө кевнысө, мед абу нюйта, абу туруна; эг лысьтлы пыжад өтнам сөвнысө, джуджыдінас нуөмысь полі.

Өтчюд Агниякөд купайтчыны ләччыны көсьям, петім жыт-никө, сәні сундук восьтім — уна көлуй, быдсьяма чышъяныс. Ми чышъянтө өшлим вылысө, паськөдөмөн көртавлім, морт квайт чышъянөн. Ләччим ю дорө, пукталім лыа вылө да ваө пырим. Купайтчим и бөр пасьтавлім чышъянъястө. Кайим гортө да бөр сундукө пукталім, быттьө эг и босьтлөй. Видз вылысь локтісны гырысьяс. Миян ыджыд мам төдө нин вөлөм чышъян новлөдлөмтө, көсьйө нөйтны, туй вылас кодкө соритөма да. Ме пышйи ывлаө. Сөрөнджык локті да, ыджыд мам вунөдөма нин нөйтөм йывсьыд.

Менам мам пырджык уджавліс скөтнөй двoryн, рыт-асыв удж вылын, дай луннас оз унаысь воы гортө. Сәки ми олім ыджыд мамысь торйөн, өти посводз помын. Мам водз мунас, коляс бательы нянь пөжавны, челядь вердны-юктавыны. Өбед эштас, бать удж вылө жө мунас. Мамук миян вөлі мастер кыны, печкыны, вурны. Нель чой вөлім да, ставнымлы өткодь платтьө вурас, өти модаөн. Кор нин мамук удитөма велөдчынысө? Гижны вөлі кужө, вышивайтчыны, прөшви кыны... Көть верөс сайө петлөма дас сизим арөсөн, удж вылө зіль вөлөма.

Менө мамө идрасьнытө квайт арөсөн велөдіс. Животноводыс Кирө вөлі. Локтас кө Кирө, ме пола, сайлася, дугда идрасьнытө, менө век тошкавыны көсьйө да. Кор ог мун гидө, горт ола, джодж мыськам. Кагатө эг радейт видзнытө,— меысь өтдор эмөсь, мед видзасны. Ва дорын пеласям. Биасям да Агниякөд пывсян ломтам, көть жар да оз тшөктыны, чой-вокнымөс пыв-

сьодам. Кор гырысьяс локтасны удж вывсьыд, бара на миянӧс видасны,— мыйла тшӧктытӧмторсӧ керам.

Аски бара нин вунӧма, Агниякӧд мунам мельнича бузган гор улӧ катанар кӧвтны. Бара жӧ босьтам жытныкысь ыджыд сера выль чышъян. Кӧвтчам лунтыр, ни ӧти катанар оз шед. Чышъян тӧлӧдам юр вылӧ лӧптӧмӧн, но оз косьмы. Гортын бара на видасны. Оз нӧйтны, кӧть эськӧ окота ыджыд мамлы,— ыджыд бать оз лӧдз.

А вотчынытӧ матіникӧ ветлывлім чойкӧд, сійӧ сюся ӧктысьліс. Повлім сӧмын, мед табак дук оз кыв ни сапӧг туй оз тыдав, чайтлім шпанаӧс. Миянӧс гырысьяс век повзӧдлісны, быдторйӧ веритлім.

Медся ӧна став йӧзсӧ весьӧпӧртіс война сувтӧм. Быд пельӧсӧ паськаліс тайӧ лӧк юӧрыс, кӧть эськӧ некутшӧм керкаын эз вӧв радио ни телепон. Лунысь-лун нуисны мужикъясӧс фронт вылӧ. Миян бательы вичмис первойӧн, мам лӧччӧдіс сійӧс Кулӧмдінӧ вӧлӧн. Вит челядь коліс мам сьылі вылӧ: меным дас ӧти арӧс, дзоля воклы кык арӧс, чойлы ӧкмыс арӧс, мӧд чойлы сизим арӧс, коймӧд чойлы вит арӧс. Меным ковмис уджавны колхозын, школаысь лӧдзалисны да.

Ӧтчыд бригадир Марьянна ыстіс менӧ тшӧтшъя челядькӧд да олӧма бабакӧд агсавны кӧдза муяс, кӧть ог на куж вӧлі додьясьнысӧ. Кызь куим лун агсаси. Таысь менӧ премируйтисны 25 шайтӧн (ӧні 2 ш. 50 кӧп.). Нимкодъыд мыйта, вомад оз тӧр!

Ме кӧсйылі школаысь дугдыны: коліс гортын отсасьны мамлы, меысь кындзи на нӧльӧн посниӧсь. Бать тшӧкыда ыстыліс письмӧ «муса Катюшалы да дона челядьлы», пыр гижис, кӧсья пӧ локны тіян дорӧ, лӧк врагӧс пасьвартны да. Но бательӧн думъяс серти эз ло,— бара петіс фронт вылӧ Нева ю дорӧ, кӧні сійӧс лыйисны гудӧкӧн ворсігкостыс мӧдар берегсяньыс пеж немечьяс,— сӧтчӧ коли муса бательным нӧм кежлас.

Шог юӧр воис миян семьялы 1942 воын гожӧмнас. Мамлӧн син дор эз косьмывлы. Кужим и ми шог шогавны, кӧть эськӧ ветлім на мам бӧждорӧ кутчысьӧмӧн. Сійӧ арнас мамӧс пуктісны пастукӧ. Мӧд нывбабакӧд, Варӧкӧд, видзисны мӧсьясӧс му вылын. Уберитӧма нин вӧлі муястӧ, вундӧма, чумали новлӧма гумла дорӧ, тӧчӧма тӧчасӧ. Мӧс кок увсьыс киссьӧм шептӧ мамӧ Варӧкӧд ӧктӧмаӧсь наберушкаӧ, рытнас вайисны гортӧ,— мам сійӧс косьтіс да вӧчис, и челядьлы рок пуис, а куш шептӧ пуктіс сарай дорӧ,— эз ӧд сійӧ гусяв, а скӧт кок улысь кольӧмсӧ ӧктіс, медым тшыг челядьӧс вердыштны.

Грек вылад, лун-мӧд бӧрын миянӧ локтіс Пӧлӧс Катя. Сійӧс пуктывлісны колхоз предӧ, да сӧмын кисьтіс колхозтӧ, ачыс гусясис кысь-мый вермис, яндысьтӧг оліс, эз пов судитӧмысь,— медся ыджыд мортыс вӧлі миян сиктын. Кутшӧмкӧ уполномоченной Ёгор воylvліс сы ордӧ. Катялӧн рушку ыджыд. Пӧт кынӧмнад и вирыд вӧлӧм ворсӧ бура, кӧть йӧзыд тшыгйӧн уджалӧны, синсьыныс би киссьӧ, гӧрб оз веськӧдлыны, син дорныс оз косьмывлы. Став том аныс колины дӧваясӧн, мужикъясыд война би пиынӧсь, рӧдина дорйӧны.

Катялӧн Опоньыс войнаӧдзыс на кувліс гортас. Катя, майбыр, меститіс верӧссӧ гуӧн-гортйӧн. Куим челядь быдтіс, эз

миянӧс моз колхозад уджӧдлы, кӧть эськӧ нылыс миянысь ыджыд вӧлі. Ставнысӧ Войвожӧ мӧдӧдліс.

Кор Катя миянӧ локтіс, ме жытныкын вӧлі. Юалис пеласян вор. Босът, мися, сарай дорын. Пырис, здук лои, бӧр нин петӧ,— шеп ёгтӧ босътӧма мешӧкӧ. Нуа, шуӧ. Эн, мися! Мамӧ менӧ видас. Но Катя нуис, ме бӧрдан коли.

Сійӧ жӧ арнас некутшӧм свидетельтӧг менсьым дона мамӧс судитісны, вит во кежлӧ пуксьӧдісны. Комын арӧсӧн, ӧкмыс тӧлысь бӧрын, кувсис дона мамным Човйын. Со и помасим ми, бать ни мам, вит чоя-вока, ыджыд мамлӧн куим челядь, ӧти кулі войнаӧдзыс дас квайт арӧсӧн.

Вӧлі нӧшта пӧль. Пӧрысьла сійӧс эз нин нулыны война биад, колхозын уджаліс, мый вермис. Сійӧ гражданскӧяд ветлӧма, партизаналӧма. Весъкавлӧма пленӧ, но пышйӧма. Колхозад первойӧн пырлӧма, ставсӧ сетлӧма: мӧстӧ, кык вӧв — Лыса ныр да Гӧрд билет. Гӧрд билетсӧ гражданскӧй вылад нулӧмаӧсь.

Гырысьджыктӧ ёна уджӧдісны колхозын. Ми тшӧтш уджалім, кӧть вӧлім дзоляӧсь. 1943 воын чой-вокӧс босътісны детдомӧ. Жальӧсь сетнысӧ, ыджыд мам бӧрдӧ, и ми бӧрдам. Ӧд миянлы коліс ӧтилаын быдмыны да, сідзи разӧдчыны. Мам ни бать абу. Кысь нӧ пӧрысь ыджыд бать-мам вермасны сы мында челядь видзны, кор сёйны ни пасътавны нинӧм абу?

Ӧти рытӧ ыджыд мамкӧд лӧччим Пӧлӧс Катя дінӧ гортас, медым менӧ сӧсся мӧдӧдны карса рӧдня дорӧ, кучик вӧчан заводӧ пырны. Катя эз лӧдз, шуис: колӧ пӧ колхозын уджавны...

Кӧть и дас куим арӧс тыртім, ми омӧльӧсь вӧлім сёйтӧгыд, эг вермылӧй видз вылад норматӧ тыртны. Ӧтчыл Агниякӧд лӧччим видз вылӧ, зіля куртім ӧбедӧдз, мед кӧть вердасны; пажын кад воис, миянӧс эз вердны, и гортӧ кайим, лунтыр уджавны эг вермӧй. Мича синмӧн эз видзӧдны йӧз челядь вылад верстыӧ йӧзыд, лыддисны ковтӧмӧн дас куим арӧсаястӧ.

Коркӧ вӧлі уджалам звеноӧн, меным сӧки дас квайт арӧс нин тырис, ёнмышти. Тайӧ жӧ бабаясыд вӧліны, кодъяс эз вердлыны рокнад, дас кык морт ӧтилаын ытшким. Мыйлакӧ менӧ первойӧн кутісны покосас сувтӧдны. Гӧгӧрвоисны, мый ме сюсь, зіля ытшка,— косаӧй бур, ыджыд бать лӧсьӧдліс. Сӧки Пӧлӧс Катя буретш уджаліс миянкӧд,— колхозтӧ кисьтис да, вештисны предсьыд. Кодлы дыш лӧчтасьнытӧ, сылысь Катя тульс-тольс лӧчталас косасӧ шуйга кинас. Ме покос помас воа, Катя сӧмын заводитас. Некор эг сетлы сылы косаӧс,— мамӧс «вузаліс» да менӧ карӧ лӧччыны эз лӧдз, лӧгӧй вӧлі петӧ...

Кык во бӧрӧ косавла. Меным дас нель арӧс, конюшняысь куйӧд сӧвта. Друг локтіс милиция, Морохин менӧ кер дорӧ кутіс ыстыны. Ме шуи, мися, ог куж кер дорад уджавнытӧ. А сійӧ горӧдіс, кужан пӧ, мед вӧлі кайӧма аски! Дерт, ме ёна и повзи, милициятӧ ӧд первойысь на аддзи. Думышти: быть кай, а то судитас.

Морохинтӧ ме кывльвлі, нывъяс ёна сы понда тышкасьлісны. Клубыд миян эз на вӧв, и куим километра сайӧ ветльвлім клубад. Пӧдругакӧд ӧтчыл мӧдім, и кӧнкӧ туй костас миянӧс сүӧдіс И.М.М., тиянкӧд пӧ кая. Ме нинӧм эг шу, чайті, пӧдруга дорӧ кайӧ. Воим пӧдруга керка дорӧ. Сӧтчӧ И.М.М. эз кольччы, ме бӧрся вӧтчис. Ковмис горӧдны сы вылӧ, тӧ, мися, эн лок,

мужик мен оз ков! И коркӧя кер дорад ыстігӧн синсӧ сувтӧдӧ-мӧн горӧдӧмыс дум вылӧ усыліс, кӧть эскӧ сэки милиция паськӧмсьыс эг нин пов. Сійӧ бӧр косіс...

Лун-мӧд бӧрын мыйсюрӧ сӧвті да, кайим. Меным сюсь вӧв и сетісны. Бара бӧрда,— йӧзлӧн ӧд мамыд эм, менам абу. Кайим да кайим, коркӧ войнас воим Діасӧръяӧ. Ветлывтӧгыд туйыс кажитчис сӧ верст кузя, кӧть сідзсӧ комын квайт.

Мӧд луннас кыскасьны мӧдім. Ягад ме нинӧмсӧ на ог гӧгӧрво. Бӧръя вӧлаыд водзвылӧ бергӧдчас. Коркӧ Нина, коркӧ Анна, наянӧсь ме дорысь гырысьясыд. Ме бӧрӧ коля, став посни керсӧ ӧкта да катищӧ лӧччӧда. Сӧні серавлӧны, мыйла пӧ став поснисӧ ваялан. Тайӧ, мися, и сӧвтӧны. Рытнас мунак кадад менӧ ректысьясыд век бӧрӧ кольӧны. Вӧлӧм, сюсь вӧвнад налы гӧнитны окота.

Ме тӧлысь уджалі, да вӧвтӧ босытисны: арлыдыд пӧ ичӧт, оз позь уджавны вӧрас. Шогӧ усылі: мый понда керны? Мыськасьысӧ пуктісны, куим тӧлысь уджалі. Мастер шуис: колӧ пӧ пусысьлы отсасысь, сӧтчӧ индісны. А тулыснас скатка бӧрын караванкаӧн кывтім Помӧс вомӧдз. Сӧсянь косі, кертӧ йӧткавны эз босытны.

Гожӧмнад колхозын уджалам, ар воас — бара нин вӧрӧ ыстӧны. Дас ӧти во ветлі сезонникӧн вӧрад, медлӧк кадъясас уна и сьӧкыд тӧдлі, уна и кынмывлі. Вӧлі кӧ мамукӧй, меным, гашкӧ, шоньдтор лӧсьӧдіс. Ыджыд мамлы вӧлі некысь босытнысӧ, олім ӧд унаӧн, а мужикъясӧс война бырӧдіс. Ме кертӧ пӧрӧді, кыскавлі, ректывлі-сӧвтілі,— ставыс вичмывліс. Ледянка вылын ректысьлім Агния пӧдруга кӧд; кыскасьлім дас ӧти час войӧдз. Бӧръя вӧлыд сӧрӧн кӧ каяс, дыр оз во. Коркӧ локтам баракад да, концертыд эштӧма, собраннӧыд помасьӧма. Пырнытӧ полам, серавлӧны дыр ветлысьӧмсьыд да. Мукӧддырйи локтам, да ставныс водалӧмаӧсь нин. Асывнас бара мунам, вӧлаяс вотӧдз Агния кӧд йӧктам. Рытнас йӧзыд олісны гажая, кӧть лунтыр собаласны морӧсӧдз лымйын. Пӧперечка кежысь тыртлісны норма, отсалісны войнаӧн жугӧдӧм страналы кыпӧдчыны бӧр...

Ёна вежсис ӧні олӧмыд. Быдті ме квайт челядьӧс, найӧ уджалӧны. Кӧть ыджыд специальносыт эз босытны, да век жӧ пӧльза вайӧны государстволы. Ме ӧні пенсия вылын, чойӧй — Октябрина Михайловна Вежева — Социалистическӧй Уджыввса Герой, Аля чой кызь куим во нин уджалӧ больничаян, Роза чой кулі дас кык арӧсӧн, Толя вок дас вит во нин кино вӧчӧ. Ыджыд аттӧ сӧветскӧй правительстволы, мый лӧсьӧдіс миянлы тайӧ бур да кокни олӧмсӧ.

Ӑні ёна нин сӧрнитӧны важ бырӧм сиктыястӧ ловзьӧдӧм йылысь. Ми зӧв радӧсь, мый пӧль-пӧчлысь киподтуйсӧ бӧр кутасны кыпӧдны-казытывлыны. Ӑд важ пӧльяс эз повлыны сьӧкыд уджысь, вӧчлісны видз-му, керавлісны тыла, бертлісны мыр. Пӧперечка да чер помысь ставыс артмыліс. Кӧдзисны-быдтісны нянь, ытшкисны гӧрбуша-косаӧн турун, видзисны уна скӧт. Миян грезд гӧгӧр шыльквидзлісны бура потшӧм колхоз муяс. Потшӧсыс вӧлі эз ӧнія мужикъяслӧн моз вӧсньыдик сюръяысь да кык сода пӧвйысь. Водзынтӧ сатшкывлісны майӧг квайт сода потш, бур понӧль.

---

Война дырйиыс кӧдзлісны нянь, быдмывліс и сю, ид, зӧр, шобді, анькытш, картупель, сёркни, капуста, морков. Вӧдитлісны весиг ӧгурцы! Кысь нин вӧлі сы мында выныс миян сордйывса бур бабаясылӧн, мича дӧваясылӧн. Челядьыс бура жӧ тӧдлісны удж кӧртӧ: кӧкъямыс арӧссянь найӧс мамъясыс новлӧдлісны сӧрсъыныс.

А ӧні мый артмӧ? Миян Сордйыв — мича, лӧсьыд грезд, уджысь повтӧм йӧз, разнӧй специальностяӧсь, грамотнӧйӧсь. Но тырмӧны и нинӧм думайттӧм йӧз, кодъяс став видз-мусӧ эндӧдісны. Ягслудабӧжысь небыд муяссӧ паччӧр кодъӧдз вӧчисны, ставыс вутш юр. Кӧдзлісны жӧ турунтӧ, уна йӧв лысьтӧны, юыс орччӧн, но сәні гожӧмбыд сә мӧс купайтчӧ, и Помӧс матушка-юным тырӧ куйӧд ваӧн. Сәсь жӧ ми васӧ юам, сән жӧ челядь купайтчӧны. Эмӧсь ӧд мӧд йирсянінъяс, а грезд гӧгӧр тыртӧны!

Кольӧм во Сордйыв катыдӧ вайисны нӧшта мӧд сә мӧс. А сәні содтӧд порсь гид на сулалӧ. Кыксә мӧс Сордйыв гӧгӧрын лойсьӧны, некыт мунны, быдлаті тыртӧны, бур ыбъястӧ тшыкӧдісны, берег доръястӧ праквартісны, тшака-озъя местаястӧ паччӧр кодъӧдз вӧчисны. Войдӧр челядь да пӧрысь матігӧгӧр вӧртӧ кытшовтлісны-вотчывлісны, а ӧні совхозлӧн бауяс буалӧны, мунны полан. Кодлӧн юрыс думыштіс грезднімӧс пежавны? Порсь гидыс тыртӧ дукнас, лолоавны оз позь. Кысь нин том йӧз оз пышгъявны? И мый вылӧ надеяӧн татчӧ овмӧдчасны? Налы ӧд колӧ мича кӧмӧн ветлыны, а миян туй вылӧ колӧ брӧдни. Воис нин кад мыйкӧ думыштлыны да заводитны бурмӧдны Сордйылын олӧмсӧ. Кымын депутатӧс нин бӧрйим, а вежсьӧмыс век на оз тыдав.



*Редакциясь: Ёна вежсис олӧмыс. Ӑні, дерт, серпасыс и Сордйылын, и Помӧсдінын мӧд. Уна мукӧд сиктын и нинӧмыс эз коль. Лыддян татшӧм казтылӧмгъяссӧ да кажитчӧ, мый вӧвлӧм серпасыс, колӧкӧ и, бурджык вӧлӧма...*

## Митерасса Олексей

«Быд морт, чайтам да, думыштчывлө: мыйла локтіс Му вылас, мый сылы колө тані вöчны? Мөвпалө и сы йылысь, мый кольө ас бöрас, мый артмис вöчнысö. Сёрнитны кө уджывса ыджыдджык ёрт Алексей Серафимович Одинцов йылысь, тайö юалөмъяс вылас сійö, тыдалö, вочакывсö водз аддзöма да мөдöдчöма гижысьлөн абу кокни, но сёлöмыслы лөсялана туйöд. Медводдза висътыс сылөн петöма «Войвыв кодзулын» 1966 воö нин. Сэсся и ачыс локтіс уджавны журналö да со 27(!) во нин отсалö петны литература йылөмъяслы. Алексей Серафимович тöдö тайö каднас көть и муртса кежлö мыччысьлывлөм быд авторöс. Миянлы, томджык ёртъясыслы, сылөн висъта-сьöмыс вöсьтö журналлысь да литературалысь важөн вöвлөмасö, сетö позянлун быттö выль пöв овны сійö олөмсö, пырöдчыны озыр да колана историяö. Медым йитöдыс эз ор, медым и ми коркö вермим миян бöрын нин локтöм том йöзлы висътавны сысянь кывлөмсö. Кызди вöвлі нэмсö и мыйөн олөмсö сюрöса. Кызди велөдлісны став быдмысь-верстяммысьсö нэмыс коми йöз.



Да и гижö Алексей Серафимович ёнджыкасö быдмысь войтырлы жö, а тайö медся сьöкыд, öд быд кывлы колö лоны кумим пöв збыльөн и мөрччанаөн. Гижö Чужанін да Челядьдыр йылысь. Оз ло ылөдлөма, шуам кө — тайö нырвизысь гижöдъясас медся тöдчана да сёлөмтö вөрзёдана. А медся ясыдöсь — чужан грездыс, Митерас, да сэтчöс олысьяс... Алексей Серафимович тшöкыда казътылö: абу пö нин öні Митерасыс, кер весиг абу кольöма, вөр сы местаын быдмö... Но колис чужан грездыс гижöдъясас, а накöд и лыддысьысьяслөн сёлөмъясас да вежöрас. Век кежлö. Лыддян, да ставыс син водзад, быттö сувтöма кадыс и öні на олөны чуймөдана интереснöй олөмөн важ йöз. Öні ми тöдам, көні сійö Митерасыс да кодъяс сәні олісны...» Тадзи ми, редакцияса ёртъясыс, чолөмалім сійöс 70 во тырöмөн. Öні бурджыкасö, тыдалö, шуны он и вермы. Торйөн нин тадзи чолөмалөмыс аслыс зэв ёна лов вылас вöлі воöма да. Сёлөмсянь быттö прöйдитчöма олөм сюрöстіс.

Чужліс Алексей Серафимович 1938 вося февраль 17 лунö Емдін районса Айкатыласянь неылын поздысьлөм Митерас грездын.

1958 воын помаліс уджалысь том войтырлысь Айкатыласа

---

шөр школа. 1958–62 воясын служитіс армияын, авиацияса механикөн.

Медводдза гижодыс — «Илля лунё» висът — петалис «Войвыв кодзув» журналын 1966 воын.

1973 воын помалис Коми государственной пединститут. Буретш сәні Алексей Серафимович и кутіс ёна зільны студентъяслөн литобъединениеын: лэдзисны литгазет да ки помысь гижом журнал.

Велөдчөм бөрас зілис «Югьд туй» газетын, а 1981 воын вуджис «Войвыв кодзув», көні и уджаліс 2008 воөдз.

Уна гижөд Алексей Серафимовичлөн пыртөма челядьлы проза чукөръясө да учебникъясө. Петалисны и ашөр небөгъяс: «Медводдза коса туй» (1985), «Миян грездса челядь» (1987), «Пужъявлөм көдза» (1992), «Парма-мамлөн пиян» (1997).

А.С.Одинцов пырліс Россияса гижысь Котырө, сылысь зільөмсө пасйылісны «Коми Республикаса заслуженной уджалысь» почёт нимөн.

2007 воын «Войвыв кодзув» журнал редакциякөд лои Коми Республикаса правительстволөн И.А.Куратов нима премия лауреатөн.

Кувсис Алексей Серафимович 2009 вося декабрын.

Вайө бурөн казтыштам шань коми мортөс, коді олөмсө сетліс коми гижөдлы,— Митерасса Олексейос. Тадзи сійос шулісны чужанінас.



## Сімдор чери

ВИСЬТ

*Сиа Рая чойлы*

Фронт вылын усьом батьянь райсобес съомтор мынтыштіс. Мам ним-ов вылө. Но медым меным деньгасө сетасны, рытнас вель дыр «Доверенность» гижим.

— Коді нө тайос сетіс?— тетрадьысь косялөм листыввса гижөд лыддьөм бөрын юалис сиктсөветса секретарь.

— Некод эз сет...

— Хы! Коді гижис, юала?

— Ачым.

— Ачыд? И деньга көсьян тайө кабалаторнас босьтны?

— Сы могөн и пыри. Печат колө гижөд улас пуктыны...

— Ачыд, шуан, гижин? Но быд гижөдтор улө ми печатьяс ог шняпйөдлөй!

— Мамкөд гижим... Сійө висьтавліс, а ме гижі. Печат пө сельсөветын пуктөд. Сытөг пө деньгатө оз сетны... Со и пыри тиянө.

— Ачыс нө мыйла оз волы?

— Кокыс висьө. Гортын беддьөн муртса ветлөддыштө. Гижі ме, а кырымпасыс өд мамлөн... Митерассяньыс нө Айкинаөдзыс кыдзи волас висигас?

— Ме тэнө ог төд. Гашкө пөрьясян? Документыд өд абу?

— Абу.

— Ноко, петкөдлы тетрадьастө?— недыр мөвпалыштөм бөрын, ог төд мыйла, корис нывбабаыс тетрадьясөс.

Перьялі, мыччи пызан вомөныс.

— Ы-хы... «Ученик четвёртого класса Шежамской начальной школы...» Ачыд и гижөмыд, эн пөрьяв,— но печатьсө эз пукты, а телефонө кутчысис, звөнитіс кытчөкө.

Повзышті... Гашкө, шышөн чайтө да милицияос корө. Сөрнитыштіс кодкөдкө. Ним-овөс висьталіс, көні велөдча, Митерас грездөс казгыштіс.

— Но, но,— бөр өшөдіс телефон трубкасө да кыв шутөг и пуктіс печатьсө, кырымпассө.— Айкинаас, райсобесас, сетан.

Райсобесын индісны, кутшөм жырйө пырны. И колө жө, зэв на и төдса нывбабаыс. Грездө гожөмнас и арнас чөд да пув вотны куим-нөльысь кайліс. Локтігас и мунігас миянын шойччыштіс. Мамлөн бур төдса. Аньыс, Иллария Никандровна, некор куш киөн эз пыравлы: преник-кампет пызан вылө падьянсыс перьялас, а миян — самөвара пөсь чай. Ме и нуөдлывлі вотчынысө, көні чөд-пуйыс медгырысь да медчөскыд.

— Школа бөрад өд, Паша, тшыгмин, юышт кампета-преника чай.

Бідждодчыны эг кут, кык стокан пось чайсө юи да аттьоалі бур аньсө.

— Но, пуктіс секретарыс печатьсө?— нюм пыр юалө Иллария Никандровна.— Звонитліс татчө, висьталіс ним-овтө... Митерасса пө... Сійө тэнө оз төд, а ме төда и тшөкті могмөдны.

— Пуктіс... Со «Доверенностьыс» — перйи сумкаысь печатя бумагасө.

Гижөдөс кутшөмкө кыз тетрадьө вурыштіс деньга сеталысь том аныс, кырымөдіс, а сэссия и сьөм мыччис.

— Лавкаясөд эн ветлөдчы. Гортад пыр жө и котөрт. Мед оз кыскыны денгятө,— стрөжитіс Иллария Никандровна.

— Нянь тупөсь колө ньөбны.

— Со тайө — нянь вылад, а папушсө пыдө дзеб. Эм пытшкөс зептыд?

— Эм. Пальтоын и пинжакын.

— Пинжакса пытшкөс зептад и сюям,— бур аныс ачыс и дзумгис деньгаөс зептө.— Но, татысь он уськөд,— быттө ичөт кагалысь, кизяліс зеп юрийвсө, пинжакөс, а сэссия и пальтоөс.— Эн мыччась денганад, воштысян!

— Ог воштысь, ог. Нянь вылө өд гортысь босьтывла жө.

Аминьой! Йөзыс лавка дорас! Очередяс, гашкө, сө морт! И кильчө вылыс быттө нопъя. Морт кызь сэні. Паськыд пельпомъяса дядьөяс өчередьсө воча пыкөны. Найө, дерт, медводз пырасны. Мый нө вына мужичөйясыдлы нывбабаясыд да пөчьясыд?

Өчередь бөрас видзөдлытөг кильчө вылас жө кайи. Помас кө сувтны — дзикөдз пемда да нөшта шедө-ө, воас-ө сэтчөдз няныс? Ме бөрө унаөн на сувтісны.

Недыр мысти локтіс вузасысьыс. Дядьөяс вешйыштісны, лэдзөны сійөс өдзөс дінас. Бөрсяныс и ме, пытш кодь ичөт зонка, өдзөсланыс матысмышті. Но сэссия тай топөдісны! Чужөмөс жмитісны водзын сулалысь дядьөяслөн мышланьыс, лолыштны сынөдыс оз шед. Юр вежөр гудыртчис.

«А-а-а!»— горөді пөдөм гөлөсөн, бөрлань йөткыся, мед дзикөдз оз пычөдны. Но — он на босьт!

— Мый морла тшемилөас суйсин! Лысьөмтө варкөдасны! Йөз гысылы кок уланыс мытшөд — таяласны-масьтасны!— дядьөыс менө вурө-вочө, но чатөртчыштіс, бөрныдалыштіс.

Ывла выв сынөдсө өтчид-мөдысь-коймөдысь вом тырөн апышті. Топөдөм тыясөдз воыштіс — юр вежөр ас паскальө вылас воис. Но сэки кутіс гольскыны лавка өдзөсса пуд джынъя томанө сюян ключ.

Бөрсянь жмитысьяс ярмисны: быдөнлы водзөджык окота веськавны. Менө бара топөдісны.

— А-а-а! Пөда!— быттө юрлөс увсянь горза.— А-а-а!

— Öдзөсыс эз на воссы. Кыгчө пыканнды? Зонкаөс со вөрөдіннды!

— Пиялін ли мый?— кодкө ылын, бөрын, өчередьтөг жө пырысь вашьялө.

— Зэв тай нин тшыгөсь! Ичөт зонка ме водзын сулалө. Варкөданнды!— скөрысь вочааліс мисьтөм кывберитөмсө дядьө, зумыд мыш-пельпомъяснас олыштчис бөрныд да пальто гожгө-гөрөд кычипиөс моз кыпөдыштіс вывлань.

Пос джоджыс кок улысь воши, но эг усь: дядьыс өти кинас

менö пукаланінöд кутыштö, мед ог гывды увлань, а мöд кинас азяма-пая-пуфайкаа мусюр кодь дядьöясöс пыкö, мед менö эз пычöдны.

Гольсмуні көрт пробойысь перьян томаныс да воссис и öдзöс. Йöймöм ыжъяс кодь йöз гыс, кокъяс джоджас оз инмавны, пыртöдiс лавка пытшкас. Помас, но стойка дiнас на веськалi. Топыда жö сулалам, но оз нин кильчö вылас моз жмитны. Йöзыс жыр тырыс. Дерт, дядьöясыс öчередьтöг ньöбасясны, но стойкадорсаыдлы тупöсь вичмас жö быдса вöв додъсыс.

Регыд и няня вöла-додяыс воис. Öшинь розьтыыс мыгчалiсны тупöсьяссö, ыткöбөн пырöм дядьöяс ньöбасисны, а сэсса и öчередыыс вöрзис.

Петi лавкасыыс тупöсь няньöн. Ывлаас югыд на. Сiдзкö, тэрмасьöмөн кө, рöмыднас, ёна пемдытöдз на и воа гортö.

«Кос чери! Ньöбöй кос чери! Ок, чöскыд юква пуанныд!»— чуксалö ветлысь-мунысьясöс тыртöм ящик вылын пукалысь кутшöмкö нывбаба.

Матыстчи. Аныыс вöлөм тöдса: Керöс сиктса Марья. Вужбöжнас мамлы рöд на лоö. Ачыс сiдз висьтасылiс миянö воливлигьясö.

— Видза олан, Марья тьöt! Чериөн вузасян?

— Шыть! Шпана пи! Тьötөн тай тэныд лои?— наян пон вылö моз горöдiс, чери тыра сепыссö асланыыс кыскыштiс да пидзöсьяс костас топöдiс.

— Митерасö, миянö воливлинныд. Салдат Вань Любаыслөн ме пи.

— А-а-а! Воливли грездад, воливли... Мамтö тöда, а тэнö вот ог помнит... Тi кодъыс öд... код тöдас? Но, но, ньöбасьышт,— Марья бөр öтдортыштiс сепыссö, вöсьталiс да перийис шөр чунь кузъта, польдчöм рушкау, пражитöмөн косьтöм банйöм йөрш.— Видлы пинь улад, аклялышт — кывтö ньылыштан.

Кос йөршыс пинь улын сöмын и куж-кажмунi, да эг и тöдлы, кыдзи ньылыштчис. Нюжöдi киöс мöд ловла.

— А-а-а! Веляммин? Ньöб!— бөр асланыыс кыскыштiс сепыссö Марья тьöt.

— Ачыд кыйсян? Вузöс вылö весиг со сепыс тыр вайöмыд?

— Кысь нин менам здорвьеөн? Зэв ылö ветлi, Сiмдорö... Белет доныс көть, мися, вузышта... Дзик öд деньгатöмми...

— Дона-ö нö килограммыс?

— Тилоыс? Комын вит шайт... Абу дона, а вöлöгаыс чöскыд,— ошкö черисö Марья, көть и сылөн ошкытöг көрсö кывлi. Чöскыд, абу сiсь пипу кодь сола трескаыд.— Ньöбан? Тило весита?

— Та дон,— гусьөн перйи пытшкöс зептысь дас шайта.

— Но-о-о! Сэтшöм этша ньöбан? А эм öд деньгаыд, эм! Кывлi, кышöдчин пытшкöс зептад! Надзтысян?

— Тайö сöмын и эм...

— Но, сiдзкö тайö дон вылас и мургала. Меным öд Сiмдорас эз жö жаляддза, дон мынтытöг сетны... А туйыс! Туйыс! Уселоншпанаяс дiнтi, тюрьма-лагерьяс пыр чериысла лои ветлöдчыны... Ветлöмыс юр пудьялöм кодь! Туй вылас грабитöмысь и лоö повны! Виöмысь и... Дона? Треска, сола треска донтöм, но сэтшöм юкваяд вомад оз пыр...

— Дас шайт вылад весиг тув\* чери оз сюр,— Марья тьот безменнас веситіс бумага тубрас чери да тшапкыліс на сэтчө кузь чуньяса кисө, коңдіс сэтгыс чугунын пумөн йөршловсө да бөр шлапкис мешөкас.— Со, дас шайт доныд, тув чери...

— Да-а! Тув тэныд! Коңдін мыйтөм!

— Деньга доныд!

Дөзмылі, көть бөр кора сьомөс, но видзөда, кос йөршыс вель ыджыд тубрас. Эг сэсса и мөд вензыны. Перйылі книга-тетрадьясөс дөра сумкаысь, черисө пыдөсас пукті — сумка джын лоис, өдва и төрисны выліас книга-тетрадьясөй.

Грездса челядь, мамъяслысь юасьтөг, деньга ас коланінө эг таргайтлөй, а со, тойліс кодкө.

«Дас шайт видзи!»— майшася вөр туй кузя гортлань котөр-тігмоз.

— Но, дыр талун? Пемыд со... Узьмөдчин, чайті, Шожымас,— майшасьыштөмөн паныдаліс мам.— Деньгатө сетісны?

— Ы-ы, сетісны... Нянь көрыш со... Нөшта кос чери. Керөсса Марьяыддысь косьтөм йөрш дас шайт дон ньоби.

— Но-о, аски вель пөлөс вөлөга, сідзкө, пуам. Кос чериысь чөскыд юква,— мамы весиг нимкодь лои.— Умим картупеля сёянторсьыс. Вом көр көть вежыштам...

— Дона зэв... Килограммсьыс комын вит шайт корө. Тув сөмын ньоби,— эг нин кут норасьны, мый тувсьыс быдса ыджыд китыр вузасьысьыс коңдіс.

Дона ли донтөм, а Марья тьөтлөн чериыс вежон чөж чөс-мөдліс.

«Вот эськө аслыным кө Сімдорас ветлыны?— воис юрө мөвп.— Куимөн — Модя, Веня да ме. Сэні, төдөмысь, донтөм-джык. Унджык позяс ньобны».

Модялы, Венялы висьталі, мися Сімдорысь йөзыс зэв чөскыд чери ньобалөны да Айкинаын дона-донысь вузалөны. Килограммсьыс комын вит шайт корөны, а сэні, гашкө, джын донсьыс позьө ньобны? Чуйда ёртъясөс, но миян пиысь некод оз төд, көні сійө Сімдорыс.

— Ветлам көрт туй станцияас, Айкинаө,— бур мөвп вөзйис Модя.

Шуөма — вөчөма. Мунім станцияас, Модя юаліс билет вузалысьыслысь, кодарын Сімдорыс. Ичөтик жырйын пукалысь тьотыс петаліс миян дінө да залас өшөдөм ыджыд карта вылысь петкөдліс Синдор станция.

— Миянлы оз Синдор, а Сімдор колө,— шыаси ме.

— Сійө и эм Сімдорыс,— эскөдіс вокзалса билет вузавлысьыс.— Кодсюрө, тьөтөяс, сэтчө черила ветлывлөны... Со, видзөдөй: Айкино, Шежам, Микунь, Чуб, Княжпогост,.. а сэсса некымын станция бөрын и Синдор воас.

— А дыр сэтчөдз поездыс муно?— Модя юаліс.

— Рыгнас тані пуксянныд, а асывнас,.. Ноко, стөча төдмала,— пырис аныс аслас жырйө, звөнитліс Микуньө, а сэсса юөртіс:— Ичөт станция. Сэтчө сөмын Котлас—Вөркута поезда сувтлывлө, а воө Синдорас квайт час асылын... Талун рыт тані

---

\* Тув — 400 грамм (сьөкталөн важ роч арт).

пуксянныд, а аски водза-водз сэні лоанныд... Мый могөн нө мунанныд? Черила?

— О-ог. Сідз тай косьим тōдмавны,— вочавидзис Модя.

Коланасō лои тōдмалōма. Сёрнитчим ёртъяс субōта рытō петны туйō. Абу зэв ылын и вōлōма да выльлуно эськō бōр вермим воны гортō. Оти лунсьыд школаын оз видны... Позьō и помка кутшōмōскō корсьны. И дыр кад кежлō чōскыд сёяна-ōсь лоам. Модялы да Венялы, дерт, эг висьтав, мый Сімдорас туйыс тюрьма-лагерьяс пыр мунō. Марья тьōтōс тай некод абу сёйōма. Повзьōдчō на, буди, мед некод чериысла оз мун, а сылысь ньōбаласны.

Воис и туйō петан лун. Школаысь тэрмасьōмōн гортō кайим. Колō од и ноп дасьтыны, да рыгтя, Микуньōдз кайысь поезд кежлас переездō лэччыны. Пуксьысь кō эм, сувтлō Митерас горулō поездыс.

Но, ме дась лои туйō петны.

— Модя да Веня динō петала,— висьтаси мамы.— Дасьōсь нин, чайта, но поездōдзыс со час сайō на.

Пыри Модя ордō. Сийō паччōр дорас пукалō. Абу, тыдалō, и чукōртчōма туйō петігкежлō.

— Тэ нō мый, Модьō?— юала.— Регыд од поездыс петас Айкинасьыс... Абу на дась?

— Мам оз лэдз. Некутшōм пō чери он вайōй, а воштысянныд.

— Кōсьысьлін од! Аслыд, буди, дыш лоис?

— А гōгōрбок кō мōвпыштны, абу и окота... Оз спор миянлы некутшōм чери... Тыртōг бōр ковмас локны... Ылалам-вошам кытчōкō да черинас вузасьысь ордас ог и веськавлōй...

Модякōд тōлкуйтны — весьшōрō кад воштыны. Петі Веня ордō.

— Мам оз лэдз,— бōрдōмōн моз артмис Венялōн.— Юрнытō пō пудъяланныд куим йōй... Нōшта и деньгаōн дай!

— Ог лэдз, ог!— шыасис Венялōн мамы.— Ылі туйō, тōд-тōминō! Грабитасны! Шабаш, меным! Петала вот мамыд динō! Нюдз ньōр тиянлы.

«Сёрнитчим, а со, кыкнан ёртōй вузалисны!— курыд мōвп-сьыс кымōсōй пōсявліс.— Сідзкō нō, ветлытōм лō? Морыс мед тиянōс лыяс! Отнам ветла, некод менō оз сёй!— но веськы-да висьтасьны тадзи оз позь. Опонь Лидь петалас миянō, вись-талас, мый мунысьыс отнам, да сэки и менō мам оз лэдз.

— А ме од, Веньō, ог жō мун... Модя оз мун ни...

— Он мун?— кыпыда юалис Веня.

— Ог... И Модялы висьталі... Веня, мися, мед оз жō лōсьōд-чы, петала сы ордō.

— Дōведясям, сідзкō?

— Талун ог... Юр мыйкō висьмис. Муна, водыштла...

«Этадзи дасьтысим! Тьпу!»— сьōвзи кильчō вомōныс посводз одзōссō пōдлалōм бōрын да довги гортлань.

— Но, дасьōсь ёртъясыд?— юалис мам.

— Дасьōсь,— видзōдлі часі вылō.— Поездыс час мысти на сōмын воас. Кынмам переездас. Дыр-ō миян километрсō котōр-тыштны...

— Но, сёйышт, сідзкō, туй вылад. Тшыгман, а войнас коді

тэнö вердас?— мам лөсьöдiс деньга.— Этайöс билет вылад, а чери вылас пинжак зептад сюя да вурышта, мед он уськöд.

Панясьыштi, но кутшöм вермас лоны сөйöм: менö пöрьялис-ны, ме мамöс ылöдлi... Мöдöдчöма да эг нин вермы лöньны. И оз нин сэтшöма чериыс ков, кыдзи кöсьöмыс чуксалö-кыскö...

Переездын поездсö здук и виччысьыштi. Машинистыс, ад-дзис пуксьысьöс да, пода морт öдöдз ньöжмöдчис. Воссис öти вагонысь öдзöсыс.

— Микуньö мунысь эм?— юалис проводницаыс, аддзис менö да кыпöдiс вагонас пыран сод весътсьыс кöрт вевтсö.

Ур моз кавшаси поскöдыс да вагонса кöзьяйкаыслөн киняулö-дыс и пыри тамбурас.

— Сэсся некод абу пуксьысьыс?

— Абу... Öтнам.

Проводницаыс öвтыштiс машинистыслы биа пöнарнас.

«И-и-у-у-у!— дiвöстiс «Овечка» паровозыс да содтiс öдсö. Билетсö сöмын Микуньöдз вузалiс вагонса кöзьяйкаыс.

— Синдорöдзыс сэнi, Микуняс, ньöбан,— шуис.

Микуньöдз Митерас грездса зонкаяслы, да тшöтш и нывка-яслы, туйыс зэв тöдса. Унаысь пызьла кайлывлiм. Тöдсаöсь и билет вузалысьясыс. Унаысь аддзывлiсны, кодсюрö и вотчыны на Митерасö воывлöны гожöм-арсö.

— Меным Сiмдор станцияöдз билет колö общöй вагонын,— матыстчи билет вузалан касса öшинь дорас.

— Тöдса, видзöда,— билет мыччигмоз шуис öшинь саяс пу-калысь нывбабаыс.— Мый могөн нö сэтчö?

— Чери ньöбыштны... Көнi вот вузалöны? Аддза-ö?

— Кык час мысти воас Котлас—Вөркута поезд. Квайтöд вагон. Пуксигад проводницаыслы висътав, мед чеччöдас Синдор станцияас. Чериысла Синдор тыбокса грездас ветлывлöны, кывлi. Векни кöрт туйыввса поезд пö сэтчö, дзик грезд дорöдзыс, ветлö. Юасян — нуöдасны и вайöдасны, эн маитчы,— велöдö бур аныс.— Пуксьы йöз чукöрас да кывзы, кор дежурнöйыс юöртас Котласса поезд матыстчöм йывсьыс, да квайтöд номера вагон дiнас и котöрт.

Кык часыд виччысигад зэв вөлöм ньöжйö кольö. Но сэсся коркö и воис жö колана поездыс. Котöртi индöм вагон дiнö, петкöдлi билет, юали, кытчö позьö пуксьыны. Вагонса кöзьяйкаыс мам кодь авъя да мелi:

— Кытчö кöсьян, сэтчö и пуксьы. Со кöть эатчö, бабушгьяс дорас.

— Меным Сiмдор станцияöдз. Мед бара оз жö узьсы. Юөр-тöй, кор кутам сэтчö воны,— висъталi вагонса кöзьяйкаыслы.

— Шойччышт, верман на и водыштлыны. Чуксала, эн ма-итчы... Вит час нелямын вит минутын воам Синдорас.

Кутшöм водыштлöм да узьöм! Вунöдас кö проводницаыс чук-савнысö? Вөркутаöдзыс нуöдасны, да сэнi и збыль воша. Видзö-да öшиньöд, лыддя воом станцияыслысь нимсö: абу на Сiмдор — бөр лöня, водзö гурöдам-тöвзям.

Код тöдас, дыр-ö мунiм. Часi менам абу. Пöчöясыслөн абу жö. Найö, тыдалö, ылö мунöны, некутшöм маитчöм. Вугралöны. Чеччи пуклöс вылысь, ветлi проводница купе дорас. Öдзöсыс вöсьса. Сийö, видзöда, вугралö жö.

«Ачыс со узьö, чуксалас, небось!»— юалі:— Сімдор станция-ас регыд воам?

— Кык час да джын мысти,— видзöдліс часі вылас.— Узьышт, чуксала.

Кызди көть эг крепитчы, вугыртсьöма чорыда.

— Зонка! Садымы, регыд воам!

— Нöшта вит минут узьышта,— нурбыльті. Чайті, мамö школаö чуксалö.

— Синдорö матыстчам, Синдорö! Синдор станция!— гораа юöртіс вагонса көзьяйка.

— Узьысис?— повзьöмөн чеччи пуклöс вылысь.— Прöйдитім нин?

— Локтысь станцияыс — Синдор. Дасьтысь. Öти минут сэнi сулалам.

Минут кызь мысти воис меным колана сувтланін. Петі вагоньысь. Станцияыс — ичöтик пу стрöйба. Öдзöс весьтас дзик öти лампочка ломалö. Пыри станцияас. Касса öшиньыс восьса.

— Кызди меным Сімдор грездас воöдчыны?— юалі билетсö вузавлысь аньыслысь.

— Этайö öдзöстыс петан да бияс вылас мун... Сюръяяс вылас тай лампочкаяс öшлöма. Сэнi вылыс склад, вөр сэтчö ваялöны. Час джын мысти грезданыыс поезд мунас, йöзöс нуодысь. Сэтчö и вöзйысь.

— А билетсö көні вузалöны?

— Рабочöй поезд, лагерыслөн... Некутшöм билет оз ков.

— Босьтасны?

— Босьтасны, босьтасны! Котöрт, мед он сёрмы!

— Э-т-т-ты кей поезд?— джынвийö пемыд жыръяс, диванъяс вылас, кык дядьö вөлөм узьöны. Эг казаяв пыригөн. Сёрнымöс кылöма öтиыс, кыпöдліс юрсö да мыйкö юалис, но эг велава.

— Чево?— рочөн юалі.

— Кей поезд, спрашиваю?— пидзöсьяс да гыррдзаяс вылас кыпöдчыштіс.— К-кы-ды поезд?

— А-а-а! Котласский, на Воркуту...

— Н-но... Нам на юг,— бөр пласьтнитчис диван вылас да дзик пыр унмовсис.

«Шпанаяс, тыдалö?— воис юрö повзьöдлана мөвц, усйыси станция жырсьыс да котөрөн мөдöдчи уна биясланьыс.— Этайöяс шөрö кө веськалан, грабитасны и пөрччодасны!»

Недыр мысти петі векни ота көрт туй вылö да регыд и вои нель-вит вагона поезд дінö. Ичöt вагонъяс. Сэтшöмсö эг на адзыв. Матыстчи ичöтик паровоз динас пöнарөн сулалысь дядьö дорö.

— Меным эськö Сімдор грездö кызкö колö воöдчыны?— шыаси.

— Миянкöд и мунам! Öдйö гургöдас поездыс. Регыд, звук мысти вөрзям. Сулавлы тані, ме бөръя вагон дінöдзыс ветла. Видзöдла, ставыс-ö лючки.

Дядьöыс ветліс поезд помöдзыс, бөр локтіс, öвтыштіс юр весьтас кыпöдөм пöнарнас поездланыыс да меным нин шуис:

— Пуксы вагонас, мөдöдчим,— ачыс ме бөрся пос кузьяыс кайис да пöдаліс вагон öдзöссö.

Паровозыс вöснһыд гөлөсөн, ливкнитөмөн тутөстис, вагонһыс-ыс вөрзисны да пыр өддзалисны и өддзалисны. Векнһыд ота көрт туй вывтыыс вагонным өтарө-мөдарө сөмын и зимакыло-шатлалө.

— Татшөм ыджыд өдөн мунам да, ог пөрөй кытчөкө? Со кыдзи вагоныс шатласьө?— полөмөн юала дядьөыслысь.

— Эн пов, ог пөрөй!— серөктис дядьөыс.— Со, видзөд, войтырыс пукалоны, веськодь налы.

— Мөгөн Синдор грездас?— юалө дядьөыс.

— Чериторла эськө, вузыштасны кө.

— Вузаласны. Коді волө чериысла, некор на некод тыртөг бөрсө эз бергөдчыв... Грездас унджыкыс нывбабаяс кыйсьөны. Аслыныс тырмө и вузөс вылө вичмө.

Пукалам вагонса векнһыдик лабич вылын бур дядьөыскөд орччөн. Поездыс, кажитчө, пыр на содтө өдсө, сөмын и пыльбөтөвзьө. Вагонным шатласьө, быттьө гыа ва вылын дзибрөс пыж.

— Пөрам өд, пөрам!— полөмпырысь кутчыси өшиньдорса пызанас.

— Эн пов!— серөктис орччөн пукалысь.— Быд лун өтарө-мөдарө тадзи ветлам да эг на пөрлөй. Видзөд со, кымынөн вагонас мунам да некод оз пов. Медводдзаысь на, татшөм поездас?

— Первойысь.

— Ылісянь воан?

— Айкинасянь...

— Вөвлі сэні... А чериыдла Марпа Петровна ордө пырав. Нывбабаяс пөвстас сійө медбур кыйсьысьыс. И черисө, шуөны, зэв сямөн косьтө. Чөскыд. Медсясө сы ордысь и ньобасьөны, кывывлам татчө волысьяслысь. Зэв озыр Синдор тыыс черинас. Срок помассяс регыд да татчө и кольча, ставыс кө лючкибура артмас. Уджыс деньгаа, вөр-ваас зьвер-пөтка и чери,— воссис дядьөыс да висьтасьө и висьтасьө.— Бөрсө нө кор мөдөдчан?

— Талун жө эськө и колө туйө петны.

— Квайт час кежлө, сідзкө, лок поезд дорас.

Сөрнийөн кузь туйыс төдлытөг коли. Гырысь кер чукөрһыс дорө сувтис поездыс. Вагонһысысь петалисны йөзыс да кутисны разөдчыны коді кытчө, асланыс уджалан местаас. Дядьөыскөд тшөтш, медем водзө туйсө сылысь юавны, петі и ме.

— Этайө туйөдыс чой горувсө и лэччы. Марпа Петровнаыслөн туй помас, дзик ты дінас керкаыс, шуйгавывланыс... Рытнас, мөдөдчысь кө, эн сөрмөдчы поезд вылас.

Аттьөалі бур дядьөсө да мөдөдчи вөла туйөд чой горув. Ылын водзын, асья югыдас, тыдовтчис помтөм-дортөм лымһя эрд.

«Тайө и эм, сідзкө, Сімдор тыыс,— вежөрти.— И збыльысь саридз!» Водзас берег ни вөртас оз тыдав. Грездланһыс тыыс векнялө. Өтар-мөдар берегһыс вылас — парма вөр. Водз на, да тэрмасьны некытчө. Вуджи грездсө, лэччылі ты дінас.

«А өна жө нин мича места вичмөма татчөс войтырыслы!— вежаланаа мөвпыштсис.— Миян Митерас грезд зэв жө мича местаын пукалө. Тулысын кильчө вылө петан да гөгөр тар кургөм да чушкөм кылө, но татшөм тыыс абу».

Саридздорса мичлуннас нимкодһысигкоста мыччысис да вы-

лөдзкодъ нин кыпөдчис шоңді. Позьё, сідзкө, и могөн индөм керкаас пыравны: абу нин войын, йөз узигас, ветлысь кодъ. Тэрмасътөг кайи лажмыд кырийөд, кежи восьса дзирьяа керкалань. Шөр арлыда нывбаба кильчө бокас поткөдліс пес.

— Ен отсөгөн, жар пес, Марпа Петровна!— пöрысь йөзөн велөдөм ног чолөмаси нывбабаыскөд.

— Лок видза, лок! Ылысса ли матысса гөсьт?— видзаасис көзьяка.

— А кыз өд шуны? Тöрыт рыгнас гортын на вöлі, а талун асывнас со тиянын нин... Эжва берегсянь... Айкатыласө, кыз пöчьяс шуоны, кывывлінныд?

— Кывлі и воывлі. Абу ылын, но абу и матын. Ичөт на, а кузь кока нин, сідзкө. Вой костөн кө татшөм вөлөксө сяммин вуджны.

— Поездьясыс тай өдйө вайөдөны. Бур йөзых, кытчө колө, туйсө индөны и...

— Но, туй морт, пырам, сідзкө, керкаө. Шойччыштны-шонтысьны и нурьясьыштны кузь вөлөк бөрад колө,— көзьякаыс лэдзис кысьыс черсө чуркаяс бокас да ас бөрсяыс корис пырны керкаас.

Пелькиник, электролампаөн югдөдөм жыр. Мөд жырйыс — восьса өдзөс саяс. Сэні пемыд.

— Югд тиян, электричествонад. Ми карасина лампаөн на олам,— вежалөмөн ошкыштөмөй лои.

— Югдөдісны вөр лэдзысьясыд,— көзьякаыс юрсө суйліс мөд жырьяс, чукөстіс:— Ма-шө-ө! Чеччы! Жөникыд юр вылад...

«Хы-хы-хы-хы!»— серам петіс. Венялөн мамыс тадзи жө Магдалина нывсө садьмөдіс.

— Сөмын на югдө да,— кыліс пытшкөсса өдзөс сайсяньыс.— Талун өд шойччан лун...

— Шойчча-а-ан... Пес колө поткөдлыштны... Вадорө лэччывны... Гымгаяс вежон лэптывтөмөсь...

— Но, вит минут, мамө?..

— Гөсьт воис... Чеччы... Жөникыд...— нывбаба гылыда серөктіс.

— А-а-а... Но, но... Чечча, чечча...

— Асья унма!— вашгялө керкаса көзьяка.— Көть вой шөрөдз пукалас, а асывнас он садьмөд.

Маша, Марпа Петровналөн быдтасыс, ар дас вита нывка, быйкнитіс пыді жырсьыс.

— А-а-а! Чолөм! Кутшөм жө, мися, жөник?— серөктіс менө адзөм бөрын.— Кыз нө нимыд?

— Па-а-ша,— яндысьөмөн висьтасы, а юрө воис: «Но-о-о, татшөм збойыд куляс и вочас, невеста туйө кө быттё! Миян класса нывкаяс рамөсь... А мича-а-а!»

Татшөм шыасьөмсьыс, да нөшта и нывлөн мичлунсьыс, кывворөс вошти. Пызан сайын — адзывлыгөм сөян: чөскыд юква, пражитөм чери, ёкыша-сира черинянь. Кывйөй ньылыштчас. Но зэв родөмөн сөя... А Машаыс... Збой, дерт, но мича, көть синтө эн вештыв сы вылысь. Гөтрасьны кө сы вылө — непөштө банйыштөм нин морөссө видлөмысь, видзөдлөмнас пөтан.

— Тэ, Паша, сөй, сөй! Миян чериа вөлөгаыд уровью! Төда, мыйла локтін... Могмөдам... Сөй, а сэссия шойччыштан...

— Немысь мудзнысö... Пестö тай шуинныд... Öтвылысьнад öдйö меститам. Поткөдчынытö öд сямма...

— Но, сідзкө, и сөй топыда!— лөньюдö яндысьомöс көзьяйка.— Коді пö кызди сөйö, сідзи и уджалö, шулöмаöсь.

— Миян сідзи жö шуöны!— петіс серамöй аныслөн кывберитöм вылö да чериняньсö родтөгджык нин куті чеплявны.

Пессö поткөддыны босытчи да öтчыд дай мöдысь колунөн чуркаас эг веськав: са-ап! чурка боктіыс öдöба лымъяс керыштсьö. Мича Машаыс, дерт, мыжа: видзöдö да кутшöм нö удж артмас!

— Ö-ö-хö-хö! Вай ме поткөдча, Паша, а тэ чипасö тэч,— серöктіс Маша.

— Эн-н-лы-ы... Видзöдан да вомдзавлан, буди... Вешйыштлы... Чурка-мöдысь клинъяс артмалісны.

— Вай ме поткөдча!— оз лэдзчысь нывкаыс.— Ошйысян... Абу поткөдчывлöмыд...

— Мун эськө керкаад!— янöдіс да, синйö да — удж оз артмы.

— Но, но! Пырала,— пыльсьялö.

Öтнам вит минут кежлö и кольлі — поткөдлöм пескыс торкасьны нин кутіс. Вештавны нин колö. Черыс кивыв лöсяліс и. Шоналі... Пинжакöс пöрччи... Кыз да пожöм чуркаясыс сöмын и бринакылöны.

— Артмö тай, вölöм,— эз нин килькъяв Маша, кор петіс мамыскöд пессö тэчны.

— Чер воропас öд велавны на колö, а нöшта и кыйöдчан...

— Но... Ог, ог сэсса... Поткөдчы, а ми чипасö тэчны кутам.

Лун шöр гөгöрын кильчö дорыс куш нин вöлі. Пажнайтім. Пötöс, чöскыд сөян. Чериа вölöга кыңзди и яя шыд вöлі, но кийй чери латкаланьыс тшöкыдджыка нюжöдчö: яя сөян и гортын пулöны, а чериыс сöмын лавкаса, сола треска.

Пажын бöрын Марпа Петровна лöсьöдіс вель тöрмөна воръя ичöтик дадь, кильчö вылас петкөдіс пыридз.

— Ветламöй сэсса и кыясны.

— Медыджыд чериыс, гымгаяссьыс кодöс перъям — Пашалы уджсьыс козин,— вашгялö Маша.— Мед эськө сир!

— Оз ков... Видзöддыны окота, кыз кыйсянныд...

Ки вомлöс кызта йи йöрдангьяссö вевттьöма. Пыридзалим, восьталім йöрдангьяс. Нель гымга... Öтиöс, мöдöс, коймöдöс кыпöдлім. Ведра кык чунь кузьята йöрш да весьт кузьята куим ёкыш пырöмаöсь.

— Оз талун кыйсьöд,— нормыштіс Маша.— Пашалы эськө...

— Йöршыс уна, а гырысь чериыс гежöдджыка пыравлö,— меным моз висьталіс Марпа Петровна.— Тöвнад найö гуынöсь... Кодкө нин вöтчылас посниясылөн кельöб бöрсяыс.

Нельöд гымгаыс кыйдöса вölöма. Шор вомö сійöс вöйтлöмась. Йöршыс — матö ведра жö, да нöшта и сой кузья сир. Чигья... Кило куима, буди...

Маша весиг йöктыштіс:

— О-о-о, татшöмыс важöнкодъ нин эз шедлы!

— Ваыс вежсьö, садьмö чериыс,— нюмдіс Марпа Петровна.

Гымгаяс бöр вöйталім. Катöдім чери дадь. Куим час лун. Колö ньöбасьны. Петі кильчö вылас. Резьöді зептысь вылыс

вурөссө, перийи деньга. Поезд билет вылө кольыштї, а папушасө гач зептө суйи да бөр пыри керкаас.

— Кос чериторто та дон вузальштөй. Со деньгаыс... Мыйта сетанныд сы доныс...

— Аминьой! Тани кык ведра дон!— кыпөдіс синъяссө Марпа Петровна.

— Ы?— артмис менам.— Килограммсө өти тьөтө миян комын вит шайтысь вузалө...

— А ен төдтөм ань тай!— шлапкис кинас пидзөсас Марпа Петровна.— Дас шайтөн kilosө пыр на сетали... И мукөдыс сідз жө... Дивө тай!

— Керөсса Марья, ылыс рөд на, ёна и повзөддіс: ылын пө, поезд билет вылө колө мынтысьны, тюрьма-лагер пыр ветлыны...

— Мед нө... Бурөсь миян тани йөзыс... Немысь повнысө... Но, пукалоны... Вөр лэдзөны, а эз на кывсьыв, мед кодөскө грабитісны... Волас коркө! Вузала сылы нөшта! Удта на и, мед грездаяс бөр тыртөг мөдөдөны! Куим дон кульө! Тыпу! Дас шайт! Мөд дон миян грездын некодлөн абу!

Кык ведра кос чериыс куль джын лои. И деньгаөй на коли. Марпа Петровна коляссө бөр мыччө. Эг босыт да бара на ведра джын содтис, а сэсса и нель весьта сирсө, выльөн кыйөмасө, рузумө гаровтис да ноппө суйө.

— Оз ков, оз!— пыкся.

— Отсасин! Колө! Ен отсөгөн, гымгаясыс и өни кыйөны.

— Босыт, босыт!— суйсис мам сёрниас и Маша нылыс.— Ме тай шулі: кыйдөссьыс медаджыд ловсө тэныд!

Дон мынтытөг яндзим та ыджда чери босытны, но керкаса көзьякаыс суйис нин тубыртөм сирсө ноппө, көрталіс сепысөс вывсыяныс, а сэсса бара шлопнитис кимөдзнас пидзөсас:

— Но и юр! Туйыд өд кузь. Аски рытланьыс сөмын воан гортад!— ветліс инпөлас да черинянь вайө.— Тайө туй вылад,..— и юавтөг ноппө жө суйис.

Чукөртчөм-ноксьөмнад кадыс өдйө кольө. Квайтөд час нин...

— Мөдысь бара на волы, бур зонка,— корө Марпа Петровна.

— Гожөмнас волы, гожөмнас!— шыасис и Маша.— Каникуляс дырйиыд. Сэки пыжсянь кыйсьыштам...

— Окота эськө, но ог куж...

— Хы! Ме велөда...

— Но, инө, слөймөдчыла... Мича тани вөр-ваыс...

— Мича,— гогнитис юрнас Маша.— Волы...

— Но...

Вөр лэдзысьяслөн поездөдз Маша кольөдіс.

— Ме тэныд гижа, Маша, позьө кө?

— Гиж...

— А овыд нө кыдзи?

— Максарова... Маша Максарова... Гиж... Гожөмнас волы сэсса и чери кыйны...

— Но... Вола...

Бур дядьөыс, кодкөд водз асывнас вагонас орччөн пукалім, аддзис менө да бара ас дінас чукөстіс. Орччөн, өти пуклөс вылын и мөдөдчим.

- Но, сюри ньобасыд?— нюмпырысь юалё.
- Кыскымён... Марпа Петровна тэчө и тэчө...
- Бур нывбаба,— ыджыда ышловзис дядьыс, а сэсса, мед, буди, ог гөгөрво мыйла ышловзис, юалис:— А кыдзи нө нимыд, пиё?
- Паша.
- Менө Тимофейён шуоны.
- Выльысь на волыны корисны гожомнас. Машаыс чери кыйны корис.
- И волы...
- Май помас ме этайё бушлатсө пөрчча да отлаын на, гашкө, и петалам кыйсьынысө? Ставыс кө, дерт, лад лоё?
- Симдор посёлокас Тимофей пыртөдис менө кутшөмкө тьөтө ордө.
- Узьтөд тайё зонкасө, Нина Ивановна. Сылы Микуньөдз.
- Мед узьё... Патератө мортыд сьорас оз новлөдды. Отнам тай, төрам.
- Аскинас Нина Ивановна, муртса на югдыштө, чуксалис. Чайён юктөдис. Ме сылы кос черитор кольышти. Оз вөлі босьт, но өд сетөмасыс оз бөрыньтчивны...
- Но, сэсса мун... Котлас поездөдзыс час джын коли. Көртран станцияөдзыс, билеттө ньобан — воас поездыс.
- Вокзалас морт эз вөв. Весиг шензьышти:
- «Татчөс йөзыс нө некытчө оз ветлывны ли мый?»
- Ньөби билет, здук виччысьышти, и Вөркута—Котлас поезд воис. Вагонас йөзыс этша. Ыджыд ноппён пыдидөдзыс эг мун да купекодяс отнам и лои. Отар-мөдар пуклөсьясыс дзик прөстөсь.
- «Но станцияссө, кыті прөйдитам, лун югыднас видзөдала, нимьяссө лыддяла... Абу лёк и төдны, выльысь кө волөм лоё»,— ас кежын мөвпала.
- Недыр отнам муні. Куим зон воисны. Мемысь верстьөдждыкөсь. Пыр и кылі-казялі: мисьтөм сёрниаөсь.
- О-о-о! Кореш кытчөкө мөдөдчөма?— былькнитліс наян синьяснас медичөт тушааыс.— Вузасыны?
- О-ог,.. гортө...
- Мый нө нопъяд?
- Нем абу...
- Хы! Абу пө? Мешөкыс тыр, а шуө: нем абу...
- Но, чери... Ньобасыны ветлі...
- Сэк кості шөркост тушааыс зепсьыс карті колода кыскис.
- Вешйөй пызанланьыс, картіасямөй.
- Көсий чечыны өшинь дорсьыс, но ичөт тушааыс оз лэдз.
- Ми сөмын куимөн, а ворсөны нельөн...
- От сяммы...
- Велөдам...
- От көсий...
- Пикө вои. Петны оз лэдзны. Картіөн мырдөн тшөктөны ворсны.
- Ворс. Уна денга воан,— верзилө кодыс сёрниө пырөдчис.
- Менам грөш абу.
- Водзөсавла... Воан — мынтан...
- «Вөлись тай шпана гыжъяд веськалі!»— ёна повзи, көть лёкгоршөн горзы, а лоё-ө кодкө отсалысьыс?

— Тi ворсöй, ог кут торкасьны, но ме ог ворс,— пикö воöма, пыкся.

Дыр-ö эськö тадзи ковмис вензыны, кызди эськö сямми тайö шпанаяссьыс мынтöдчыны, ог тöд. Чери ноп бурөн, дерт, эськö эг сет, а сьылтшуптö кö сетасны? Унмовся — чери ноппöс сы мында и аддзыла... Но Енмыс, кыз шуласны, вöлöма на...

— Билетъяс, билетъяс дасътöй!— вагонöд тэрмасьöмөн вуджöртис проводницаыс, а здук мысти и ревизорыс, мусюр кодь дядьö, миян дiнö воис.

— Билетъяснытö?— нюжöдiс кисö.

Зонъяс öдйö дзевисны картiсö, мыччисны билетъяснысö. Ревизор компостер-кльöщинас тшолкöдiс картонторъяссö, мелань нюжöдiс кисö:

— Билет?

— Менам абу,— лöсьöдöм усьöм гөлöсөн вочавидзи. Öд кымынысь Микуньö пызла кайлим, тöда: ревизоръяс оз шыльöдны юрöдыс «кöчьястö». Нуöдасны сьöрсьыныс да мичаа и штрапуйтасны. А меным сийö мездлунөн вöли... Колiс кызкö мынтöдчыны шпана-зонъяссьыс...

— Абу кö — штрап!

— Хе! «Кö-ö-öч!» «Кö-ö-öч!»— вежыньтлiс вомсö менö öшинь дорö йöршитысь зонмыс.

— Мунам мекöд,— юрнас докнитöмөн мурöстыштiс ревизор.— Кöлуйыд эм? Босьт... Мöдiм... Проводник! Вагонад «кöч». Мыйла лэдзин?

— Эз вöv некутшöм «кöч».

— А этайö нö?

— Билета, буди, вöли?

— Эм билетыд?— юалiс ревизор.

— Абу...

— Билета вöли!— проводница вылас нин кыпöдiс дöзмöм гөлöссö ревизор.— Восьтлы купетö, рöзберитчам.

Пыртöдiсны проводница жырийö.

— Кытысянь, кытчöдз туй кутан?

— Синдорсянь — Микуньöдз...

— Билеттöг? «Кöчөн?»

— Билетөн...

— Ог аддзы!

Лукйысьышти пинжак пытшкöс зептын, перйи билет. Ревизор кыпöдлiс картон рöчсö öшинь югыдлань.

— Хы! Талунья... Миян поездö... Синдор—Микунь...

— Ме тай шулi: некутшöм «кöч» вагонын абу!— югдiс проводницалөн чужöмыс.

— Мый нö менö бöбйöдлан?— дöзмöмөн видзöдлiс ме вылö ревизор, но ассьыс уджсö тöдö: клотшнитiс кльöщи-компостернас, розьöдiс билетöс.

— Эсийö зоньясыс мырдөн картiөн ворсöдöны, а ме ог кöсйы... Ог и тöд весиг найöс... Йöртiсны öшинь дорас, петны оз лэдзны.

— А-а-а! Со мыйын делöыс! Мед, сiдзкö, тэ дiнын и муно зонкаыс Микуньöдзыс,— тайö проводницаыслы нин шуис.— А на-

йӱс,— индӱс кинас вагон мӱдар помланьыс,— Княжпогостын чеччӱд. Сэтчӱдз билетныс. Нем вӱчны ог вермы — билетаӱс. Пукав танӱ Микуньӱдзид...

Микуньын Айкинаӱ лӱччыс лунъя поездсӱ на суи да Митерас переездӱдз лючки-бура вои, а сӱтысянь гортӱдз — нимко-дӱйла коклябӱрӱй мышкӱ инмалӱ — котӱрӱн: эг воштыс и ноп тыр чери вая!

Маша Максаровалы дасыс унджык письмӱ гижлӱ. Радейта, мися, гожӱм пуксьӱмсӱ виччыны ог вермы... Но письмӱяссӱ сӱдзи эг и мӱдӱдлы. Куимӱс, весиг конвертасӱ нин, клеитӱмасӱ — сӱмын пошта кудйӱ сӱйны — косявлӱ.

Яндзим лои... Мый, мися, нылыс ме йылыс шуас эськӱ, йӱйталана письмӱӱс лыддӱм бӱрын. Мӱдыс Сӱмдорӱ чериысла ветлӱмыс сӱсся эз жӱ ло дай. А гашкӱ, и колӱ вӱлӱ ветлыны? Код тӱдас.

## Дозмӱркаын

### ВИСЬТ

Зьвиженнӱ празьник рытъяӱ Венякӱд школаыс Митерасӱ каям.

— Ве-ень? Опонь дедыд тай вензьыліс кольӱм вося Пӱкрӱв лунӱ Тыдор грездса Силько Ванькӱд? Пӱмнитан?

— Ёнмӱдӱм суртӱ юӱм бӱрын свӱякъяс, кык дед, позьӱ шуны, паччӱр нин сӱмын пӱжӱны, но ошйысӱны на вӱвлӱм сямнас ӱта-мӱд водзас — инӱ-артӱ ог босыт налыс вензьӱмсӱ. Дедлӱн бердашыс менам нин, позьӱ шуны...

— Силько Вань уна йӱра пӱ кыйлӱма, ошйысис, а тӱнад Опонь дедыд оз сетчы: «А тӱ ме мында пӱткасӱ непӱштӱ эн кыйлывлы, кӱть ме и эг вӱв горшасьыс,— эн весиг аддзыв!— дедыд шуис.— Йӱраыд мый? Вӱрса мӱс. А дозмӱр-тарыд — чӱскыд вӱлӱга, ӱдйӱ рӱдмана пӱтка. Кольны кӱ гозйӱн позьыс — ун-на кӱленаӱс вердас на. Миян матӱгӱгӱрын сьӱла-тар, дозмӱрыд тырмӱ, но тӱ, Силько Вань, пӱтка сарствосӱ, кӱть сизимдас во олӱн,— эн аддзыв! Йӱра яйыд — война кадӱ пыкӱд вӱвлӱ».

«А быттьӱ уна пӱтка, Опонасей Иванӱвич, и тӱ кыйлӱн?— Силько Вань дорйысис.— Сӱктӱ кыйлӱм, кодлы мый мойвиис. Тшыгъялісны ӱд... Но висьтав: эм кӱнкӱ матӱгӱгӱрын яг, кӱнӱ пӱткаясыс борд на борд?»

«Эм! Кӱрыма местаын... Сэтчӱс ягас — пев пом гырся бур пув, а нюрас гырысьыс-гырыс турипув...»

«И кӱнӱ нӱ сӱтшӱм благодатыс миян пармаын?»— юалӱс сӱки Силько Вань.

«Тянясянь он во... Дозмӱркаын... Тянӱ нюр кокыс петӱ: тодья-кадья. Сӱнӱ, тянладорас, ни вотӱс, ни звер-пӱтка...»

— Кывлӱн, Веня, дедушыдлыс Дозмӱрка йывсьыс?

— Гажмыштӱм юрнад мыйӱн оз ошйысӱны пӱрысьысда да? Ставсӱ кӱ артӱ босытны...

— А ме чайта: Опонь дедыд збыльтор висьталӱс.

— Ошйысьны сійö и збыль оз радейт, но «бöж вылас кö тальчасны!»— серöктіс Веня.— Сэки и сёрниа, и сяма...

— А вай тальчöдам!

— Кыдзкö?

— Зьвиженнö лунö кык пöрысь öтлаын, тiянын мöдасны пукавны... Силько Ваньыс гöститны öд волас... Кода суртö юыштасны да сэки и панам сёрни... Пöльяс ошйысьны кутасны — сöмын кывзы, а сэсса и Дозмөрка йывсьыс, гашкö, мыйкö дедсянныд тöдмалам.

— Артмас кö мыйкö?

Празьник лунö быдöн ордын керка тыр гöсьт. Рыгнас Веня-ясö петі. Опонь дед да Силько Вань пызан сайысь чеччöмаöсьнин. Ас табак куритöны, кода сур яндöваысь видлышталöны. Пöльяслөн пармаас петавлöмыс бөръя кадас гежöда нин да сöмын матігөгөрö вöвліс, но казтыланторйыс таысь абу чинöма.

Силько Вань уна йöра кыйöмөн ошйысьö. Венялөн дедыс — пöткаөн.

— Сурнад, Вень, дедъяссö юктöдышт,— шöпниті ёртлы,— мед варовмöны...

Опонь дед яндöва джынсö лолышттöг ректіс. Коляссö мыччис Силько Ваньлы, кабырнас вартіс пидзöсас:

— Ме, сватö, Дозмөркаын вöвлі... Кыкысь на!— некод вылö нин оз видзöд, öзъян синъясөн важсö казтылö Опонь дед.— Ване Вась Öльöш нуöдліс. Митерас пыр, Ванюк туйті...— Шожымка юсö вуджим... Нöшта верст дас вит матка\* серти тшем парма вöрсö юковтім... Паськыд, помтöм кузь дон нюр вылö, шöрланьыс ни öти пу, петім... Мöдар берегыс — верст джын ылнаын... А кузьтаыс!.. Луныввлань ни войыввлань син оз судз... Тыдорса нёколаыд, буди, помыс... Матыстчим — ягсьыс повзöдыгтöм, мортсö адзывылыгтöм тарыс кымөр мында кыпöдчис. Лыйим морт öти тарөн, а лыйöм шыысь кыпöдчисны-кыпöдчисны нюрсьыс дозмөръясыс! Коді öтарö, коді мöдарö. Тшöтш и миянлань. Öтиөн морт вылö бара уськөдім. Узим коз улын, вöрас пырыштöмөн, бипур дорын. Аскинас бара, му-урт-са югдö, ты берег вылас петім. Бара дозмөрөн-тарөн лыйим... А ягас пувйыс! Нюрас турипувйыс! Пöттöдз вотчим!

Гортö лэччыны — кызь сайö верст... Муртса и воим сьöкыд нопъяснаным...

— Сэсса нö сэтчö вотчыны ни вöравны эн и ветлöй?— юалис Веня да мыччис дедыслы яндöва тыр сур.

— А кыз жö!— сурсö юыштöм бöрын зырыштіс морöс бердсö Опонь дед да мыччис яндöвасö Силько Ваньлы.— Ветлім... Тökötтьö эг вöй, загреки! Тыыс «синъяса» вөлöма... Вутшкыс пöръяліс да коскөдз дзумгысьлі! Бур, мый Öльöксьöй дед эз шöйöвош: перйис козъянсьыс лэчыд черсö, сап-сап керыштіс вöсныдик пожöмö да ме вылö и пөрөдіс... «Кутчысь»,— горөдіс... Шашаритчи пу йылас, да мортыд кыскис... А нёняліс эськö зыбуныс, ой, ой, стракыс...

— Шожымкаас турун туйыс, дедуш, Ванюк нырдö петкөдö... Пашököд сэнi кык гожöм нин тшöтш пуктысим... Дозмөркаыс, сідзкö, водзын на, нырд саяс?

— Да-а, верст дас вит нöшта. А? Ноко! Он-ö көсйöй ветлыны?!

\* Матка — важ нога компас.

— Да ог мунёй, дедуш, ог!— эскөдiм да, медем кусодны та-  
йё сёрнисё, Веня лагунсыс бара на сур яндөва вайис.

— Пасьясь, мый он мунёй?

— Исьтиннө крест, ог мунёй!— Веня, а сэсся и ме чөвтим  
пернапас.

Пөткаөн озыр Дозмөрка йылысь сёрни ни Венякөд, ни Опонь  
дедкөд сэсся эг панлы. Мый весьшөрөсө больгыны. Сы ылнаас,  
кызь сайё верст пө сэтчөдз, ветлынысё кад колө. Велөдчигад,  
өти вөскресенньонад он прөймитчы. Лун куим кө эськө? Вөс-  
кресенньонас Чумана шор да Степ шор бокъясын, гортсянь ма-  
тын вөралыштлим. И, дерт, арся каникуляс ёна виччыси... Ог  
төд, кызди Веня, а менам вежөрысь Дозмөркаө ветлан мөвп эз  
куслы. Виччысигад кадыс зэв ньөжйө мунө, но коркө и кани-  
куляс воисны.

— Ве-ень? Дозмөркаас нө тэа-меа ветлысьясыс лоам-ө?—  
юалі ёртлысь школаысь кайигөн.— Аски өд каникуляс. Ветлам?

Веня сизимөд классын велөдчис, мужик нин, позьё шуны,  
ружьеөн куим-нель ар да тулыс нин вөдитчө. Дедыслөннас, дерт,  
кор сетас матигөгөр рас гөгөртны, сьёла кыйө. Ме витөдө вуджи.  
Пищаль тулка, двадцатка, ньөби жө кольөм гожом. Сьёланас  
гортсясөс чөсмөдлі нин. Сямөй этша на, но Венякөд и морт  
жө нин...

— Быттьө пельтөм, он и кыв?— мөдысь юалі, чөв оло ёртөй  
да.

— Кыла, но и мый?

— Дозмөркаас тэа-меа коркө веськөдчылам-ө?

— Кольөм восясьыд, Шожымкатыд тай кывтлим... Эз сюрлы  
небыдінад?

— Эз. Ме өд висьталі: Никөнор пывсянын узим... Асыв-  
рытсө куръя дорын лабазын чөж кыйөдiм. Дарья Коль эськө  
коркө висьталөма: «Кылөдчөмны кык зонка пурйөн. Көрыма  
вайисны» — Дарья Коль абу тшөктөма виднысө...

Веня ас кежас мыйкө мөвпаліс вель дыр.

— Мекөд сэсся ыліас полан ветлыны?

— Нинөмысь ме ог пов! Но тэ кутшөмкө, быттьө, кычи кодь!  
Быдлаө окотитан, а сям ни пельклун! Велөдтөм кычан кодь.

— Быдмыштөмыд тай! Дедушыдлөн кө пищальыс эз вөв —  
вөралысьыс эськө тэысь?

— Тэ эськө, Пашө, сира прать! Көвъясян — тэысь он мын.

— А мый? Ветлам, дай ветлөма лоө... Аслыд өд, көнкө, окота  
жө?

— Окота, окота!— гылыда серөктіс Веня.— Ветлам и эм.  
Вөрад, майбыр, ог вошөй. Дедушлысь маткасө босьтла. Чукөрт  
ноптө гусьоник, мед оз казьяв мамыд, мый сёянтө уна босьтан.  
Лун куим-нель кежлө няныд ковмас, көрыш кык...

— Квайт көрыш со мышнопйын... Кыксө талун дзеба да мам  
оз и төдлы, уна-ө ньөблі.

— Мед төдлас кө. Шожымка ю дорө, висьтась, узылөмөн,  
лун куим кежлө мунам...

— Но, позьё и сідз висьтасьны... Никөнор пывсянад унаысь  
узылім... Сэтчө лэдзасны...

Сизим верстыд том кокъяслы абу мунантор. Лун шөрын  
Шожымка берегын нин вөлім. Ю дорас петтөдз Никөнор вөр

керкаторйö пырим. Съод пывсян, из горъя юр сюянин... Морт нельлы войся лэбув. Мездысим нопъясысь. Вöрас петим. Веня — дедыслөн 28 калибра берданкаа, ме — 20 калибра тулка пищала, съола чипсана. Венялөн Лыскоыс ур нин аддзöма, камгö-увтö.

— Талун огö урасьöй. Мöдiм, Лыско,— чукöстiс понсö том кöзяин.

Кык съолаöс Веня лыйис. Нель литр төрмöна пöртйö и öти съолаыс эськö кöрсö сетiс, но Веня кыкнан съоласö дзумгис.

— Öтиыс эськö...

— Аски — бара Ен,— дедуш шусьöгнас вочавидзис.

Шыд пусис. Нопйöс босьтi, а сйö лысьтö проса шыдöсөн!

— Аминьöй дай, Веня! Мышнопйöс шыр кералöма!

Веня аслас мышнопъяс кутчысис:

— Менсьым абу вöрзьöдлöмны... Сiдзи и колö тэд! Мед тувъяс öшöдiн дай! Аддзöмыд! Нар пельöсö брутнитны!

— А тэ эськö... Мед висьталiн дай! Сюсь вöралысь кö! Чайтлi нö: шыръяс!

— Найö быдлаын олöны... Прöмышляйтöны, мый сюрö, тэ кодь йöйсö велöдöны...

Проса шыдöс, гашкö, джынйыс кос туруна джоджас киссис. Мöс вый — стеклö банкаын, сов-сакар — банкаын жö. Сэтчö вöрса «кöрт ныра» шыръяс абу ликмылöмаöсь, нянь — пöдушка кышöдын, торйөн — муртса кöрыш помсö йирыштöмаöсь... Абу ыджыд ускöттö... Мышноп жаль. Боктиыс бумазея матерйöас кык ичöтик розь вöчöмаöсь.

— Антусъяс! Öти розыс эз тырмы!— скöрала.

— Колö вöли гижны: «Гусясянныд кö, öти розьтi гусясьöй...»— чиктылö-сералö Веня.

Кос пескөн ломтöм да лöдсавлöм гырысь серöвик изъя гор дзузган кусöдöм бöрын весиг гöрдöв рöма. Дöрöм-гач кежысь асьядорöдзыс узим. Садьмим — вылыс гач да дöрöм кышалiм. Узьыштiм. Пуфайкаасим — бара унмовсим...

— Лöзöдö, Пашö, енэжыс, оз-ö югды?— Веня садьмöма.— Тшай пузьöдам... Коляс шыднымöс шонтам... Нуръясьыштам да пес на ковмас вöчыштны...

— Пе-ес? Мыйлакö пес на дасьтыны? Мöд вой узям ли мый?

— Ломтiм дасьсö... Никöнор воас... Кötасьöма... Съод войнас сылы, мудзыслы, пес ковмас лöсьöдны? А тöдмалас, кодi узис? Аттьöалас?

Югдытöдзыс сёйсис, чай юсис. Кос коз пöрöдiм. Веня пывсян йирк вылас кайлiс,— ставсö öд тöдö,— лучкөвöй пила лэччöдiс, гуджгис-пилитiс посныдик чуркаяс, а ме поткöдлi да пыртлi пывсянö, гор весыт сёр потшгьяс вылас тэчи.

— Кыкысь узьмөн, Веня! Шань, тырмас...

— Но, медъя... Запасыд некор абу вывтi... Нöшта куим чурка артмас...

Югдiс. Чуксасьöны съолаяс. Көнкö ылын кургöны-мургöны таръяс.

— Арнас нö таръясыс койтöны жö?— чуйми.

— Нöшта на кыз!— серöктiс Веня.— Став пöтка-лэбачыс арнад жöника-невестаасьö. Тшöтш и таръяс...

Менам сөмын Дозмөрка йылысь мөвп. И мед эськө Веня эз нуод менө тар койт вылас.

— А Дозмөркаыс? Көні эськө?

— Юасян? Ме быттё тода? Воливлі сэтчө?

— Мый нө эськө локтімсө? Ог и аддзй?

— Корсьлам... Колө Шожымкасө вуджны, а сэссия вөр пыр, кывлін өд, дас вит верст пө.

— А вошам кө?

— Дедөлөн маткаыс сьорысь, а Шожымка ю, бөр кө косам,— кузьсьыс-кузь... Кытчөкө век нин петам. Юыс Айкатыла горувтэ Эжваө усьө... Көсьян — он вош... А мөдарас, йывланьыс, Микунь весьтөдз, весиг Чубйөдз пө катөдө. Вошны некытчө.

Веня кыкис пуфайка пытшкөс морөс зепсьыс маткасө, пуктис мыр вылө, бергөдлыштис сьода-гөрда помьяса стрелкасө... Дзөрис-дзөрис магнита стрелкаыс да сувтис.

— Гөрдыс — лун бан! Школаад велөдлін? Компассө аддзылін?

— Но... — көть уна челядь пельпом сайтэ син пөлөн и аддзылі компассө учитель пызан вылысь. Но лавкаын эз на вузавны, киө эг босылы да компаснас эськө и збыльысь ылали.

— Но?.. Кытчө?

— Тэнад жө маткаыс! Висьтав...

— Сьод стрелка помыс — войвылө индө... Көні, сідзкө, асыввылысь? — пытайтө Веня.

— Асыввывсө тэнад маткатөг важөн тода. Шонділаньыс...

— Но... А бөрсө петам?

— Шондіыс, асылын кө, мышладорын мед вөлі...

— Шондіа луннад и збыльысь компасыд оз ков, а кымөрт-час — колө.

Ставсө лючки лои вөчөма. Огралысь посни шомсө горйысь ваөн кыскалим. Вөр керка өдзөс пыким, мед төлыс гурйив оз вост. Шожымка берегө петим.

Лысколы мый! Пасьыс вурыстөм-кизьястөм: ваө — буз! Здук мысти кодөскө увтөдө нин мөдар берегса ягсьыс.

Йылөдыс Шожымка куим сыв пасьта и эм, но джуджыд. Вуджны позянн корсям, берег пөлөныс вывлань каям. Гашкө, час муним вөр пыр. Вывланяс туруна бечевникьясыс эз нин вөвны. И аддзим: нэмөвөйся пашкыр коз ю вомөныс пласьтнитчөма. Йылыс мөдар берегас. А увьясыс! Сой кызтаөсь, ув вылө ув, он на пискөдчы!

— Керасьыштны, буди, ковмас... Пу вывтис «ордым» пискөдны?

— Тэтөг аддза! — Веня чөвтис нопсө. Патронташа паськыд тасма костсьыс перйис черсө дай вуджалис юсө суп-сап керасьөмөн.

Бөр нопьясис. Вуджам, боклань моз чурвидзысь лапьяссө ме кипырала. Веня — водзын, ме — мыш саяс, воськов костын. Ю шөрасось. Кутчыси сувтсөн моз чурвидзысь увйө, а сийө и нюгыльтчис: сапйөма Веня сой кызта увсө, но черыс абу помөдз прөймитөма. Пөрьялис. Шатовтчи, веськыд киөн Венялысь пельпом вывсьыс пищаль стволсө кватитсис и... ляпмунэ пу вылас, быттё потанө, а берданкаыс сөмын и тульсмунли юас.

— Мый нө вөчин, аминь! — пузис Веня. — Скөтина! Пищальөс вөйтін!

— М...м...м... э-э-э! Нинём эг!— повзи, ёртёй скөрвывсьыс юас пожъялас!— Эн вöйт! Ваас эн тойышт! Пищальыд абу чаг, эз кылав... Вугралам крука беддён...

— Рыбак! Сунсьыв вот!

Недыр вензыштём бöрын Веня керыштіс сыв кык кузъята зіб. Улі помса увъяссьыс артмис весьта вожкаяса, кольтан сяма «багыр». Пыр и крукассис пищальыс тасмаöдыс.

— Но, бöрдін-а!— радла-чиктыла.

Рузумён косьтім-чышкалім пищальсö.

— Код төдö, стволсö вермас косявны!— Веня шыбитіс кө-тасьём патронсö ваö.

Сук козъяса пемыд парматі асъя шонділаньыс мөдöдчим. Шонді югöръяс сöмын пу йывъяссö гөрдöдöны, вөр подулас пемыд, быттьö рöмыд на. Вель дыр мысти водзын югдіс: пöперегөн мунысь көрт туй вылö петім. Эг на и аддзывлы татшöм көрт туйсö. Рельсъясылөн вывадорыс кык чунь пасъята и эм, рельсъяс костыс — öти воськов.

— Но-о! Векни көлея көрт туй со нюжөдöмаöсь,— Веня шуис.

— Мый нö таті ваялöны-нуöны? Кытчö?

— Микуньö либö Чубйö вөр петкөдöны,— стöчмөдіс ёртöй.— Ванюк нырдсянь, Никöнор пывсянсянь вель вылö Шожымка берег кузьяс кайим. Сідзкө, колö бөр лэччыштны километр куим. Тайö туй кузьяс и лэччам, а сэсся, гашкө, прöseка, асыв-вывланьыс писькөдöмаöс, аддзам.

Нöшта неуна муныштім, туй боксьыс дозмөр мөдліс кыпöд-чыны, но мыйлакө лөк ногөн бөр пуксис, уси быттьö.

— Лый, Вень, лый! Лэбас!— гораа шöпкөда ёртлы.— Со нö, пукалö.

— Энлы лыйöмнад. Чайта, петляö шедöма,— но пищальсö киас босьтіс, затворнас клотшнитіс. Матыстчам.

Дозмөр нöшта на көсийліс кыпöдчыны, но налькыйс кутіс, уси гатшөн.

— Ме тай шулі — петляын,— ёртöй кыскыштіс-томналіс затворсö предохранительнас, бөр öшöдіс пищальсö пельпом вылас.— Вöрсö петкөдысьясылөн тайö кыйдöсыс.

Мунігмоз нöшта на öти шедöм вийөрös аддзылім. Эг весиг матыстчылöй. Йöз лэчкысь эг гусясьлöй, төдім: тайö ыджыд мыж.

— Галя изйөн чульнысö тыртны лыа вылас петöны.

Көрт туй боксьыс Венялөн понйыс чукчиös кыпöдіс.

— Корсь, Альчик, корсь!— негораа тшöктіс Веня, да корнин понйыс уськөдчис дозмөр бöрсяыс, пөрчис нопсö.— Увтас кө, ветла да лыа.

Понлы регыд и сюрöма пötкаыд. Ливкйöдлөмөн камгö-увтö.

— Пукавлы тані, пырала.

Недыр кежлö и вошлі — бөрнин петö, а лыйöм эг кывлы.

— Лэбис. Пашкыр пожöмсайса кыддзö пуксьöма, оз вöлі тыдав. Кытшовтыштны мөді, аддзис да лэбис.

— Водзвыв куштін, вот и лэбис... Ветла пö да лыа...

Эг на удитöй нопъясьны, ичötик паровоз воис, вөр тыра платформаяса.

— Лэч туйнымös кыяланьыд, пацанъяс?— машинистыс паровозсö сувтöдіс да юалö.

— О-ог! Дозмөрка пö кöнкö эм. Кöсьям корсьлыны. А тiян лэчьясö кык дозмөр шедöма. Нопным со пöткатöм на, нинöм на эг кыйöй,— Веня, а сэсса и ме разьлiм ноп кöртöдьяс.— Асьным поньяöсь, пищальяöсь. Йöз лэчьяс ог куштöй.

— Но и бур, абу кö гусясьысьяс,— нюмдiс ичöt паровозса машинист.

— А Дозмөркасö, дядьö, он тöдöй, кöни сийö? Кöнкö пö таладорын, а ылын-ö на сэтчöдз, ог тöдöй?— юалис Веня.

— Эг вöвлы сэни, эг кывлы сэтшöм нима сикт-грезд ни посёлок. Тани, матигöгöрын, абу некутшöм олысь ни керка. Вошиньд, зонкаяс? Пуксьöй, нуöда Чубйöдз.

— Айкатыла дорысь ми, Митерасысь. Дозмөркаас вöравны мунам...

— А-а-а! Тадеуш, ноко, мыччысьлы,— бергöдчылис паровоз пытшкыланьыс машинист.— Зонкаяс со вöравны мöдöмаöсь, Дозмөрка юасьöны... Тэ öд кыйсьысь жö...

— Йидэ по железке зь вiрсту три зь гакiм... До вiрстового хопра... Влiво завiртаiтi... Трахту нi, мало троплэна,.. стiзя... Пiхом зь вiрсту дзэнсця... зь гаким... Нэ заплугайтi, шукай троплэна шляхт.

— Мыйкö гөгöрвоин?— юали Венялысь.

— Эг,— вочавидзис ёртöй.— Юала машинистыслысь. Сийö öд гөгöрвоö отсасысьыслысь сёрнисö.

— Ми, дядьö, немтор эг гөгöрвоöй,— шыасис Веня машинист дорас.

— Кöрт туй кузяыс лэчöй куим километр, верстöвöй сюрьясö прöйдитанныд да Дозмөркаланьыд ордым шуйгавыв кутас кежны. Сюся видзöдöй: векньыдик ордымыс, пода туй. Сэтi и мунöй, верст дас сайö на... Эн вошöй!

— Но, гөгöрвоим, бура висьталинньд. А сылысь, отсасысьыдысь... оз рочөн сёрнит да он и гөгöрво...

— Поляк сийö.

— Ув болота хата зь вiрсту... Днювайтi, ночуйтi, нэ запалуйтi! Ще вот: гиблое болото, нэ ходi туды! Ой, гиблое!

— Но, тайöс гөгöрвои,— гогнитiс юрнас Веня, аттьöалис дядьöясöс.

«Ту-у-у-у!»— вöсна тутöстiс паровоз да вөр тыра ичöt платформаяс вөрзисны, öдсö содтöмөн мöдöдчисны Чублань. Виччысьлiм поезд бöж прöйдитöмсö да петiм кöрт туй вылас.

— Бур мортыс индiс, да татысяньтö воам нин,— дөвöльпырысь шуис Веня.— Керка пö эм. Сiдзкö, шоныдiнын и узыны мöдам.

— А ме повзыли: ми кодь зонкаясыдысь, мися, мед оз жö мырддыны пищальяснымöс...

— Колан тэ кодыкö!— син гугнас видзöдлiс ме выlö Веня.— Зэв öд полысь!

Сувтланисянь километр мунiм, мöдöс, коймöд сюрья дорö матысмам, воис пос. Векньыдик ю, позьö шуны, паськыд шор, увтасинöдыс визувтö. Лыа насыпсö, гашкö дас метр джудждаö лэптöмаöсь. Веня тринь-тринь, тринь — шпалысь шпал выlö сöмын и чеччалö — вуджис юсö. Альчикыс, дерт, медводзын... Пырöма нин вөрö да кодöскö увтö.

— Ве-е-е-ня-а! Эн коль! Ме татi ог лысьт вуджнысö. Прö-

пасыт! Уся кӧ, разся та вылнасянныс! Шпал костъясыс абу менам воськовъяс серти...

— А мый нӧ, мыш вылын тӧнӧ вуджӧда?— сералӧ Веня.— Бауӧн вудж, бауӧн!

— Ог лысыт... Нӧшта и нопйӧй да пищальӧй мешайтчӧны... Уся пропасьтас.

— А Пашӧй тэ, дай Пашаӧй! Матӧ тай воин! Он-ӧ кӧсйы бӧр косны?— сералӧ ме вылын ёртӧй, а ме эськӧ, вуджны кӧ кутӧ, и збыльысь пос улас жмоткыси, лы ни ку...

Веня воліс ме дорӧ, босьтіс нопйӧс, пищальӧс.

— Ӧні вуджан?

— Ог, вайлы чертӧ. Пос улас лэчча, эсійӧ вӧснӧдык козсӧ пӧрӧда да сы вывтӧ вуджа.

Керасьӧмнад час джын, гашкӧ, вуджи. Ёртӧй виччӧ менӧ, тешитчӧ-сералӧ.

— Татӧтӧ, эн пов, вуджа. Ветлін эськӧ пон дінад. Эновтас, дыр кӧ он лок сы дінӧ...

— Альчик аддзӧмтортӧ оз эновт, кӧть лунтыр увтас. Вудж вай ӧдйӧджык, ӧтлаын и кежалам.

Кызкӧ-мыйкӧ, Венялӧн серам улын, вуджи.

— Но, ловъя? Сьӧлӧмыд местаын? Эз пот?— пыр на гигзбӧ.— Нопгьясь, сідзкӧ, да мӧдім.

Альчик джуджыд, пашкыр козийӧ увтчис.

— Кучкышт, Пашӧ, пучӧръяс, мед вӧрзяс урыс.

Лӧсыштӧ коз пу дінсӧ да клӧнги чер тышкӧн пучерас.

— Шань! Шань! Вӧрзис, йывланьыс кайыштӧс,— Веня кыпӧдіс пищаль стволсӧ юр вылӧдзис, лыиис.

Альчик вомӧ, муас эз и волы, уси урыс. Веня пӧлыштӧс зверыслысь мыш выв гӧнсӧ бӧж дорсянныс юр чук вылӧдзис.

— Воӧма нин,— перйис пуртсӧ, здукӧн и пӧрччӧдіс урсӧ, яйсӧ понйыслы сетіс. Сійӧ сӧмын куж-кажкерис.

— Но вот, Альчӧ, ичӧт пажына лоин. Корсь уръясӧс и ужын вылад, а миян вылӧ — пӧткаясӧс.

Кыйдӧс аддзӧмысь ошкыштӧм пон нурьясьыштӧм бӧрас нӧшта на кок йыла лоис, чепӧсйис пыді вӧрлань, но Веня сійӧс стрӧгакодъ чукӧстіс.

— Эстчӧ! Эстчӧ мунам, Альчик!— кинас кӧрт туйлань индіс.

Пон люнь-люнькерис бӧжнас — гӧгӧрвои пӧ, котӧртӧс кӧрт туйлань. Муныштӧм нӧшта верст джын — пон быттьӧ дурмис: бергалӧ, кытшлалӧ ӧдйӧ котралӧмӧн, быттьӧ куталӧ кодӧскӧ.

— Мый бара аддзис-а?— юала Венялысь.

— Звер кок туй ли пӧтка дук кылӧ... Видзӧдлам.— Кежис понланьыс.— А-а-а! Дозмӧръяс пуртікасьӧмаӧсь. Налысь дуксӧ и кыліс... Видзӧд, Паша, сюся. Кежан туйным кӧнкӧ матын.

Аддзи. Некымын воськов ылнаын и вӧлӧма.

— Татӧ, буди, миянлы колӧ кежны? Иван-чай турунсӧ лякӧмаӧсь, подмӧдыштӧмаӧсь. Со и понйыд сэтӧ жӧ кежис.

— А надейнӧ, татӧ... Кежам...

Муртса тӧдчана ордымӧд часӧн-джынйӧн кымын мунім. Кӧнъяскӧ и лӧсасъяс паныдасьлісны. Альчик, гашкӧ, дасысь увтчыліс, но ылынкодъ да эг кежавлӧй. Веня перьяс косьыс черсӧ, лӧснитас кызджык пу, клӧнгас чер тышнас куим-нӧльысь — понйыс дугдӧ увтны да здук мысти миян дінын нин.

— Тани, Альчик, ог вөралөй. Ордымнымос воштам.

Ог кежавлөй увтчөм вылас, да пон дышмис. Мый весьшөрөсө увтны, аддзөмасө кө ог көсйөй кыйны?

Туй прөследыс көнкө тыдыштө, а көнкө и дзикөдз вошлө.

— Лөсасъяссө сюся видзөд, Пашө,— чуйдө Вения.— Бура синмав матигөгөрсө и ылысьджык.

Кытөнъяскө, дженьыд яла подъя местаясын, сөмын лөсасъяс кузя и ковмис мунны, но вөчалөмаөсь найөс вывти нин гежөда. Сэки өтиным кольччам важ, сирзьөм нин, сьөдөдөм лөсаса пу динө, а мөдным корсям водзысь паса жө мөд пу. Коркө туясысь чукөстас: «Татчө, татчө! Ло-ок!»

Тадзтө, дерт, зэв дыр да ньөжйө артмө мунөмным, но сы пыдди стөча, колана туй метьсө воштытөг.

— Синмав вот, кор өти лөсасьянныс мөдөдзыс, гашкө, кыксө воськов! Вывти нин гежөд,— норасьөм кодя артмис.

— Абу жө өд йөйөсь, мед бөкөвөй дядьбөлы туй индавны. Асьныс нырвизьсө сяммөны кутны, гоз-мөдысь кө волісны. Весиг сэсся и лөсас ни ордым оз кут ковны, а тэа-меа коддьөмыс кө этшаджыкөн воласны, налы унджык зьвер-пөтка и вотос вичмас.

— А эз-ө ылөддыны миянөс паровозсаыс, Вения?

— Эз, буди.

— Дыр нин мунам да?

— Тайө өмөй мунөм? Кималасөн моз туйсө корсям да...

— Сійөтө эськө и сідз, но код төдас, йөз висьталөм сертиыд? Быдөнлөн аслас мурталан мера,— казгытышті дядьбөыслысь висьталөмсө.

Тайө бөръя сувтлөмсянныс регыд и восьтіс Парма-мамыс помасьлытөм козъя-пожөма отсө. Кайыштім кузякодь вель джуджыд, но лажмыд чой йывлань, муныштім верст джын кымын, да сэки и тыдовтчис гежмалөм пуяс костөд паськыд эрд.

— Воим өд, Пашө, воим!— сывъяліс менө Вения, төкөтбө кок йылысь эз уськөд.

— Кытчө воим? Кытчө?

— Дозмөркаө воим! Доз-мөр-ка-ө-ө! Видзөд со...

— И мый сэні тыдалө?

— Аддзан чой горувланьсыс лөзов кушинсө?

— Но, аддза...

— Нюрыс и эм, лөзалө, енэжыскөд ылын-ылын быттьө отла-асьбө...

— Ы-ы... Сійө кө эськө?

— Сійө! Сійө!

Вөр керкасө, нюрсө син улысь воштывтөг нин, корсьысим. Ме вөр пытшкөсөдыс муна, Вения — нюрладорөдыс кыйкъялөмөн восьлалө.

— Ве-ень, ылын-ө мунан?— тшөкыда чукөстывла, мед ылө бөкө оз мунсы.

— Тани, тани. Орччөнөсь тай, мый быд воськов бөрын горзан?

Вошөмысь төдтөм местаас пола да төддытөг өртлань матыстчыссьбө.

— Меланьсө мыйла матыстчан? Ылітіджык мун!— аддзас маті пуяс сайысь да ылітіджык тшөктө мунны.— Тадзтө, отлаын ветлөдлөмнад, кор аддзам керкасө? Эн пов, он вош.

Час джын, буди, корсьысим, Вениялөн аддзөма.

— Па-а-шө-ө!— горөдіс.— Лок, аддзи узыланіннымөс.

— Локта, локта!— шыаси да шыалөм вылас и веськөдчи.

Веня өшөдөма вөр керка водзладор стенас пищальсө, нопсө. Восьтіс өдзөссө, пытшкас здук жежлө пыраліс.

— Пачыс дзонь, бокъяссө кирпичысь тэчөма, а выліас изъяс — шоньд керка. Пескыс — вой-мөд узыны горвесьтса сёр вылас, пөтөлөкөдз. Талун, сідзкө, пес ог и дасътөй. Югыд би, тыдалө, эм и... Пельөсса пызан вылас телефон батареяяс, пөнарикө кодъ ичөт лампочка — проводъяса и быдөн,— керка пытшкөссянь аддзанасө висьтавлө.— Час, видла, öзйө-ө...

Веня недыр ноксыштис — вөр керка пытшкөсыс югзис...

— А мый, сідзкө? Водз на өд пусыны, водөдчыны дасътысьны?

— Кытшовтлам пармасө...

— Но тэ, сідзкө, Альчикыдкөд кытшовт, а ме нюр дорөдыс увлань лэччыла, турипувъя места корсьла.

Неылөдз и лэччи — вотөсыс пыр гырысьджык, унджык. Көсйи нюрас пырыштыны. Сэни вотөсыс быттьө кисьтөма, но нитшка подыс потан моз лайкъялө, бөр өдйө яг дорас петі. Нөшта горувджык сетчылі — турипувйыс виноград гырся. Чегі нёр — пас вылө, горөдчылі да ёрт дінө яг вылас кайи.

— Талун ог нин вотчы, падъянөс вөр керкаас коли. Кытшовтам өтлаын яг вывсө, видзөдла, бур пувйыс көні унджык.

Корсьны эз и ковмы. Вутшгъяс вылын китыра розъя гырысьсыс-гырысь сьөдгөрд пув. Юмов, кынмавлөм бөрад, быттьө сакара.

— Но и вотчышта жө аски!— нимкодяся.

Гөгралыштім часөн-джынийөн кымын. Альчик волас миян дінө, вөчас кытш да водзө котөртас.

— Корсь, Альчик, корсь миянлы пусьөд. Аслыд вылө ужыныс эм нин, а ми кыйдөстөмөсь на.

«Корсь» шуан да вөралысь понйыд өддзылө исасыны, пыр и вошө син увсьыд.

Пон мыччысьлас, вошлас, а сэссия и «ляв-ляв» сетіс, никсышталөмөн гежөдика увтыштавны кутіс.

— Тарөс увтөдө,— муртса кывмөн висьталіс Веня.

— Увтөм сертиыс төдан?

— Но. Дозмөр вылө кисьтө-увтө, а тар увтөмтө дыр оз кывзы, дөзмас и лэбас. Сюсь пон сійөс оз и шызьөд; сөмын ливзышталө да коркөясө зэв гежөда «ув» да «ув» — гөлөссө кыпөддас. Пукав тані, Паша, чөв-лөня, а ме ветла.

Веня кань моз, кок улас ув оз тратшнит, коз-пожөм понөльясса сайөд артышталөмөн, мөдөдчис понланьыс. Вель дыр ковмас виччысьны. Альчик пыр на лимзышталө. Сідзкө, и пөткаыс пу вылас на пукалө. Вөралысь, тыдалө, оз жө тэрмась. Повзьөднытө өд регыд, а сэссия тартө корсьсөма — сузем лэбас. А лэбөм тар бөрсяыд весиг пон ылөдз оз вөтчыв, гөгөрвоө: вешьшөрө.

Коркө кыліс и лыйөм шы. Котөрти сэтчань. Аддза, Веня сьөд тарөс киас кутө. Мича, крукыля бөжа, син доръясыс, сорсыс кумач гөрд.

— Бур, Альчик, бур! Пусянаөсь лоим,— ошкө понсө ёртөй.— Öні сэссия и узымөдчанинлань позьө веськөдчыны.

Но пон абу на мудзёма котравны-корсысынысё да нёшта на ёти урөс корсис...

Вөр керкаё воём бёрын Вения босытчис куштыны тарсё, а ме ломти пачсё, пёртийөн лэччылі нюрас вала. Нюр ваыд көть эськё и абу шорын визувтысь кодь, но матігөгөрын сійё эз вөв. Немтор. Сөстөм тай. Пёрт тыр да нёшта керка пытшкөссыйс аддзөм куим литра банкаён на катөді. Видлі — юны зэв на и туйё, нюр выв нитш көрыс муртса кылыштё — арся зэр ва.

Тарыс Венялөн куштыссьёма, чишкалёма нин. Дзумгис пёт-касё, вундалыштөмөн, ставнас.

— Отчыдысьён та ыдждасё?

— Нель литр төрмөна пёртгяд — буретш... Аски өд бара кыйсышта. Вёралысь кослунъя шыд оз сөй,— вашгялө.

Пачсё керкасыс кыкысь лөдсавлім.

— Шыдыс эськё пусис нин, но шоныдджык узьны лөё. Шырөм картофельтө пёртгяс пукты. Урьяссө кульшта да сэк кежлө и ужин лөё дась.

Нурьясыштөм бёрын вөр керкаё пырим. Пон, дерт, ывлаын, коз улө аслыс места бөрийс. Ымралө узянінным, жарөдіс, ковмис дөрөм-гачөдз пөрччысыны.

Водігөн нин Вения видзөдліс узьлан нар пельөсын сулалысь йөв бак пытшкө.

— Запасаёсь татчө воливлысыясыс: сукар — бак джынйыс, тубрасьяс нёшта...

— А кодьяс эськө тані кыйсывлөны? Айкатылаысь өдвакө воливлысыяс эмөсь?— юася, быттьө Вения төдө.— Чубсаыс?

— Вөрсө пөрөдөны лагерын пукалысыяс... Найө, вольнөя кодлы позьё ветлыны, кодьяслөн пукалан срокыс помассьёма, да, дерт, и чубсаыс воливлөны. Поезднад нө дыр-ө...

— А шпанаяс кө войнас локтасны? Көрт туй пөлөныс быдлаын лагерьяс... Пышйысыяс?

— Вөрад найө оз локны. Нинөм тані вөчнысө. Пышйөны кө — көрт туй кузя, лунвывлань. Медсясө гожөмын, а өні — ноябр, көдзыд... Сэсся өд миянөс пон видзө... Кыкнанным пищаляөсь... Эн пов нем абусыс... Войнас коді аддзас вөр пөвстсыс ку-тшөмкө керкатор?

— От эськө пов, да сідз тай...

— Вод да узь... Стенладорас көсьян?

— Но.

— Ме, сідзкө, ортсыладорас...

Ывлаө петалім.

— Видз, Альчик, миянөс!— понлы тшөкті.

«Ув-ва-а-а»,— ойксөдіс унзіль понйөс. Сійё чеччыліс, воліс миян дорөдз, а сэсся Вения тшөктіс да бөр муніс шонтөм местаад.

Водім да ёртөй пыр и унмовсис, а ме дыр на бергалі. Жара ломтыссьёма.

Дөрөм-гачөс пөрччи да коркө тай сэсся унмовссьёма жө. Дыр-ө узи, часітөгьд код төдас. Садыми — вөр керка салялыштөма. Майка кежысь и ыркыд нин. Сы вөсна, дерт, и садыми. Дөрөмаси-гачаси да бөр лажынтьчи аслам местаө. А Вения нистө-узьё. Мед. Йирмөгыс босытас да садымас. Асья войнад некутшөм нин полөм шпанаясысь. И пон чөв узьё. Сідзкө, и ывлаас матын некод абу. Бөр унмовси. Ывлаас сьөд пемыд; тшын петан розьсө

тупкигөн сэтчө видзөдлі. Луныс, тыдалө, мича жө лоө. Енэжас кодзувъясыс куньтырасьоны.

Дыр-ө эськө узьсис кузь туй бөрын, ог төд, но Веня садь-мөдіс.

— Чеччы, Пашө, чеччы! Ывлаас лун югыд!

— Ы?— пырсө эг гөгөрво, мыйла төрмөшитөны, коді?

— Чеччы, югдөма нин!

— А-а-а... Но, чечча, чечча дзик пыр,..— но бара на вөр керкаад, сөстөм сынөд вылас да шоныдінас, ойбыртсьылөма, а Веня сы кості рыгтя шыд нин шонтөма, чай пузьөдөма. Чайникыс пызан пельөс ув лабичас вөлөма, өртөй чайсө юигөн нин, кытысь, мися чайникыс, юалі да, висьталіс.

— Збыльсь, сідзкө, воливлана места, дозмукъяс, чайник...

Нуръясьыштөм бөрын петім пармаө. Веня веськыд пельпом вылас берданкаа, ме ружьеөс босьті жө сьорысь. Эг лысьт кольнысө, көть и вотчыны муна. Өд луннас кодкө кө волас, вермас и гусявны. Накөсалі мышкө кыкнан пельпом вомөн, кийн падъян. Чукөраинысь вотчигөн өд пищальөс позьө и пөрчывны, пу ув вылө өшөдлыны.

Кынь-кынь восьлалам. Лысвасьыс небзьөм яла дзебө кок шыяс, быгтьө вольөса джодж вывті көмтөг восьлалам. Төрыгтя турипувъя местаөдз воим. Но вотөссө, уна вөлі-а, талун тусь ог аддзы.

— Ве-ень! Кодкө тай тані вотчөма нин!

— Вотчас кодкө войнас? Водзынджык на, буди?

— Тшук тайө местаыс! Со нө, ньөр на чеглі пасйөд вылө.

— Но-о! Дивө тай! И збыль өд, тусьөдз ставсө куралөмаөсь.

Борд шыясысь друг быгтьө поті нюр вылыс. Воськов кызь сайысь өттшөтш кыпөдчисны, гашкө, кыксө тар. Разі-пели, коді кытчаны лэбисны, тшөтш и миянладорлань.

— Лый, Веня, лы-ый!— горөді.

Но чуймөм морт весиг вунөдіс пищаль йывсьыс, сулаліс восьса вомөн. А таръяслөн борд шыысь нюр выв шөрланьсьыс өти бөрся мөд кыпөдчавны кутісны дозмөръяс. Өти чукчи дзик миян вылө локтө.

Веня сайкалөма нин шөйөвошлөмсыйс, нетшыштіс пельпом сайсыс берданкасө да шковгис-луйис, но эз веськав.

— Да-а! Самолөт! «Дуглас!» Бордьяссө паськөдөма — метрысь отаджык. Аддзылін, Веня, гөныс весиг морөс вылас абу нин сьөд, а кирпич рөма, руд.

— Пөрысь чукчи, ыджада сертиыс тыдалө...

Лыйөм шыысь нюр вывсьыс дыр на, өтиөн-өтиөн, а эз таръяс моз өтчукөрөн, кыпөдчалісны дозмөръяс, чим сьөд вийөръяс, эньясыс — көндозмөръяс. Но эз нин миян дінті, лыян ылаті лэбавны.

— Аэродром! Мый тэ татчө шуан?— шемөсмөма өртөй.— Эта мында пөткаыд абу дивө, мый нюр дорсө куштөмаөсь.

Ме эськө Венялы «луй да луй» горзі, но ачым ружье йылысь вунөді жө. Мыш сайысь эг и судзөдлы, быгтьө пищальтөм.

— Яглань унджыкыс лэбисны. Сэні и гөгралышта, а тэ?

— Вотышта турипувсө, кызд шулім...

Альчик «ляв-ляв» сетіс да вөтчис Веняөн лыйөм чукчи бөрсяыс. Здук и коли — кысьтө-увтө нин, ливкъялө весиг.

— Аадзис со понйыд. Ветлы, а ме нюр бокёдыс горув лэччыла. Ставсё өд эз на кокавны. Сэни и кута вотчыны, а тэ гогральштан да ме дорё и лок.

— Төдөмысь, пуяс вывсьыс сэссия яг вылас лэччасны, пув кокавны. Корсявлам понкөд.

— Мун, мун. Вермас и лэбны чукчиыс, дыр пу вылас оз пукав.

Ёна ылөдз меным эз и ковмы лэччыны. Воис вотёса местаыс, но яг подув дīнас и посниджык, и этшаджык. Кевлі нюрас воськов вит — лайкъялө кок улын, быттьө төв вылын плавк-нитөм чышьян. Дзумгыся — некод оз и аадзы, кытчө и сгиниті. Повзи да бөр яг дорас петі, бара горув лэччышті.

Яла нитшка ягыс дзик нюр дорөдзыс лэччө. Сідзкө, ёна ва-жөн, уна сё во сайын нюр местаас вөлөма ты. Ягбокса пуяс вывсьыс төв нырөн нуома ты вылас коръяс, косъмөм лыс ем, чегъясьөм посни увъяс. Тырөма ва вылыс ёгнас, нитшсялөма, да берег дорсянныс и пожөм пуяс вөвлөм ты вылас мөдөмабсь быдмыны. Төлөн лэбөдөм көйдыссьыс. Но пуясыдлы чорыд подув колө. Быдмөмабсь куим-нель метр судтаө, мукөдыс и джуджыд-джыка, да гырысь вөрө вотөдз и косъмөмабсь. Сой кызта кон-даяс. Эмөсь, дерт, и веж пуяс, но косьмасны жө — зэв нин гежөд лыс емабсь, косъмөм йылабсь нин. А зумыд подула ягас сулалөны сывтыръя пожөмъяс, куимсё во, гашкө быдмөны, но туган йылыс, шапкаыс веж лыска.

Верст джын кымын нөшта лэччи нюр бокёдыс, видзөда: дзик берег дорас, яг подулас коркө быдмывлөм кузьсьыс-кузь пожөм кутшөмкө бушков дырйи пөрөма-пласьтнитчөма нюр вылас пөперегөн. Төв нырыс, кутшөм көть абу вөлөма ён, ба-гатыр пожөмсө мусянныс метр кымын вылнаті чегөма, гашкө пучерыс рыж нин, сись вөлөма, но пожөмтө вужнас абу жө вермөма пешкыльтны.

Увьястөм, кырсьтөм нин пуыс, сисьмөма, сөмын сьөвмөсыс и кольөма. Кадөн нитшсялөма, а сись пу вылас, нитш сорыс вына пөтшва вылад и турипув заыс вужъясьөма-гартчөма. Вотөс тусьыс виноград гырся, сьөдгөрд. Эг босьтыв киө сэтшөм гы-рысь турипувсө, вомө эг суюлы. Сувтлі нюрас вөйөм пу вы-лас — зумыда-ө нитшкыс поньталөма, оз-ө качайтчы. Йылөдзыс эг ветлы. Вотөс вөснаыс некытчө тувчыны. Кайлі ягас, корси сой кызта кос пожөм, пельпомөн мыджсьөмөн, сись дінма да, пөрөді, а сэссия өта-мөд дīнас матө быдмөм пуяс костын чинті йыв и дін — метр куим кузя ён зіб артмис. Мыйкө кө — мез-дас неминучаысь. Повтөг нин и кайи, кыын зібъя да падъяна, пожөм дін вылас. Пищальөс пу ув вылө, торкасьө вотчынысө да, өшөді.

Воті пу вывсьыс дінсянныс йылөдзыс став турипувсө. Гырысь да, майбыр, быд тусь эрд вылын, аадзытөг оз коль. Пу вывсьыс быри, да зіб вылө тальччөмөн и боксьыс тшөтш вотчи. Кыкнан киөн сөмын варсала. Одайө содө гырысь пувнад падъянөй. Шон-дйыс сөмын на рытывыввлань мөдіс видзөдны, этша на и лэч-чыштіс вөртасланныс, нопйө нельөд падъян нин кисьті. Бур кык ведра лөб. Шыръяслысь пыралан розьсө, пуртөн сямөд кульышті да, сійөн тупки. Вотөсыс сэссия сямөдсө личкис да лючки и дзоньмис мешөкөй.

Менам, позьö шуны, талун кежлö вотчыссис. Венялön вöравсьöма жö. Ноп дiнын на вöли нокся — воис.

— Бура, Паша, вотчöмьд,— йöрыша мешöкöс аддзöм бöрын ошкыштiс Веня.— Молодеч!

— Веськалi тай турипувъя местаö да со öтилаясь тайö и чукöрмис. А тэ кыдзи вöралiн? Вотчöмас ылали да öтчыд лыйöм сöмын и кывли.

— Альчик «дугластö» и аддзöма. Лыйи, бордъяс веськалöма да уси, но ловъя, котралö. Мыйöн матыстчам, дугдас котöртнысö, бергöдчас, вомсö паськöдöма, то ме вылö, то пон вылö уськöдчö. Клотшкö чорыд нырнас, китö кö копыштас, вирöдз. Мыйкö и кутасим... Пуфайкаöс сэссия вылысас шыбитi да венiм. Көть мöдысь вöли лый. Вийöр нöшта пон улысь жö лыйи да вит ур, а рытын пуны — тар.

— Но, бура тай прöмышляйтöмьд! И нуръя шыд лöö!

— Сэссия öд он нин вотчы?

— Ог, тырмас. Литра даса ведраön морт вылö лöö.

— Но и мунам, сiдзкö, керкаö.

— Мунам,— нопъяси, мöдöдчим яг вывтiыс.

Вöр керкаын пескыс вöли на. Веня ломтiс пач. Ме лэччылi нюр дорö, мыськалыштi пöрт, паньяс, пöртнас да чайникön ва катi. Ёртöй тарсö куштiс.

— Ме, сiдзкö, пес вöчышта, а тэ пусы.

— Сийö жö вöли кöсья шуны.

Кык вöсньыдик конда пöрöдi, кражъяли, керка дiнö вöрсыйс петкöдi, а сэссия чинталi да шöрипов поткöдi. Вель дыр лоис.

Ужнайтiм топыда, чöскыда.

— Локтöма кö нин та ылнаас, лэбач сарствоас, мый надзтысьнысö! Аски кыйсьыштам на... Чайта, мыйкö и лыйны сюрö. Вой улас, дерт, ог петöй ыли туйö, войковтам на тани, а аскомысь югыштас дай гортö мöдöдчам... Сöглас?

— Юасян! Мен зэв на окота и яг выв пувсö мыйтакö вoтыштны.

— Вотчы. Ми вöралам...

Альчикön увтöдöм дозмöрыс и збыльысь вöлöма нин зэв пöрысь лэбач айön. Вийöрлön, том дозмöрлön, сыйлiсянныс морöс улыс волялö сьöд, а талön весиг зоб улас гöныс кирпич рöма нин. Мыш вылас весьт кузя, сутуга кодь чорыд, сьöдгöрд рöма жö, но вывтi уна и дзык нин еджыд.

— А сьöктаыс! Олыштöма тай йöзön гежöда воывлан местаад!— кыпöдi морöс весьтöдз.— Сьöкы-ыд! Дозмөр-пöль!

Югыдön на ужнайтiм. Веня сэссия лэдзис пöтка сювсö.

— Мед оз лöзöд яйыс,— висьталiс, лэччылiс нюр дорö, нитш катыштiс.

— А нитшсö мыйла?

— Яйыс оз дуксы. Сюв местаас кö ва нитшсö сюялан, пöткаыд вежон кöрсö оз веж. Солавны оз ков.

— Со öд, а эг и кывлы, тадзсö ог вöчлывлöй да...

— Горт дiнад, öти лун кежлö петалигад коланлуныс абу, а ми öд кык сутки на гортö ог воий... Шоныд, вермас и кывтчыны.

Чукчиясöс керöм бöрын ёртöй уръяссö кулис. Альчикыс тшыгмöма да куим ур сёйис, а мый эз быр, коз улас новлис.

— Талун водзджык водам. Горувланьсьыс, кытысянь тай вои,

вель джуджыд кыркөтш аддзылі. Вöрыс гежөд-гежөд, зэв джуджыд пожөмъяса, а подулыс пöшти ялатөм — чав лыа. Пуртікасьомаөсь сэні и таръяс, и дозмөръяс, и сьолаяс... Югдікежлас сэтчө окота ветлыны... Лыаас пөткаясыс «пывсьöны» да тшөтш и чульнысö изйөн тыртöны төв кежлө...

— Шуан жö — пывсьöны,— серөкті.

— А пывсьöны и эм. Пытшъясыс лыанас мездьсьöны. Сійөн и пуртікасьöны.

Мөд войтö вөр керкаын некодыс повтөг-виччысьтөг, садьмывтөг узи. Веня пемыдөн на садьмөдіс.

— Горсö воам да ломтылам. Шыд шонтыштны, чай пузьöддыны. Час-мөд кежлө ветлам. Понйöс ог босьт, керка пытш-кас йөртла, өдзөссö пыкла. Пасьтась да пет вай,— тэрмөдлө Веня.— Енэжыс лөзөдө нин.

— Пемыд на эськө да...

— Сёрмөм дорыс бурджык виччыштны. Пуксям сайöда местаö — пөткаыслыс асья гажсö аддзылам.

Альчик эськө увөстліс, никсыны мөдліс, игналім да, но Веня өлөдіс:

— Куйлы сэні турун вылас! Танөсь лоам, некытчö ог кольöй тэнö!

Лөнис.

— Кывзысьö! Мися, өдзөссö кутас сарпавны, увтны-омлявны?

— Дедуш велөдлөма...

Верст кык сайын и вөлөма Веняөн аддзөм кыркөтшыс. Пемыдөнкодь на сэтчөдз воим. Посни понöльясыс чом кодьос мыйкө вөчим, вит-квайт лыскаджык козпиян нетшыштім да. Регыд чукчияс да ай таръяс воисны. Таръяс кургöны-чушкöны көнкө пуяс вылын, тыдавтөмөсь. Дозмөръяс котсьöны, «тэк-тэк-тэк» койтны быттьö заводитласны. Локтісны и энь пөткаяс. Но на пиыс гежөд и пуксьыліс пу вылө. Уліті лэбөмөн пуртікасянінас и лэчисны. Бордъяснас швачөдчöны, котсьöны. Ай пөткаяс сэсся на дорö жö лэчисны. Видзөдам вöрса аддзывлытөм концертсö, нимкодясям. Югдіс мичаа нин. Збыльыс койт вылын кодь: ай пөткаяс весиг зоб на зоб зургысьласны, косясьöны.

— Но, өтиөн морт вылө, волөм кузя, и позьö,— шөпнитіс Веня.— Регыд нин кыпөдчасны... Вердчыны лэбасны... Ме эсійос, а тэ?

— Этійö тай, медматыссаыс...

— Но...

Лыйөм шы кыкнаннымлөн пöшти өтлаасисны гымыштана горнас. Борд шыяс пармасö шызьөдісны. Öти шөйөвошлөм сьод тар сиськөн вывлань качөдчис да кузь кос йыла пожөм вылө пуксис. Вежи патронös, лыйи — весиг гөнтор эз усь, тар лэбис.

— Проса шыдөснад, буди, зарадитлөмыд?— серөктіс Веня.

— Ылын... Тэд колі лыйны... Берданкаыд ликманаджык.

— Да, важ пицальясыд бурджыкөсь вөлөмны. Но, мый нө, мед олө. Морт öти дозмөрөн асья гаж вывсьыс босьтім — тырмас. Вотчыны, шуан, пув вотны көсьян?

— Колö вотыштны бур пувсö, зэв нин тані гырыс да чөскыд.

— Ме, сідзкө, Альчиккөд кытшовтла на матігөгөрсö.

Вуджим векныдык визир.

— А тайö прöseкыс, Веня, чайта, рытö-асылö? Гортлань... Кöрт туйöдзыс, а гашкö, и Шожымка видз вылöдз на петкöдас? Татi и лэччам гортö, но?

— Ме та йылысь мöвпыштлi нин... Рытö-асылö пармасö юковтö, маткаөн муртавлi.

— А эн и висьтав? Дедад эз казътыштлы визир йывсьыс ни?

— Но, сэжитö... Кор найö татчö волöмаöсь? Ветымын во сайын, кор прöseксö писькöдтöм на вöли...

Шыдөн нуръясьыштöм да чай юыштöм бöрын ме вотны кути яг выв пув, а Веня, понйыскöд,— прöмышляйтны.

Пажын кадысь сёрджык вöли, бөр воисны ме дiнö. Венялөн öти дозмөр лыйöма да квайт ур. Нöшта эськö кыклаын пöтка вылö увтчавлiс, но ылын. Сэсся öд кыскысьнысö абу матын...

— Но, ведрaөн морт вылö турипув да нöшта сы мындаөн жö яг выв пув... Нельöд падъян со, матö джынйыс нин... Отсышт да сэсся öтлаын и мунам.

Веня шапкаас мöдiс вотны, ме дозийö. Здукөн и тыртим падъянös. Восьлалам вөр керкалань. Альчиклөн абу на мудзöма котралöмсьыс, ылыськодъ увгыштöм кывлiс, сэсся борд шыяс. Матö миянсянь сьöд тар пуксис. Ёртöй нетшыштіс пельпом вывсьыс берданкасö да шковгис-луйис.

— Мый сэсся, ачыс кö нин локтіс, он бöрынът,— быттö горшасьöмысь кодкö сійös янöдны кутас.— Рытын пуыштны — буретш...

Нопъяснымös рытсаяныс лöсьöдiм. Веня ыджыд дозмöрсö босьтіс да кык вийöр. Мешöкыс пöшти тырис.

А коляс кык дозмöрыс да яг выв пув менам ноийö бура тöрис. Места на колис и пöртлы, кöрыш нянь на тöрас, кружкаяс.

— А гөнсö пöткаясыслысь кушта, бура сэк тöрас. Дозмөр-ыдлөн гöныс пöдушкаö оз шогмы — кöрт тув кодъ чорыд. Юр-лöсыд бытшласьны кутас.

И куштис куимнансö, бöжъяссö нетшкис перöөн-перöөн. Бордъяснас нопсьыс пöткаяссö вевттис, мед оз вирöссьы сы вылö пуктöм турипув ноийыс. Юрлös кышöдын вотöсыс, нянь да мукöд сёян сылөн сэн вöли, но куим луннад рекмис. Ме кушти жö дозмөръясös, ёртöй моз жö яйсö пöтка бордъяснас вевтти, а сэсся сы вылö и яг выв пув, юрлös кышöдын жö, мешöкö суйи. Мыш выв нопъясным буретш лоисны. Менам — ичöтджык, пöрт, кружка-паньяс, коляс сёянтор сэтчö асывнас местита. Пöтка гөнсö ывлаас биасьлім да сотім. Ягас öд сiдз ог кольöй, шоныд керка дорсö ог пежöсьтöй. Гөгöр пöтка гөн — зэв мисьтöм серпас...

Сёрнитчим да визир кузя, бур туйöд, кокниджык вылö да öдйöджык вылö, югдöм бöрас и мöдöдчим. Кöрт туй вылö петкöдiс, видзöдам — водзö на, мыйта син судзö, нуöдö.

— Визирыд оз вошты,— эскöданаа шуис Веня да водзö, Шожымкалань, сэтi жö и мöдöдчим.

— Оз нин ков пос увъястi кысьясьны, тшем вöрті писькöдчыны,— нимкодясигтыр серала ас ылын.

Сьöкыд нопъясөн кыссям да ёнасö эг нин вöралöй. Туй дорсьыс кö нин Альчик ур увтöдас, кызд сійös он кый, ачыс нопъяд пырö да? Пон, тыдалö, гөгöрвоис: мудзöмаöсь, ылысь кö

---

мыйкӧ увтас — ог волӧй, весьшӧрӧ сылӧн зильӧмыс лоӧ, да бокиас эз и ылыстчыв. Гашкӧ, и ачыс мудзис жӧ: ловъя лов ӧд, Визир кузя локтигӧн на Веня нель ур лыйис.

Прӧсекаыс и збыльысь Шожымка выло петкӧдис. Ванюк нырдӧ, горуло. Никӧнор пывсян матын сэтсыянь. И юсӧ тӧдана вуджанин орчӧн. Гожӧмнас, турун пуктигӧн, мӧдар берегса бечевникъясас вуджавны слегаясысь пода пос вӧчлим, весиг перилоа. Сэти и вуджим.

Пажын кадӧ Никӧнор пывсянын нин вӧлим. Шойччыштим, пузьӧдлим чай да гортӧ мӧдӧдчим. Нӧшта сизим верст ковмас восьлавны. Но ӧд ас вӧляысь, ас окотаысь сы ылнаас ветлим. Та вӧсна сӧлӧм вылын вӧли нимкодъ: мед кӧть и дас верст, воам...

Мӧдысь матысса воясас Дозмӧркаӧ ветлыны сэссия эз удайтчыв. Веня, сизим класс помалӧм бӧрас, связь училищеӧ велӧдчыны мунис, а бур ӧрттӧг сы ылнаас ветлыны, да нӧшта и некымын лун-вой кежлӧ — абу карта сай вӧрӧ петавны.

Ӑни Дозмӧркаын немтор вӧчны мортлы ни пӧткалы. Вӧрсӧ нуӧмны — синмӧн судзтӧм эрд кольӧма. Яг шӧрӧдыс Микуньясьянь юркарлань кӧрт туй юковтӧ. Орчӧн биару да мувий трубаяс нюжӧдӧмны. А ягыслӧн сӧмын нимыс коли — морӧссӧ тракторъясӧн парсалӧм чав лыа вылас кыз да пипу ӧтрӧстель мӧдӧма быдмыны. Ловъя лов ни вотӧс...



---

*ПЫДДИ ПУКТАНА АВТОРЪЯС!*

Редакцияӧ гижӧдъяснытӧ ыстӧгӧн быть колӧ юртны:

1. Ассыныд ним, вич, ов; кор да кӧни чужлӧмныд (лун, тӧлысь, во).
2. Паспорт юӧръяс: номер, серия, кор да кӧни сетӧсны, гортса адрес (прописка серти).
3. Индивидуальной налогӧвой номер — ИНН (кодлӧн эм).
4. Страховӧй свидетельство номер.
5. Банкын сӧт реквизитъяс.

**Тайӧс юрттӧг редакция гонорар оз вешты.**

---

*Журналын йӧзӧдтӧм гижӧдъяс  
редакция оз рецензируют и авторыслы найӧс оз мӧдӧд.  
Редакция оз век во ӧти кывӧй авторъяскӧд.*

---

Компьютерный набор — **Н.Кузнецова.**

---

Учредители: Администрация Главы Республики Коми,  
«Союз писателей Республики Коми» — региональное отделение общероссийской  
общественной организации «Союз писателей России».

Издатель: АУ РК «Издательский дом Коми». Директор Плетцер Е.В.  
Адрес издателя: 167982. ГСП-2, г. Сыктывкар, ул. Карла Маркса, д. 229, Дом печати.

---

Адрес редакции: 167982. ГСП-2, г. Сыктывкар, ул. Карла Маркса, д. 229, Дом печати.  
Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).

**E-mail: kodzuv@mail.ru; Сайт: www.komimu.com**

---

Подписано к печати 16.03.2018. Дата выхода в свет 30.03.2018. Формат 70x108<sup>1/16</sup>. Печать офсетная. Усл. печ. л. 7; усл. кр.-отг. 8,4; учётно-изд. л. 7,54. Тираж 442. Заказ № 18-2129. Регистр. ПИ № ТУ11 - 00347 от 24.03.2017 г. выдано Управлением Федеральной службы по надзору в сфере связи, информационных технологий и массовых коммуникаций по Республике Коми. Публикация материалов на социально значимые темы осуществляется за счет субсидии, предоставленной Администрацией Главы Республики Коми из республиканского бюджета Республики Коми. Отпечатано в ООО «Коми республиканская типография», 167610, г. Сыктывкар, ул. В.Савина, д. 81. Цена свободная.

# Выль небӧг


ББК 84(2Рос.Ком)-5  
Л88

ISBN 978-5-9500935-8-6

Лыткин В.И. Дзима-люка дзиз.— Сыктывкар, Коми Республикаса гижысь котыр, 2017.— 16 л.б.

Челядь радейтӧны Илля Васьлысь кывбуръяссӧ, и тайӧ небӧгыс лоас налы бур козинӧн.

Серпасалис А.Б.Минченкова.



ББК 84(2Рос.Ком)-5  
П58

ISBN 978-5-9500935-5-5

Попов С.А. Ошпи бӧрдӧ: Кывбуръяс.— Сыктывкар, Коми Республикаса гижысь котыр, 2017.— 32 л.б.

Серафим Поповлӧн кывбуръяса «Ошпи бӧрдӧ» небӧгсӧ артыштӧма быдмысь войтырлы лыддьӧм вылӧ.

Серпасалис Г.Н.Шарипков.

